




1790

7990.2

v. 2




EAST ASIAN LIBRARY
CHINESE COLLECTION

APR 8 1942

哥倫比亞大學
中文圖書館章



中文圖書分類法
第 1 版
1928 年



卷第八 國家

一 國家通義

中國人有恒言曰天下國家此分天下與國家為二者也國家者天下內之列國也天下者合列國而言之也古之諸侯對於天子本有不純臣之義除各種制限外實有獨立自治之權名曰國家當之無愧矣天下者雖為列國合言之公名然行使天下之治權在於天子而天子又自有所用之國故春秋託王於魯亦謂王者當先內治其國也小雅六月之詩曰王于出征以匡王國大雅文王之詩曰思皇多士生此王國尚書無逸稱殷王中宗高宗祖甲及周文王皆曰享國若干年明天子之王畿亦稱國也故天子與諸侯雖非中分平等

然亦非十分不平等。其關係殆如今日聯邦之制。中央與地方各有獨立政府也。故吾今於天子諸侯之國皆以國家視之。不分別天下與國家之異也。

凡名為國者必有土地人民政事三者。然後方可謂之國家。孟子曰。諸侯之寶三。土地人民政事是也。第十四政事者即今之所謂主權也。天子有最高主權。其王畿得名為國家者無論矣。若諸侯則亦自有獨立主權者也。諸侯自有獨立主權。其事本自有封建以來。至春秋時其權且駕天子而上之。至戰國時則諸侯益張而天子益微矣。故孟子所稱諸侯之三寶實為完全獨立國家。而其所謂政事亦最高無上之主權也。

二 爵號

一 凡列爵之數。孟子曰。天子一位。公一位。侯一位。伯一位。子男同位。凡五等也。第十公羊傳曰。天子三公稱公。王者之後稱公。其餘大國稱侯。小國稱伯。子男又曰。春秋伯子男一也。辭無所貶。隱公五年。桓公十一年。王制曰。王者之制爵祿。公侯伯子男凡五等。今合三說而論之。文家爵五等者。法地之有五行也。質家爵三等者。法天之有三光也。春秋改周之文。從殷之質。故合伯子男為一。而統稱曰子。夷狄進爵稱子是也。合三從子者。制由中也。此制爵三等之義也。然爵等雖三。而爵名仍五。春秋於公侯伯子男之名。仍如故也。若合天子一位而計之。則四等也。王者與諸侯俱分土而治。本有不純。臣之

義並非絕世之貴。故置天子於五爵之中而合計之。天子一位。公一位。侯一位。伯子男同一位。爵號凡六。而爵等惟四。其亦春秋之義也。也歟。至其命數則公九命。侯七命。伯子男五命。

二 凡王者据土與諸侯分職。俱南面而治。有不純臣之義。故同姓大國則曰伯父。其異姓則曰伯舅。同姓小邦則曰叔父。其異姓則曰叔舅。公羊傳注。隱公元年。儀禮覲禮。蓋春秋雖大一統。而實具聯邦合治之制。故天子於諸侯稱之曰賓。尊且親之不純臣之也。

三 土地

一 凡分土建國之制。孟子曰。天子之制地方千里。公侯皆方百里。不達於天子伯七十里。子男五十里。凡四等。不能五十里。附於諸侯曰附庸。第七

王制同之。惟春秋之制。既合伯子男為一。故分土祇有二等。合天子計之。亦祇三等。蓋天子之地方千里。公侯大國方百里。伯子男小國七十里也。春秋繁露所以云土二品也。第二十八

二 凡封諸侯。不過百里。象雷震百里。強幹弱枝。所以為治也。後漢書第一孟子曰。天子之地方千里。不千里不足以待諸侯。諸侯之地方百里。不百里不足以守宗廟之典籍。周公之封於魯。為方百里也。地非不足。而儉於百里。太公之封於齊也。亦為方百里也。地非不足也。而儉於百里。第十二然又有百里七十里或五十里之分者。差德功也。白虎通

孔子曰。貧而好樂。富而好禮。眾而以寧者。天下其幾矣。故制國不過

千乘都城不百過百雉家富不過百乘以此坊民諸侯猶有畔者禮記坊記孔子又曰冕弁兵革藏於私家非禮也是謂脅君禮記禮運是故國而太小城而太固家而太富皆足以為畔亂之具兵革藏於私家亦足以為劫脅之資均非孔教大一統以保平和之制度也據此言之封建實非聖人之意其所以猶存封建者勢不得已耳然苟以孔子之法嚴立制限則封建之弊亦無自而生也

三 凡附庸之國無獨立資格不得與諸侯集合朝會天子庸者城也小城曰附庸附庸者以國事附於大國不能自以其名通也禮記王制然亦分為四等曰字曰名曰人曰氏春秋之進退夷狄共分七等州不若國國不若氏氏不若人人不若名名不若字字不若子公

羊傳莊公十年子則進至於爵已成小國而脫於附庸州國則未離乎夷狄惟氏人名字則附庸之等級也附庸字者地方三十里名者方二里人氏者方十五里春秋繁露第二十八此附庸分土之等也四 凡分土建國皆以出稅之田言非以封域言孟子之所謂地即王制之所謂田故井地即井田也古者兵車財賦官祿皆專以出於田者為主故自千里之王畿至十五里之附庸皆除去山川林城郭宮室涂巷園囿等不計而惟以穀土為率算所謂方里而井井九百畝也方里者不必其形正方以方田之法算之有九百畝即曰方里地方百里等方字皆如是也然則百里之國不謂封疆其里亦非廣長之里矣又田有不易百畝一易二百畝再易三百畝之分則一井

不必九百畝。百里之國亦不必九百萬畝。若以通率二井當一畝計之。當有一千八百萬畝矣。孟子王制但舉不易之田。故謂一夫百畝。大國百里也。此調均之道也。

五 凡春秋之義。諸侯不得專地。所以壹統尊法制也。漢書第八十二僖公元年。公羊傳曰。諸侯之義不得專封。何注曰。此道大平制。然則不得專地。是為總義。其為太平制更可知矣。

六 凡擅易天子之地。則背叛當誅。隱公八年。春秋曰。三月鄭伯使宛來歸郕。庚寅我入郕。穀梁傳曰。名宛所以貶鄭伯。惡與地也。入者內弗受也。日入惡入者也。郕者鄭伯所受命於天子而祭泰山之邑也。桓公元年。春秋曰。鄭伯以璧假許田。穀梁傳曰。假不言以言以非。

假也。非假而曰假。諱易地也。禮天子在上。諸侯不得以地相與也。無田則無許可知矣。不言許。不與許也。許田者魯朝宿之邑也。邠者鄭伯之所受命而祭泰山之邑也。用見魯之不朝於周而鄭之不祭泰山也。蓋邠近魯而許近鄭。故前後五年之間而鄭魯交易之利則利矣。然凡情之所便而亂之所生者。春秋不與也。假許田尚可言。假許不可言。故曰不與許也。邠許皆天子所賜鄭魯之邑。然春秋不許諸侯得專地。故不許其相易。原孔子之意。第一則王權當尊。凡屬諸侯皆無專地之權。此中央集權之至者也。其次則國土有定。能保持其原狀。即能保國勢之平均。不因易地而生偏重。及紛亂之弊。而凡買賣贈賂之事。皆格於此義而不得行。此均勢之義也。其次則自由易

地尚為不義。則攻戰以爭地者。其罪益無所逃。其事益不得逞。此弭兵之義也。^又其次則推諸侯不得專地之義。而一切土地均為萬國政府所有。各國僅得保管之。而不得專有之。平民更不得專有之。此國際社會主義也。凡此皆諸侯不得專地之義也。

七 凡諸侯不得專封。雖齊桓公之封邢。封衛。封杞。有存亡國之功。孔子心實與之。而行法絕而不予。止亂之道也。春秋繁露第六蓋唯天子有大封之禮。乃命鄰國以其師城之。故大雅烝民之詩曰。王命仲山甫。城彼東方。毛傳曰。古者諸侯之居偏隘。則王者遷其邑而定其居。明非有王者之命。不得專遷。亦不得專城也。

八 凡受諸侯之專封者。當誅。昭公十三年。春秋曰。蔡侯廬歸于蔡。

陳侯吳歸于陳。以諸侯之封。宜受於天子。今乃受國於楚。故名之。見當誅討。不合為諸侯也。

九 凡畫界不當帥師。昭公元年。春秋曰。叔弓帥師疆運田。公羊傳曰。疆運田者何。與莒為竟也。與莒為竟則曷為帥師而往。畏莒也。蓋刺魯微弱失操。煩擾百姓也。

十 凡諸侯土地各有封疆里數。不得相奪。公羊傳注桓公二年成公八年。

十一 凡取他國之地者。雖意取之。終不可名為其有。蓋無論何時。不得奪人之土地所有權也。公羊傳注桓公二年。

十二 凡土地縱被侵奪。其終必歸本主所有。惟被侵奪時。其地繫暫

於今主。蓋凡取地者。皆就其地而取之。俄頃便可占為己有。地與新主。關係最密。故春秋使地從主人。即繫於今主。而不追繫本主。以省轆轤。而定臨時之主權。藉以維持現狀。後王者起。興滅國。繼絕世。反取邑。不嫌不明。終可使為本主所有。不必沾沾於目前之事。不繫之今主。而追繫本主也。公羊傳桓公二年。

十三 凡所取侵當歸原主。故僖公三十一年。公羊傳曰。晉侯執曹伯。班其所取侵地于諸侯也。孟子謂慎子曰。今魯方百里者。五子以為有王者作。則魯在所損乎。在所益乎。蓋謂魯之封疆里數。本限於百里。今雖兼侵小國。至於五百里。然有王者作。必在見損之列。是即春秋後王起而興滅國。繼絕世。反取邑之義也。孟子第十二。

十四 凡諸侯土地本有度數不得隨水隨水有之當坐取邑之罪
襄公十九年春秋曰取邾田自濇水公羊傳曰其言自濇水何以濇
為竟也何言乎以濇為竟濇移也蓋魯本與邾婁以濇為竟及濇移
入邾婁界魯隨水而有其地孔子惡其貪故以取邑坐之也

十五 凡受他國之罪人而伐取其地以封之者是地當仍繫之原
屬之國其伐取者及受封者不得有之蓋不與諸侯之專封亦不與
罪人之得正也成公十五年宋魚石出奔楚十八年楚為之伐宋取
彭城以封魚石魚石之罪即在於假外兵以伐取君邑而居之矣其
明年即襄公元年宋師與諸侯之師圍彭城春秋書其事稱之曰圍
宋彭城夫楚已取之矣曷為繫之宋不與諸侯專封也亦不與魚石

正也。公羊傳穀梁傳

十六 凡臣子不得以地叛。若據地以叛而出奔，乃歸其地於所奔之國。則與者受者均同罪，所以重地也。公羊傳襄公二十一年昭公五年。

十七 凡地權以人民貢賦為主。貢賦屬於故國，則當為故國之地。貢賦屬於敵國，則已為敵國之地。若敵國以尚屬於故國，歸諸故國，則故國不坐取邑。宣公十年春，春秋曰：齊人歸我濟西田。公羊傳曰：齊已取之矣。其言我何？言我者未絕于我也。曷為未絕于我？齊已取之矣。其實未之齊也。蓋其人民^貢賦尚屬於魯也。故不曰來歸。

十八 凡人民貢賦不屬於故國之地，則與故國之關係已絕，不應

復得定公十年夏春秋曰齊人來歸運謹龜陰田何注曰歸濟西田不言來此其言來者已絕魯不應復得故從來常文與齊人來歸衛寶同夫子雖欲不受定公貪而受之夫魯之所以不應復得者正以不能保守先君世邑而失之也孔子恐人爭地以戰反覆攻奪無已故著已絕不應復得之義所以維持現狀使人不念舊惡而永杜爭端夫至於來歸侵地猶不應復得則用兵以爭回者更無論矣此弭兵之更進一步者也

十九 凡應得之地當時不取久而後取當坐取邑僖公三十一年春秋曰春取濟西田公羊傳曰惡乎取之取之曹也曷為不取之曹諱取同姓之田也此未有伐曹者則其言取之曹何晉侯執曹伯班

其所取侵地于諸侯也。晉侯執曹伯，班其所取侵地于諸侯，則何諱乎？取同姓之田，久也。蓋濟西田，本魯之故地。晉侯於二十八年取諸曹，而還諸魯。魯侯得之，乃當時不取，久後有悔。三年後更緣前語取之。春秋以為不應復得，故坐以取邑。蓋從當日言之，則不許久留懸案，不即解決，以釀^異日之爭端。從其後言之，則不許貪利者動藉前言，得伸要索，所以維持國際之現狀，而保其和平也。

二十 凡乘勝而求賂者可恥。成公二年，魯藉晉力，勝齊于鞏，乃乘勝脅齊，求賂得邑。春秋恥之，書曰：「取汶陽田，不繫之齊。」諱使若非齊邑也。蓋雖戰勝而不容其貪利也。夫至於勝而無所得焉，則人將無樂乎為戰矣。此保和之道也。

昔魯欲使慎子為將軍。孟子曰：「一戰勝齊，遂有南陽。然且不可。」又曰：「徒取諸彼以與此，然且仁者不為。況於殺人以求之乎？」（孟子第十二）然則乘勝以求地者，固非孔教所許矣。蓋孔子之制，各國疆土均有定額，不許損益也。

二十一凡犯法而割地以賂人者，可惡。其受賂者當坐取邑。雖未受賂，既以言許受，即當坐罪而減一等。宣公元年，春秋曰：「六月，齊人取濟西田。」蓋宣公弑子赤而篡位，子赤為齊外孫，恐為齊誅，故賂之使自輔。春秋甚惡之，故諱使若齊自取之者，亦因惡齊取篡者賂，當坐取邑，故言取也。邑雖未之齊，既行言許受，即當坐受賂也。稱人者，共國之辭。蓋人字為齊魯兩國所共有，明魯人齊人皆當貶也。月者，

篡弑之罪重於侵伐鄰國也。故哀公八年齊人取讎及憚不月而此月之。

二十二 凡畏人而賂以地者可恥。哀公七年八月公入邾婁以邾婁子益來。然邾婁為齊與國。畏為齊所怒。因於八年賂之。邑春秋以為恥甚。諱使若齊自取書之曰。夏齊人取讎及憚。蓋強鄰以兵伐我而取邑。其恥猶輕於不被兵而賂人。此孔子彊內而不畏外之義也。亦不侵犯他國以取怒強鄰之義也。蓋自正者無畏人之理。自彊者無畏人之勢也。

二十三 凡能悔過者當以所侵地或所賂地歸之。如成公二年魯晉衛曹合軍敗齊于鞏。魯取齊陽田。及成公八年晉侯聞齊侯悔過。

自責。弔死視疾。七年不飲酒。不食肉。乃高其義。畏其德。使諸侯還葦之所喪邑。春秋書之曰。晉侯使韓穿來言汶陽之田歸之于齊。主書者善晉之義齊也。又哀公八年。魯因入齊與國邾婁。以邾婁子益來。乃賂齊以謹及鄆。及魯歸益於邾婁。齊即以所賂邑歸之。春秋書曰。齊人歸謹及鄆。蓋善魯能悔過。所喪之邑。求自得。故言歸而不曰來歸也。

二十四 凡雖征服敵國。亦當不土其地。不分其民。故僖公四年。齊桓公雖侵蔡。而蔡潰亦不有蔡也。此孔子所以稱齊桓之正也。穀梁傳論語第十四是故因征服而占領其地。甚或取為己有者。非孔子所許也。

二十五 凡取他國之地以自廣大者皆為貪利之惡其始犯者惡尤重隱公四年春秋曰莒人伐杞取牟婁穀梁傳曰言伐言取所惡也諸侯相伐取地于是始故謹而志之也蓋入春秋以來此為取地之始故公羊傳曰外取邑不書此何以書疾始取邑也明其惡加重也既伐其國又取其土明伐不以罪而又貪其利故兩書取伐以彰其惡也取邑例時

二十六 凡取地愈多者其惡愈甚隱公十年春秋曰六月壬戌公敗宋師于營辛未取郕辛巳取防公羊傳曰取邑不日此何以日一月而再取也何言乎一月而再取甚之也蓋取邑例時今日之者甚魯隱公之見利生事利心數動也穀梁傳曰不正其乘敗人而深為

利取二邑故謹而日之也

二十七 凡春秋之義諱取同姓田以為同姓相貪利惡差重恥差深公羊傳僖公三十一年然則時至今日其取同種人之地者罪當加一等矣

二十八 凡同盟諸國當信義相守以長和親凡同盟之物皆不得取之苟有貪犯即為背信其首犯者尤當加責之襄公十一年秋七月公與諸侯同盟于京城北後又會諸侯于蕭魚乃十二年春莒人即取魯之台邑春秋惡其首惡書曰春王三月莒人伐我東鄙圍台公羊傳曰邑不言圍此其言圍何伐而言圍者取邑之辭也伐而不言圍者非取邑之辭也蓋春秋深恥同盟諸國之無信故諱取邑而

言圍以起之月者加責之。所以疾始也。

二十九 凡人加禮於己。而己未期年而取其邑。則其惡加甚。昔宣公於八年冬十月葬其母頃熊。邾婁子來加禮。乃於九年秋取邾婁之根年。春秋諱之。書曰。秋取根年。不繫乎邾婁。以明其惡比尋常取邑加重也。

三十 凡欺侮弱小。連年取邑。是為夷狄之行。哀公二年。春秋曰。春王二月。季孫斯。叔孫州仇。仲孫何忌帥師伐邾婁。取鄆東田及沂西田。三年冬。又曰。叔孫州仇。仲孫何忌帥師圍邾婁。六年。又曰。春。城邾婁。蔭何注曰。城者取之也。不言取者。魯數圍取邾婁邑。邾婁未曾加非於魯。而侮之不知足。有夷狄之行。故諱之。明惡甚。

三十一 凡將滅人國而先多取其邑者春秋必重而書之以著其滅國之始。故春秋之例外取邑不書而莊公元年書曰齊師遷紀鄆鄆鄆鄆鄆鄆者紀國之三邑也遷者以師取之也據公羊傳則春秋因美齊襄公復讎故諱取言遷然諱其文不諱其實以其滅紀從此始故重而書之也

三十二 凡取人之地至盡是為不仁之甚昔莊公四年齊襄公滅紀越二十七年為莊公三十年紀之遺邑獨有鄆存乃齊桓公脅之以威屈其志而窮其力並鄆而盡取之故春秋書曰齊人降鄆不曰鄆降于齊所以閔鄆而甚桓也外取邑不書此何以書惡其取邑至盡不仁之甚也月者著其惡之重於尋常取邑也稱齊人貶也

三十三 凡行義而取人之地則為乘義為利宣公四年春秋曰正月公及齊侯平莒及郟莒人不肯公伐莒取向公羊傳曰此平莒也其言不肯何辭取向也蓋宣公實因平莒而取向以義始以利終春秋惡之故特為之辭諱使若莒不肯聽公平而公伐取其邑以弱之比之直書取向其罪較輕也及齊侯者魯之力不能獨平借助齊力而平之又以見魯之因人之力以取邑可恥之甚也月者著其行義為利之惡也

宣公十年陳夏徵舒弑陳靈公而自立為陳侯此弑君之賊當討者也明年楚莊王討而殺之因縣陳春秋書曰冬十月楚人殺陳夏徵舒丁亥楚子入陳春秋之義入例時傷害多則月今書日者惡莊王

討賊之後欲利其國也。後莊王之臣申叔時諫曰：鄙語有之，牽牛徑人田，田主奪之牛，徑則有罪矣。奪之牛，不亦甚乎？今王以徵舒為賊弑君，故徵兵諸侯以義伐之，已而取之，以利其地，則後何以令於天下？莊王曰：善。乃迎陳靈公太子午於晉而立之，復君陳如故。孔子讀史記至楚復陳，曰：賢哉楚莊王，輕千乘之國而重一言，是故春秋既書丁亥之日以惡其貪利，復稱楚子以美其悔過，善惡不相掩，此義利之別也。公羊傳及史記第三十六

三十四 凡行詐劫人以取地者，春秋責之，甚於尋常取邑。故莊公十三年，曹子劫齊桓公于柯，以取汶陽之田，春秋諱而不書，蓋其罪甚於書者也。

甲 公共山海川澤

孔子之制凡山海川澤之有關係者皆公之萬國定為中立直隸中央所以公天下之利於民公天下之險於眾不使一國得壟斷而操縱之此調均國勢保持平和之道也桓公十六年公羊傳稱衛侯朔越在岱陰齊不曰齊岱陰而曰岱陰齊者言岱陰之齊也何注曰明名山大澤不以封諸侯以為天地自然之利非人力所能加故當與百姓共同之王制曰名山大澤不以封鄭注云與民同財不得郭管亦賦稅之而已班固白虎通曰名山大澤不以封者與百姓共之不使一國獨專也山木之饒水泉之利千里相通所以均有無贍其不足又漢書吳王濞傳贊曰吳王擅山海之利能薄斂以使其眾逆亂之萌

自其子興古者諸侯不過百里山海不以封蓋防此矣漢書第三十
五然則由孔子之道則重要之山海川澤皆不許一國獨占而直隸
於萬國之中央政府以為萬國人民所公有人人得以自由使用中
央政府亦不過取其賦稅而已故吾名之曰國際社會主義苟能行
此則門戶開放天下一家機會均等權力平衡而平和可保矣

乙 領空

凡空域全為主權所及惟他人之無害使用當容許之夫領空為今
日之新問題吾演孔繹孔門國際法何以及此不知空域之成為問
題在今日則為新而在中國古時則為舊當^舜堯之時洪水滔天蕩
蕩懷山襄陵舜乃舉禹治水故堯典曰伯禹作司空司空之名始見

於見^此而禹卒奏平水土之績使地平天成此司空之最著者也白虎
通曰司空主土不言土言空者空尚主^之何况於實以微見著揚雄司
空箴曰乃立地官空惟是職又曰空臣司土然則管理空域乃司空
專責主空而職空且稱空臣甚矣空間之為領域而有大官以主之
也考王立三公其一為司空諸侯不論國之大小亦立三卿其一為
司空是則王畿及列國皆有司空之官矣既各有司空之官即各以
空域為其^{主權}所求及之地此可斷言而無疑者也至吾所以云當容許
他人之無害使用者則以假道之義推之也夫陸地尚可假道豈空
域不許通過乎此可比例而知也然名山大澤公之萬國而空域乃
歸下土之國所管轄者以名山大澤為特別大利所在足以破壞國力

之平均而空域則萬方一概雖屬於下土之國比之鄰國無所加損也且王公設險以守其國若任人在其國之上方可以自由則其國不勝危險此又不得不以空域屬於其國之勢也

丙 都會

一 凡天子之居謂之京師京者大也師者眾也天子之居必以眾大之辭言之也何休曰地方千里周城千雉宮室官府制度廣大四方各以其職來貢莫不備具所以必自有地者治自近始故據土與諸侯分職而聽其政焉即春秋所謂內治其國也公羊傳注桓公九年

二 凡王者立都及封諸侯必居土中故^所以教化者平貢賦者均在

德不在險。僖公元年。春秋曰。夏六月。邢遷于陳儀。蓋邢畏狄兵。遷都
以依險阻。而其後反為衛所滅。故孔子譏其不尚德而尚險也。孔子
三百五十年。婁敬曰。成王營成周都洛。以為此天下中。諸侯四方納
貢職。道里鈞矣。有德則易以王。無德則易以亡。凡居此者。欲令務以
德致人。不欲阻險。令後世驕奢以虐民也。漢書第四十三。然則春秋
之義。不論天子諸侯。皆必建都於其土之中。所以均教道。平往來。並
不志在依險阻也。嗚呼。我中國真可謂尚德之國矣。建國以德而不
以險。明知其易亡而故為之。使為善易以聞。為惡易以聞。明王者及
諸侯皆當恐懼戒慎。以趨善而遠惡。此天下為公之大道。和平之極
致也。

孟子曰。域民不以封疆之界。固國不以山谿之險。威天下不以兵革之利。得道者多助。失道者寡助。寡助之至。親戚畔之。多助之至。天下順之。以天下之所順。攻親戚之所畔。故君子有不戰。戰必勝矣。此在德不在險之義也。是故孟子曰。天時不如地利。地利不如人和。第四

三 春秋之義。以國都為國之代表。故稱都為國。以重之。桓公十二年。春秋曰。十有二月。及鄭師伐宋。丁未。戰于宋。宋不出主名者。兵攻都城也。戰于宋都而言戰于宋者。以國稱都也。

四 春秋之義。以君為國之代表。君所在之地。雖邑而非都。亦以稱國之辭。稱之重之也。莊公二年。春秋曰。夏。公子慶父帥師伐於餘丘。公羊傳曰。於餘丘者何。邾婁之邑也。曷為不繫乎邾婁國之也。曷為

國之君存焉爾。凡稱邑為國。以著君存者。明臣民當赴其難。與在國都等也。公羊傳注桓公七年。

五。古者列國之情形。不大相遠。其國力皆以田為主。故但能於分土建國之際。調均其田。而國力即平均矣。其山川林麓。為天然大利所在。既歸之萬國。公有不以之封諸侯。而城郭宮室涂巷園囿。所謂都會之地。又皆各有定制。列國之間。均相差不遠。故但除去不計。即於國力之平均。毫無影響。後世都會集中之形勢既成。其大都不獨為一國之精華所聚。且為萬國之精華所聚。若欲求國力之平。頗難斟酌。吾今謹本孔子分土不分民之義。及分土不計城郭宮室之意。擬為國際都會及國內都會兩種辦法。國際都會者。世界之大都。其

精華原非一國之所有。雖隸於一國版圖。似宜劃出為萬國公地。使之獨立。直隸於萬國中央政府。在中央政府未統一之先。則暫以管理之權託之於原日所屬之國。但其政令須一視同仁。不得有內外之別。亦不得於外人之中有所偏袒。若不幸而有戰事。則為中立地點。主客各軍皆不得利用之。尤不得侵犯之。平時既無守備之費。戰時更無爭奪之累。都會之民惟從事於平和事業。終身不見兵革。而其中之文明建設。永無墮壞之期。又原有之國家。祇可用都會中之土地。人民政事。以圖文事之發達。不得及於兵事。則各國人民之不樂負擔^擔兵事者。自日趨於都會。都會之人民財富。既為一國及萬國之精華。則文事必日以發達。而又無與於兵事。則兵備以乏人乏財之

故不特無從擴張必且日就衰減此釜底抽薪之法也夫今日國爭劇烈之時欲使列國皆除國界廢公之於世誠不近於人情即欲使之劃出國都公之於世亦難以如志若欲以兵力削平之以求天下之一統更非吾人所忍言惟名義則屬之於其國而實際則公之於全球彼國以其地主之近居民之眾於一切利益本處優勝之勢而無人與爭而聲明文物光輝爛然更以益其本國之聲譽既享實利又得榮名則彼國所得之報酬亦可以止矣何必興甲兵危士臣構怨於諸侯以求其大欲而後快於心歟且競爭並非由是而消滅也除兵爭以外一切平和之事業皆各有登峰造極之思即各為出奇制勝之計而各盡其心各竭其力就人與人之間言之則有人與人之

分^競爭就國與國之間言之亦有國與國之總競爭特其所競者^爭進而益上皆有益於人之事與殺人之兵事大不同耳國都之性質既由國內以變為國際則天下一統之局將由漸而成而萬國之中央政府可漸求統一矣此擒賊擒王之法也吾故曰欲天下之定於一而無戰爭者當自以各國之都城為永久中立而去其兵備始此亦孔子墮三都出藏甲之遺意也至於國內各地之大都會亦為全國之精華所聚非各該地之所有應將其地獨立於地方行政之外而直隸於中央庶各地之權力利益可以平均而中央之統一更形鞏固此亦消弭內亂之道也

四 人民

孔教之義有分土無分民有分土者謂立封疆也無分民者謂通往來不常厥居也故碩鼠之詩曰逝將去女適彼樂土言惡政重斂則驅民以徙於他國也論語孔子曰四方之民襁負其子而至矣言好禮義之君則民皆樂就之也不論何國其民皆各有遷徙之自由出境入境兩無限制望其民之多於鄰國者惟有努力修德盡心愛民以祈近說遠來之效而已此梁惠王所以盡心於民事而欲其民之加多也(孟子第二)雜記曰地有餘而民不足君子恥之言地邑民居必當相得也是故考課功德當於民之多少察之(公羊傳注桓公元

年)

既有分土無分民則當行土斷之法一切居民不問其原隸何國悉隸於現居之國而國籍之法可以不立種族之界可以消滅而國界亦將漸趨於寬大矣欲求世界大同天下太平其必由分土不分民始孔教此義之大有造於將來國際統一事業吾敢斷言之

各國之僑民既悉隸於現居之國以同享國民之權利自應同負國民之義務以無其國家之統一害惟尚有短期優待之事則王制曰將徙於諸侯三月不從政自諸侯來徙家期不從政是也蓋謂大夫采地之民徙於諸侯為民以其新徙當須復除但諸侯地寬役少為人所欲故惟三月不從政若諸侯之民來於大夫之邑徙以大夫役多地狹欲令人貪之故期不從政也以此言之三月期年之內則尚有特

免征役之權利。至三月期年之後。則與本國之民無異矣。

分土不分民之義。不特為孔教之說。學亦為中國古今來之事實也。其

凡以地與人而其民不願屬於新主。祇得聽民之自由可也。孔子前

前一百六十一年。周桓王以十二邑與鄭。而盟向二邑不服鄭。前一

一百五十四年。夏。盟向求成于鄭。既而背之。秋。鄭人齊人衛人伐盟

向。王遷盟向之民于郊。郊。王城也。此舊主因其民不服新主而自遷

之者也。孔子前八十四年。周襄王以陽樊溫原欒茅之田與晉。陽樊

不服。晉圍之。蒼葛呼曰。德以柔中國。刑以威四夷。宜吾不敢服也。此

誰非王之親姻。其俘之也。乃出其民。此新主因其民不服而遷之者

也。左傳。隱公十一年。桓公七年。僖公二十五年。由是觀之。舊主之以

地與人。有命令則已足。若其民不服新主。新主亦不得俘虜之。聽其民遷徙而屬於故國可也。

五 滅國

一 凡兵禍以滅國為最深。故春秋以滅為大惡。滅例月者。惡其篡而罪之也。昭公四年春秋曰。九月取鄆。公羊傳曰。其言取之何。滅之也。滅之則其言取之何。內大惡諱也。蓋諱之使若取內邑也。

二 凡師敗而君獲。則君獲重而師敗輕。故春秋言獲而不言敗。僖公十五年。十有一月。壬戌。晉侯及秦伯戰于韓。獲晉侯。是也。國滅而君獲。則國滅重而君獲輕。故春秋言滅不言獲。僖公二十六年。秋。楚人滅隗。以隗子歸。是也。國滅而君死。亦國滅重而君死輕。故春秋言

滅不言君死。襄公六年十有二月。齊侯滅萊。是也。

三 凡始滅人國者。當貶其終身。隱公二年。春秋曰。無駭帥師入極。公羊傳曰。無駭者。展無駭也。何以不氏。貶曷為貶。疾始滅也。始滅昉於此乎。前始矣。前始則曷為始乎。此託始焉。爾曷為託始焉。爾春秋之始也。此滅也。其言入何。內大惡諱也。蓋春秋以滅為大惡。故變滅言入以諱之。隱公八年。春秋曰。冬十有二月。無駭卒。公羊傳曰。此展無駭也。何以不氏。疾始滅也。故終其身不氏。蓋春秋誅首惡。既託始於無駭。故惡之深也。

四 凡據人要地。絕人外交。通奪人主權。杜人外交。雖非用兵攻取。當與滅國同罪。莊公十年。春秋曰。三月。宋人遷宿。遷者何。先繞取其

地使不得通四方。乃迫而遷之。因而臣之也。月者。坐以滅國之罪也。蓋被遷者。雖未失其國家之名。猶可繼世。而國之實已亡矣。故春秋不復見之也。公羊傳穀梁傳。

五 凡滅同姓之國。當絕。僖公二十五年。春秋曰。春王正月丙午。衛侯燬滅邢。公羊傳曰。衛侯燬。何以名。絕。曷為絕之。滅同姓也。蓋絕先祖支體尤重。故名以甚之也。魯與邢同為周公之後。春秋王魯於邢。滅尤當憂。故為魯而日之也。

六 凡文明古國。為先聖法度所存。若滅之。是為不知尊聖之夷狄。昔杞為夏禹之後。本甚微弱。乃徐與莒於僖公十四年。脅而滅之。故春秋以徐莒為狄。於僖公十五年。書月。楚人敗徐于婁林。狄徐也。又

文公七年書曰冬徐伐莒此復狄徐者莒在下不得狄故一罪而再狄之明為莒狄之也即所以狄莒也

凡滅人之國復以兵戍之本屬不合其遺民雖盡殺戍兵亦不坐罪所以惡強而不義之國亦所以存滅而圖復之國也莊公十七年春秋曰夏齊人滅于遂蓋齊桓公於莊公十三年滅遂遂民不安欲去齊強以兵戍守之遂人共以藥投其所飲食水中盡殺之也孔子之法有分土無分民民之往來遷徙有絕對之自由齊既滅人國復戍守其民使無遷徙之自由則其他種種不自由可想見矣以春秋之義推之凡滅國者最甚亦不可過其地於本國而握其宗主權耳至於其他一切政治固宜任其民之自由也故凡滅人國而又設

軍政府以監守其民者皆不合公理者也。既取其地，又虐其民，不死何待？此春秋所以不坐遂民以殺人之罪，而為齊人自積死之辭也。稱齊人，眾辭也。遂既滅矣，而猶言遂者，以遂民能殺齊戍，若遂之尚存，故稱遂所以存遂也。公羊傳穀梁傳。

六 封建

春秋繁露曰：古之聖人見天意之厚於人也，故南面而君天下，必以兼利之為其遠者，目不能見，其隱者耳不能聞。於是千里之外，割地分民，而建國立君，使為天子視所不見，聽所不聞。朝夕召而問之也。諸侯為言猶諸侯也。第三十七。白虎通曰：王者立三公九卿二十七大夫，足以教道照隱。幽必復封諸侯何？重民之至也。善惡比而易知。

故擇賢而封之。以著其德。極其才。上以尊天子。備藩輔。下以子養百姓。施行其道。開賢者之路。謙不自專。故列土封賢。因而象之。尊賢重民也。此封建之義也。

一 凡王者存二王之後。封之百里。爵稱公。客待之。而不臣。使統其正朔。服其服色。行其禮樂。永事其先祖。所以尊先聖。通三統。師法之義。恭讓禮。於是可得而觀矣。公羊傳注。隱公三年。尚書曰。虞賓在位。謂丹朱也。周頌曰。有客有客。亦白其馬。謂微子朝周。周人客之。而不臣也。

二 凡王者受命而作。當興滅國。繼絕世。所謂滅絕者。一則因先王無道。妄殺無辜。絕人之嗣。二則因嗣子幼弱。為強臣所奪。致無罪而

絕三則因強鄰兼并滅絕異國致力不敵而亡四則因當立者不立讓國他人致賢者子孫無國五則因賢者子孫犯誅絕之罪法當除國故新王既起當追有功顯有德興滅繼絕悉還其國蓋君子不使行善者有後患善善及子孫所以重宗廟廣聖賢之路也論語第二十公羊傳昭公二十年三十一年白虎通孔子曰武王克殷及商未及下車而封黃帝之後於蓟封帝堯之後於祝封帝舜之後於陳下車而封夏后氏之後於杞投殷之後於宋禮記樂記此興滅繼絕之事實也

三 凡因為善而亡國者雖限於時勢之窮而有王者起當復其國公羊傳注疏宣公十五年

四 凡國滅時。臣子與君戮力一心共死。則王者起當存之。蓋滅者亡國之善辭也。滅者上下之同力者也。凡春秋之書滅者。皆志其當興也。公羊傳僖公五年。襄公六年。惟有罪當滅者。則不得在此例。

五 凡國為強暴所滅者。春秋閔而存之。不許人以暴力滅國。而著其被滅者之當存也。昭公八年十月。楚師滅陳。執陳公子招。放之于越。殺陳孔瑗。葬陳哀公。是陳已滅矣。凡已滅之國。春秋例不復見。其復見者。不過以地名錄耳。惟孔子惡楚託義滅陳。恐世人誤以為陳當滅而楚無罪。故獨悲陳而存之。於陳滅之明年。仍從有國之辭。以記災。書曰。夏四月。陳火。公羊傳曰。陳已滅矣。其言陳火何。存陳也。曰存陳。恤矣。曷為存陳。滅人之國。執人之罪人。殺人之賊。葬人之君。若

是則陳存悌矣。

六 凡封國時亦有豫為興滅繼絕之地者。采地之制是也。尚書大傳曰。古者諸侯始受封。則有采地。百里諸侯以三十里。七十里諸侯以二十里。五十里諸侯以十五里。其後子孫雖有臯黜。其采地不黜。使其子孫賢者守之。世世以祠其始受封之人。此之謂興滅國繼絕世。

七 凡受命之王。致太平之主。美羣臣上下之功。故盡封之。及中興征伐大功。皆封。所以褒大功也。盛德之士亦封之。所以尊有德也。以德封者。必試之為附庸三年。有功因而封之五十里。元士有功者亦為附庸。世其位。大夫有功成封五十里。卿功成封七十里。公功成封

百里士有功德封為大夫。大夫有功德遷為卿。卿有功德遷為公。故爵主有德封主有功也。大夫功成未封而死則其子得封。善善及子孫也。(白虎通)

新封之國所以與舊存之國互相維繫。蓋舊存之國既不能廢則不得不有新封之國以與之交錯並峙者勢也。興滅繼絕及並建親賢皆新封之國也。

以上所言王者之封建也。尚有霸者之封建。則齊桓公之存亡繼絕是矣。今世既無天子則霸功足貴。苟有能存亡繼絕者乎。世界之平和猶可保也。謹舉春秋之義以明之。

八 凡既亡之國能復存之者為大功。僖公元年春秋曰。夏六月邢

遷于陳儀。齊師宋師城邢。蓋邢為狄滅。而齊桓公更城陳儀以封之。故邢遷于是也。僖公二年。春秋曰。春王正月。城楚丘。蓋衛為狄滅。而桓公城楚丘以遷衛于是也。僖公十四年。春秋曰。春。諸侯城緣陵。蓋杞為徐莒所滅。而桓公帥諸侯城緣陵。以遷杞于是也。杞為王者之後。桓公復興其滅國。尤為大功。公羊傳曰。上無天子。下無方伯。天下諸侯有相滅亡者。力能救之。則救之可也。

九 凡諸侯有內亂。頻仍。君統將絕者。則繼絕者為大功。閔公二年。春秋曰。冬。齊高子來盟。公羊傳曰。高子者何。齊大夫也。何以不稱使。我無君也。然則何以不名。喜之也。何喜爾。正我也。其正我奈何。莊公死。子般弑。閔公弑。比三君死。曠年無君。設以齊取魯。曾不興師。徒以

言而已矣。桓公使高子將南陽之甲，立僖公而城魯。或曰：自鹿門（魯南）東門（至）于爭門（北）門者是也。或曰：自爭門（至）于吏門（西）門者是也。魯人至今以為美談。曰：猶望高子也。蓋魯莊公於三十二年八月薨，子般立。公弟慶父本早已通乎其兄之夫人哀姜，是年十月遂弑般而奔齊。於是閔公立。明年八月，魯季子以慶父內得重權，外奔彊齊，為禍亂。故奉閔公以託於齊。桓為洛姑之盟，春秋賢之。於其歸國也，書曰：季子來歸，喜其能託君安國也。其冬，慶父反魯。明年八月，又弑閔公。故九月，哀姜奔邾。慶父奔莒。及冬，而高子來盟。時僖公未立，故曰：無君也。三年之中，三君繼死，與曠年無君無異也。明年七月，齊桓公召哀姜而殺之。蓋哀姜者齊女也。慶父亦為莒人所逐，將奔齊。齊

人不納請復入魯。季子不許。於是經而死。統而觀之。則齊桓有取魯之勢而不取。且為之繼絕焉。可謂能憂天下者矣。繼絕世者。孔子之所重也。父子相續。世守其國。使往代之聖賢無絕嗣之憂。今世之國家有均勢之益。保存現狀。爭亂不生。故春秋美大齊桓之功。尊貴其使。稱曰高子也。然而桓之繼魯。本感洛姑之託。季子外交之功。理當褒顯。故亦稱曰季子。使與高子並美也。

孔子三百三十一年。秦始皇初并天下。丞相王綰等言。諸侯初破。燕齊荆地遠。不為置王。毋以填之。請立諸子。唯上幸許。始皇下其議於羣臣。羣臣皆以為便。廷尉李斯議曰。周文武所封子弟同姓甚眾。然後屬疏遠。相攻擊如仇讎。諸侯更相誅伐。周天子弗能禁止。今海內

賴陛下神靈一統皆為郡縣諸子功臣以公賦重賞賜之甚足易制天下無異意則安寧之術也置諸侯不便始皇曰天下共苦戰鬪不休以有侯王賴宗廟天下初定又復立國是樹兵也而求其寧息豈不難哉廷尉議是分天下以為三十六郡郡置守尉監史記第六郡守掌治郡郡尉掌佐守典武職甲卒監御史掌監郡此中國初廢封建之歷史也

封建郡縣之論分爭者歷千餘年然以孔子之道斷之則郡縣之制是也李斯學於荀卿知六藝之歸明春秋大一統之義故決然以郡縣之制為安寧之術而始皇亦謂天下共苦戰鬪不休以有侯王若復立國是為樹兵然則郡縣者平和之保障封建者戰爭之媒介也

柳宗元封建論曰。天地果無初乎。吾不得而知之也。生人果有初乎。吾不得而知之也。然則孰無近。曰有初為近。孰明之。由封建而明之也。彼封建者。更古聖王堯舜禹湯文武而莫能去之。蓋非不欲去之也。勢不可也。勢之來其生人之初乎。不無初。何以有封建。封建非聖人意也。彼其初與萬物皆生。草木榛榛。鹿豕狂狂。人不能搏噬。而且無毛羽。莫克自奉自衛。荀卿有言。必將假物以為用者也。夫假物者必爭。爭而不已。必就其能斷曲直者而聽命焉。其智而明者所伏必眾。告之以直而不改。必痛之而後畏。由是君長刑政生焉。故近者聚而為羣。羣之分其爭必大。大而後有兵有德。又有大者。眾羣之長。又就而聽命焉。以安其屬。於是有諸侯之列。則其爭又有大者焉。德又

大者諸侯之列。又就而聽命焉。以安其封。於是有方伯連帥之類。則其爭又有大者焉。德又大者。方伯連帥之類。又就而聽命。以安其人。然後天下會於一。是故有里胥而後有縣大夫。有縣大夫而後有諸侯。有諸侯而後有方伯連帥。有方伯連帥而後有天子。自天子至於里胥。其德在人者。死必求其嗣而奉之。故封建非聖人意也。勢也。

又曰。或者又以為殷周聖王也。而不革其制。固不當復議也。是大不然。夫殷周之不革者。是不得已也。蓋以諸侯歸殷者三千焉。資以黜夏。湯不得而廢。歸周者八百焉。資以勝殷。武王不得而易。徇之以為安。仍之以為俗。湯武之所不得已也。夫不得已。非公之大者也。私其力於己也。私其衛於子孫也。秦之所以革之者。其為制公之大者也。

其情私也。私其一己之威也。私其盡臣畜於我也。然而公天下之端自秦始。夫天下之道理安斯得人者也。使賢者居上。不肖者居下。而後可以理安。今夫封建者。繼世而理。繼世而理者。上果賢乎。下果不肖乎。則生人之理亂。未可知也。將欲利其社稷。以一其人之視聽。則又有世大夫世食祿邑。以盡其封略。聖賢生於其時。亦無以立於天下。封建者為之也。豈聖人之制。使至於是乎。吾固曰非聖人之意也。勢也。

蘇軾曰。凡有血氣必爭。爭必以利。利莫大於封建。封建者爭之端而亂之始也。自書契以來。臣弑其君。子弑其父。父子兄弟相賊殺。有不出於襲封而爭位者乎。自三代聖人以禮樂教化天下。至刑措不用。

然後不能已篡弑之禍。至漢以來君臣父子相賊虐者皆諸侯王子孫其餘卿大夫不世襲者蓋未嘗有也。近世無復封建則此禍幾絕。仁人君子忍復開之歟。故吾以李斯始皇之言柳宗元之論當為萬世法矣。

夫封建之害既誠如李斯始皇之言柳宗元蘇軾之論然則孔子之經何尚存封建之制乎。曰此勢之不得已也。孔子之時諸侯棋布其勢既未能驟廢則必當明封建之良法以救正之。如大國不過地方百里及一切抑諸侯尊天子之法是也。蓋既有是病不可無是藥也。且聖人之言所以治萬世非第為當時已也。今日封建固不可復然封建之良法美意又安可不存在乎。畫疆分治尊賢重民謙不自專。

其義固無間於封建與郡縣也。今日列國並立，雖無統一之天子，而其實是一大封建之封^世縱。將來有一統之王者出，其勢必不能驟如始皇之罷侯置守，將現存之國界一一剷除淨盡，度亦不過如殷周之王，留存各國，以畧具封建之形，而於其上設一中央政府耳。今日聯邦之制，即將來大地合一之模也。然則封建之義理制度，不特現在不能盡廢，雖將來亦別有發達之餘地也。特其蜕化之迹，時時遞變，不能以迹象刻求之耳。凡此皆出於時勢之不得不然，而不能以意為存廢者也。夫國界固為戰爭之媒，然又不能廢止，則惟有以條約聯合各國，共設一中央政府，以實行限制各國之軍備，然後先使各國之屬地悉離其主國而獨立自治，以直受中央政府之保護。此

興滅繼絕之義也。繼使各主國之本部。亦以漸分畫而小之。此眾建
少力之策也。凡國土愈小。則其民治愈精。不至務廣而荒矣。國土愈
小。則其武力愈弱。不至尾大不掉矣。然後修文偃武。共享太平。彼列
國之自身。固無所得於他國。然亦無所失於他國。不過以天下之公
地。歸之天下之公人。中央政府。亦為萬所公^國有。而無一毫私利於其
間。則列國亦何憚而不為此。至於兵革不興。和親康樂。則列國所得
之利益。寧復可算。故吾今不敢望無國界。望於國界之上。有一中央
政府。而即由現在各國。以組織之耳。化私為公。而仍各治其私。其斯
為公私合一之制也乎。

七 繼世

一 凡諸侯不純繼世。舊君僅及身而止。新君須別受爵命。故諸侯薨。使臣歸瑞珪於天子。蓋諸侯以瑞珪為信。今死矣。嗣子諒闇三年之後。當乃更爵命。故歸之。推讓之義也。示亦新君不敢必得也。嗣子三年喪畢。服士服。以見天子。受爵命後。乃復侯禮。明爵為天子有。臣無自爵之義。韓奕之詩。所謂韓侯受命是也。白虎通韓詩內傳由此觀之。諸侯並非純粹繼世。其前後相襲。猶必待天子之爵命。所以集權中央。不令諸侯得以自專也。

二 凡誅君之子不立。非怒也。無繼也。諸侯世位。本為象賢。誅君之子。無賢可象。故凡犯誅絕之罪者。其子不得繼體奉正也。公羊傳昭

公十一年

三 凡聖人子孫有誅無絕故二王後不貶黜者尊賓客重先王也雖有罪當絕亦更立其次周公誅祿父而仍立微子是也公羊傳注僖公二十三年白虎通凡元功之臣亦有誅無絕春秋於邾婁儀父是也公羊傳注桓公十七年

八 考黜

一 凡王者始立諸侯皆來朝以合符信所以受法稟教也周頌烈文之詩成王即政諸侯皆來朝而助祭之所歌尚書曰輯五瑞覲四嶽羣牧班瑞于羣后謂舜始即位見四方諸侯合符信也五瑞者公侯伯子男所執以為瑞信也班者即班所輯者也

二 凡諸侯執所受珪與璧朝於天子。無過者復得其珪。以歸其邦。有過者留其珪。能正行者復還其珪。三年珪不復。少黜^紕以爵。六年珪不復。少黜^紕以地。九年珪不復。而地畢削。百虎通。此以見諸侯之命。常懸於天子。功罪賞罰。悉極分明。不獨新君繼承之權。以有君薨歸珪之法。而不能必得。即現任者之地位。亦在不能自主之數。此中央集權之世制。而合符還珪之義也。以此言之。諸侯者。不過極久任之地方官耳。或可世襲。或可終身。其有過者。既不能逃。三載改績。三改黜陟之典。又不能免。五年一朝留珪示罰之法也。

三 凡王者重民之至。勉賢抑惡。故有考黜諸侯之法。三歲一閏。天道小備。故三年二伯出述職而黜陟焉。尚書曰。三載考績。三考黜陟。

所以言三考黜陟者。謂爵土之異也。一考則黜陟以地。二考則黜陟以爵。三考則黜陟兼以地爵。前考有功。則增土進爵。後考無功。則削黜。後考有功。則復賜之。百里之侯。一削為七十里侯。再削為七十里伯。三削為寄公。七十里伯。一削為五十里伯。二削為十里子。三削地盡。五十里子。一削為三十里子。再削為三十里男。三削地盡。五十里男。一削為三十里男。再削為三十里附庸。三削地盡。所以至三削者。禮成於三。三而不改。雖反無益矣。先削地。後黜爵者。爵者尊號也。地者人所任也。今不能治廣土眾民。故先削其土地也。且惡人貪狼重土。故先削其所重者。以懼之也。諸侯始封。爵土相隨者。君子重德薄刑。賞疑從重也。

四 凡諸侯暗聾跛癡惡疾不免黜者尊人君也。故桓公五年陳侯鮑有狂易之病春秋不絕之。公羊傳白虎通亦以孔子有負責大臣之制故君主可無責也。任

五 凡王者賜諸侯之禮有九錫。一曰車馬。二曰衣服。三曰樂則。四曰朱戶。五曰陞。納六曰虎賁。七曰弓矢。八曰鈇鉞。九曰秬鬯。皆所以勸善扶不能。九錫又稱九命。言命不言服者。重命不重其財物也。禮百里之國不過九命。七十里不過七命。五十里不過五命。

六 凡王者賞罰不當則春秋貶之。如魯桓公之行實惡而周莊王乃追錫之。尤悖天道。故春秋於莊公元年書曰王使榮叔來錫桓公命不稱天王貶之也。又魯文公新即位功未足施而周襄王即錫之。

命故春秋於文公元年書曰天王使毛伯來錫公命譏其非禮也

七 凡天子所以陵遲者為善不賞為惡不誅此賞罰不明之所致也僖公二十八年衛侯出奔楚當絕叔武立而讓國不當復廢乃天子反衛侯令殺叔武故春秋書之曰六月衛侯鄭自楚復歸于衛言復歸者天子有命歸之名者刺天子歸有罪言自楚者為天子諱使若從楚歸也

九 承認

一 凡國家之須承認者有兩種一則違法爭位以篡弑得國者一則起自他方或他家而移易國統者前者之承認其法最為單簡即列於征伐會盟者_是也惟後者之承認則非經天子之策命不可今且

先以後者言之。孔子前一百九十三年。晉昭侯封其季父成師于曲沃。稱曲沃伯。一國之內。復建國焉。弱本而強末。故其後曲沃屢次作亂。至孔子前一百二十八年。成師之孫武公卒。滅晉。盡以其寶器賂周釐王。以請王命。明年。王使虢公命曲沃伯以一軍為晉侯。蓋至是而王乃承認武公列之於諸侯矣。時魯莊公十六年也。孔子不書於春秋。蓋惡之也。

春秋之時。晉為伯國。霸其後六卿專權。公室日衰。後六卿又并為三家。即魏韓趙是也。孔子一百十五年。為晉幽公元年。時晉獨有絳曲沃。餘皆入魏韓趙。號為三晉。幽公畏其強。反朝於魏韓趙之君。夫幽公晉君也。魏韓趙雖強。晉臣也。今乃以君朝臣。雖非以故主而為三晉。

之臣固已待三晉為列國而自待如小國之朝於大國矣故吾謂此為母國承認子國獨立之事

子國既經母國承認則其自待必如諸侯不必言矣故三晉自通王室同於列國而王室亦以列國待之如孔子百四十二年周威烈王命韓啟章趙浣伐齊是也

然三晉猶未得天子之正式承認也至孔子百四十九年周威烈王命魏斯韓虔趙籍為諸侯而三晉之國基乃大定矣史記第三十九齊自孔子七十一年田常弑簡公而相齊國諸侯晏然弗討孔子請魯哀公討之公又弗能用在事實上齊已為田氏之國矣故明年田常割國之大半以自為封邑自稱田氏孔子九十九年田常之子盤

使其兄弟宗人盡為齊都邑大夫。與三晉通使。蓋駸駸乎列於諸侯矣。及孔子一百六十三年。田常之曾孫田和與魏文侯會濁澤。求為諸侯。魏文侯乃使使言周天子及諸侯。請立齊相。田和為諸侯。周天子許之。故孔子一百六十六年。田和立為齊侯。列於周室。史記第四

十六

凡此皆承認新國之歷史也。以義理言之。非孔子之所許。今不過舉其事實耳。

二 凡他國之亂臣賊子。宜屏諸國際團體之外。若與亂賊比黨。則其國亦自有亂賊之禍。此春秋所以垂戒也。隱公四年。春王二月。春秋曰。戊申。衛州吁弑其君完。是年又曰。秋。翬帥師會宋公陳侯蔡人。

衛人伐鄭。蓋州吁弑君自立而魯宋陳蔡承認州吁而助之也。公羊傳曰：「翬者何？公子翬也。何以不稱公子？貶。曷為貶？與弑公也。」至隱公十一年，春秋曰：「冬十有一月壬辰，公薨。」蓋翬已弑隱公矣。僅逾一年，桓公二年，春秋曰：「春，王正月戊申，宋督弑其君與夷。」蓋宋公又被弑矣。桓公六年，秋八月，春秋曰：「蔡人殺陳佗。」陳佗者，陳君也。謂之陳佗，絕之也。佗之罪，據左傳以為桓公五年殺太子免而自立，據公羊傳則以為外淫于蔡，蔡人殺之。佗殆兩罪俱發，亂而且淫，而二傳各述其一也。是知黨弑君之賊者，其國必有亂臣。自隱公四年至桓公六年，前後十四年，魯宋陳皆發生篡弑之禍，則以黨衛州吁之為之也。文公元年，春秋曰：「冬十月丁未，楚世子商弑其君髡。」何注曰：「言世

子者甚惡世子弑父之禍也不言其父言其君者君之於世子有父之親有君之尊言世子者所以明有父之親言君者所以明有君之尊又責臣子當討賊也商臣竊國以後諸侯未有與盟會者獨蔡莊侯首之同惡相濟道之猾夏文公十年春秋曰楚子蔡侯次于屈貉惡蔡之黨惡也其後莊侯之孫景侯卒為其子所弑襄公三十年春秋曰夏四月蔡世子般弑其君固春秋於商臣之弑父尚日之而此不日者楚是夷狄故忍言其日蔡是中國故不忍言其日深為隱痛之也春秋二百四十二年之間子弑父者唯商臣與般是知黨弑父之賊者其國必有賊子蓋聞見既熟漸染成風其禍有必至也孔子列而書之使知國際問題最重道德若徒以政治之便宜為援助之

根據則不獨負黨惡之罪且有自及之禍也

三 凡諸侯有屬長連帥卒正州伯州中有作亂者則長帥正伯當征之不征則與同惡當春秋時天下散亂保伍壞敗雖不誅不為成亂惟始以討亂為名終以受賂為實則春秋責其成亂雖尊親不諱矣桓公二年正月宋公馮與督弑其君與夷而立諸侯會于稷欲共誅之惟桓公本亦弑隱而立同惡相長於是為齊侯陳侯鄭伯計數至日以責宋賂故春秋書之曰三月公會齊侯陳侯鄭伯于稷以成宋亂夏四月取郕大鼎于宋戊申納于大廟以者內為志焉爾公為志乎成是亂也成亂大惡也內大惡而不諱者賤桓也桓內弑其君外成人之亂受賂而退以事其祖非禮也其道以周公為弗受也郕

鼎者部之所為也。曰宋取之宋也。以是為討之鼎也。公羊傳穀梁傳

四 凡為惡而事畢受賂者比受賂而為惡者罪減一罪等桓公五年

冬公會陳人宋人陳人蔡人伐衛納衛侯朔犯天子之命罪已大矣

六年六月朔入于衛後遣人以寶物賂齊齊侯推功歸魯使衛人持

寶來春秋書曰冬齊人來歸衛寶衛人歸之而稱齊人者明齊當以

讓除惡也主書者極惡魯犯命復貪利也不為大惡者納朔本不以

賂行事畢而見謝耳故與桓公二年取部大鼎于宋以成宋亂者不

同也春秋之義最惡貪利故齊不受賂則以讓除惡魯既受賂則於

本惡外復加貪利之惡

五 凡篡成者春成秋與使當父死子繼兄死弟及之辭其不成者不

與當此承認與不承認之別也。篡已成者，雖非子繼弟及，亦止得與之。故莊公九年，齊小白入于齊，篡辭也。十三年，公會齊侯盟于柯，僖公十七年，齊侯小白卒，成為君，辭也。隱公四年，衛人立晉，篡辭也。八年，宋公衛侯遇于垂桓，公十二年，衛侯晉卒，成為君，辭也。此事之無可如何，不得不成之為君者也。若王猛則異是矣。昭公二十二年，秋，劉子單子以王猛入于王城，篡辭也。然猛未悉得京師，未得成王，又外之，未踰年君，三者皆春秋所不當卒。故書曰：王子猛卒。卒又名者，雖得位而不與使當成為君也。此不合承認者也。

十 州伯二伯

一 凡州伯之制，於州內選一賢侯使長一州，非於州外別立一長。

以為州牧也。九州而八伯者，王畿之州不置伯，有鄉遂之吏主之也。然州伯之制，決不至外重內輕。蓋天子使其大夫為三監，監於方伯之國，國三人，八伯共二十四人，所以佐方伯，領諸侯也。其祿視諸侯之卿，其爵視次國之君，其祿取之於方伯之地。王制曰：千里之設，方伯五國以為屬，屬有長十國，以為連，連有帥三十國，以為卒，卒有正二百一十國，以為州，州有伯八州八伯，五十六正，百六十八帥，三百三十六長。八伯各以其屬屬於天子之老二人，分天下以為左右曰二伯。

二 凡二伯之制，以天子之三公兼任之。周召之分陝是已。公羊傳：隱公五年，王者已有州伯，所以復設二伯者，欲使三歲而黜陟也。分

職而授政。欲其亟成也。分東西不分南北者。欲令同有陰陽寒暑之節。共法度也。每州二伯百一十國。八州共一千六百八十國。二伯從國中分東西治之。則一伯得八十四百國矣。百虎通考二伯之職。唐虞時曾設四伯。即四岳是也。四伯則分主四方。二伯則分主東西。此尚書春秋之異制。其或文質之異尚也歟。

十一 霸

一 凡以德言之。則貴王而賤霸。王霸之德。何以分。先自治而後治人者。王也。未能自治。而其力既能治人。因假仁義道德。以為治人之具者。霸也。孟子曰。以力假仁者霸。霸必有大國。以德行人者王。王不待大。以力服人者。非心服也。力不贍也。以德服人者。中心悅而誠服。

也。又曰：堯舜性之也，湯武身之也，五霸假之也。（第三及第十三）此之謂也。孟子又曰：仲尼之徒，無道桓文之事者。（第二）荀子第七及春秋繁露第三十二皆曰：仲尼之門，五尺之童子，言羞稱五伯，賤其德也。昔管仲相桓公，霸諸侯，功烈甚盛，而孔子譏之曰：管仲之器小哉。論語第三楊雄曰：大器其猶規矩準繩乎？先自治而後治人之為大器。法言第九是故誠意正心修身，規矩準繩也。所謂自治也。齊家治國平天下，所謂治人也。先誠正修而後齊治平，則孔子所謂大器也。故王者內聖外王之謂也。霸者內不能聖而外似於王之謂也。此春秋所以貴王而賤霸也。

二 凡以功言之，則尊王而亦與霸。白虎通曰：昔三王之道衰，而五

霸存其政。帥諸侯朝天子。正天下之化。興復中國。攘除四夷。狄故謂之霸也。又曰。霸者伯也。行方伯之職。會諸侯朝天子。不先人臣之義。故聖人與之。非明王之法。不張霸猶迫也。把也。迫脅諸侯。把持王政。蓋霸王無異道。若德同於王。而位終於霸者。或亦以霸言之。如大戴禮孔子三朝記。言周昌霸諸侯以朝佐紂。第七十六則文王且謂之霸矣。此例外者也。要而言之。霸者之德。本雜而不醇。其位亦不為天子。然其事功烜赫。且文之以道德。實為當時及後世所利賴。故孔子作春秋。褒齊桓。懿晉文。歎管仲之功。誠救時之道也。匪風之詩曰。顧瞻周道。中心怛兮。傷天下之無王也。下泉之詩曰。四國有王。邠伯勞之。傷天下之無霸也。焦氏易林曰。下泉苞糧。十年無王。邠伯遇時。憂

念周京。蓋周厲王流竄之世。天下無王。而郇伯述二伯之職。勞來於外。使四國有王事也。此霸功之足貴也。

昭公十六年。春秋曰。春。齊侯伐徐。左傳曰。二月丙申。齊師至于蒲隧。徐人行成。徐子及邾人莒人會齊侯盟于蒲隧。賂以甲父之鼎。叔孫昭子曰。諸侯之無伯害哉。齊君之無道也。興師而伐。遠方會之。有成而還。莫之亢也。無伯也乎。夫此言無伯之害也。

三。凡上無天子。則伯功可貴。雖非受命之伯。而既能得眾。春秋以伯事授之。莊公十三年。春秋曰。春。齊人宋人陳人蔡人邾人會于北杏。穀梁傳曰。是齊侯宋公也。其曰人何也。始疑之。何疑焉。桓非受命之伯也。將以事授之者也。曰可矣乎。未乎。舉人眾之辭也。蓋春秋將

以伯事授齊桓公。而以其非受命之伯。未可即授。故先作疑之之辭。於其始。舉人以明之人者。眾辭也。齊侯從眾辭。則隱其為伯之迹。宋陳蔡邾之君從眾辭。則不為從伯之文。所謂外寮一疑之也。所以必先疑之者。春秋與人不一而足。以漸進之也。十六年。又曰。冬十有二月。會齊侯宋公陳侯衛侯鄭伯許男曹伯滑伯滕子同盟于幽。穀。梁傳曰。同者有同也。同尊周也。不言公。外內寮一疑之也。蓋春秋之文。於外寮則北杏稱人以一疑之。於內寮則此不言公。以一疑之。外謂宋陳蔡邾。內謂魯。其於齊皆寮也。一疑之而不復見者。取足明義而已。二十七年。又曰。夏六月。公會齊侯宋公陳侯鄭伯同盟于幽。穀。梁傳曰。同者有同也。同尊周也。於是而後授之諸侯也。其授之諸侯何。

也。齊侯得眾也。桓會不致安之也。桓盟不日信之也。信其信仁其仁。衣裳之會十有一。未嘗有敵血之盟也。信厚也。兵車之會四。未嘗有大戰也。愛民也。蓋春秋於十三年從外以疑之。十六年從內以疑之。故為將授未授之辭。至是而後授之諸侯也。授之者謂外序爵內稱公也。授之諸侯者。即以伯事授之也。此時齊桓尚未受王命。然既能得眾。春秋即以伯事授之。此以見能得眾者。即為春秋所與。而宜其為諸侯之盟主也。再言同尊固者。著齊之功也。春秋以會為危。故書公至自會以喜其安。乃桓會皆不致安於桓也。春秋於盟之不信者。書日。乃桓盟皆不日。信桓也。前於外內寮各一疑之。今日信之。始疑而終信也。所謂信其信也。論語載孔子之言曰。桓公九合諸侯。不以

兵車管仲之力也。如其仁。如其仁。第十四。所謂仁其仁也。衣裳之會十有一。即莊公十三年會北杏。十四年會鄆。十五年又會鄆。十六年會幽。二十七年又會幽。僖公元年會榿。二年會櫓。三年會陽穀。五年會首戴。七年會寧母。九年會葵丘。是也。論語謂九合諸侯者。據所會之地言之。合二鄆為一。二幽為一耳。其實與穀梁按會分計同也。兵車之會四。則僖公八年會洮。十三年會鹹。十五年會牡丘。十六年會雅。是也。夫以衣裳之會十有一。而兵車之會僅四。則其愛民而不好戰可知矣。故孔子稱其仁也。乃至兵車之會。諸侯畢至。武力雄厚。而仍未嘗有大戰焉。則其他之獨自侵伐者。其無大戰益不必言矣。無大戰。故春秋仁其仁也。無敵血之盟。故春秋信其信也。始於信而

終於仁。此國際之道德。而霸王之道也。能信能仁。則衆人歸之。而大者以王。小者以霸矣。夫以齊桓之霸。而並非以大戰得之。可見得衆之道。固在彼。不在此。而中國人之貴平和。自來古以來。其天性也。

十二 王義

隱公元年。公羊傳曰。何言乎王正月。大一統也。春秋所以大一統者。六合同風。九州共貫也。漢書第七十二此春秋尊王之義也。

孔教注重大同。故孔子曰。今天下。車同軌。書同文。行同倫。禮記中庸夫孔子之時。禮壞樂崩。家殊國異。安得有同軌同文同倫之事。其言此者。即所以表其理想中之天下。言苟得位以行其教。則雖今之天下。亦可至如此耳。故春秋之所以尊王者。欲使王者一統乎天下。而

致天下於大同也。

一 凡改元立號之事。惟王者得為之。當春秋時。諸侯各自紀元於其國中。如桓公二年。左傳所謂惠之二十四年。惠之三十年。惠之四十五年。皆魯惠之紀年也。自孔子作春秋。削諸侯之權。著大一統之義。乃創惟王者然後改元立號之制。春秋託王於魯。以隱公為始受命王。故假之以改元之權。若時至今日。則惟我孔子。文王之文。萬世常在。素王之號。萬世常尊。新王之法。萬世常新。故紀元當以孔子為主。庶簡而易知。大一統也。昔司馬遷作史記。十二諸侯年表。則自共和以訖孔子。仲尼弟子列傳。則於諸弟子每曰少孔子若干歲。魯世家固書孔子生卒。而周本紀及燕陳衛晉鄭五世家。皆特書孔子卒。

老子韓非列傳。且大書曰。自孔子死之後百二十九年。皆以孔子紀年之義也。若夫號者。即朝代之名。如夏殷周是也。孔子託王於魯。以春秋當新王而繼周。即立號之義也。後世稱孔子之教曰儒教。曰孔教。亦其教統之號也。蓋孔子固王者也。後王有作。其亦遵用孔子之紀元與教號斯可矣。

二 凡僭王號者當誅。吳楚僭王。故春秋於吳楚之君不書葬。辟其號也。絕其葬以明誅。言當膺顯戮也。公羊傳宣公十八年。

三 孔子理想之王。雖不可得見。而統治權究不可不出於一。以滅殺手兵爭。孔子曰。天下有道。則禮樂征伐自天子出。天下無道。則禮樂征伐自諸侯出。自諸侯出。蓋十世希不失矣。自大夫出。五世希不失。

矣。陪臣執國命。三世希不失矣。論語第十六。蓋一國之大權當統於最尊者。然後能久。若較卑者竊奪之。則更卑者將又竊奪之。如此輾轉遞移。司權者均不能久而無定主。則戰爭之禍烈矣。

孔子之制。惟天子得有兵權。自天子一人以外。皆無兵權者也。是故王制曰。諸侯賜弓矢。然後征。賜鈇鉞。然後殺。然則諸侯不上承天子之命。即不得稱兵。以為征人殺人之事矣。孟子曰。征者上伐下也。敵國不相征也。第十四此言征伐之事。惟天子得為之。其餘諸侯。悉皆敵體而平等。不得相征也。夫以舉國之大。而兵權乃萃集於一人。其他之稱兵者。皆有名義以抑制之。則其戰禍之滅。比之諸侯得自由相攻誠者不可以道里計矣。此孔教之所以大有造於中國之和平。

者也。

孔子之時，不獨征伐自諸侯出，自大夫出，實已是陪臣執國命之時。夫至於陪臣執國命，則擅兵柄者益多，而戰禍益烈，故孔子五十四歲為政於魯，因大夫有宰吏數叛之患，特倡家不藏甲，邑無百雉之城之義以治之。百雉之城者，凡周十一里三十三步二尺，公侯之制也。孔子以為陪臣執國命，未長數叛者，坐邑有城池之固，家有甲兵之藏，故也。乃使子路為季氏宰，墮三家之都，並收其甲兵，以強公室而除兵患。此孔子集權以弭兵之實政也。（公羊傳定公十二年）

四 凡王室有亂，諸侯當救之，此為尊尊之義。君臣上下之道，若不肯救王，是為夷狄。（公羊傳注昭公二十三年）

五 凡王室微弱不能自城京師而諸侯城之則春秋善之昭公三十二年春秋曰冬仲孫^何仲忌會晉韓不信齊高張宋仲幾衛大叔申鄭國參曹人莒人邾人杞人小邾人城成周穀梁傳曰天子微諸侯不享覲天子之在者惟祭與號故諸侯之大夫相帥以城之此變之正也何^休注曰書者喜^起時善其修廢職有尊尊之意也

六 凡王者不當親自用兵桓公五年春秋曰蔡人衛人陳人從王伐鄭何注云稱人者刺王者也天下之君海內之主當秉綱撮要而親自用兵故見其微弱僅能從微者不能從諸侯又定公十二年春秋曰公至自圍[●]成注云天子不親征下土諸侯不親征叛邑公圍成不能服不能以一國為家故危錄之疏引公羊說云一國叛王自征

之若四國皆叛安得四王而征也由此觀之天子以天下為家故不當親征叛國諸侯以國為家故不當親征叛邑一言蔽之境内不親征而已王者無外故凡為王者無親自用兵之道也命方伯致討而已矣惟有謀危社稷者則天子亦得親征之以為王者乃天之所立今謀危社稷應受天誅故自出征之所以重天命也百虎通

凡叛天子之命則當征僖公十五年春秋曰秋七月齊師曹師伐厲厲者何葵丘之會叛天子之命者也月者善錄義兵

八 凡諸侯得於天子則誅勿令其交連與國興兵犯命桓公十六年春秋曰衛侯朔出奔齊明天子當及是時早誅之則一使可致一夫可誅乃聽其託疾不就罪緩令交連齊魯宋陳蔡五國之兵伐天

子所立之衛君而復入衛以篡位則失刑之所致也故春秋於莊公六年王子突救衛不曰王子突而曰王人子突所以諱之也凡有罪不當失刑失刑則兵禍起矣

九 凡不奉王命者當並絕其國成公十二年春秋曰春周公出奔晉公羊傳曰周公者何天子之三公也王者無外此其言出何自其私土而出也何注曰私土者謂其國也此起諸侯入為天子三公也周公驕蹇不事天子出居私土不聽京師之政天子召之而出走明當并絕其國故以出國錄也不月者小國也

十 凡諸侯有從王征伐之義務桓公五年春秋曰蔡人衛人陳人從王伐鄭美三國諸侯之能得正義也是時天子微弱諸侯背叛莫

肯從王^者征伐而三國之君獨能尊天子守節死義故春秋美之詩衛
風曰伯也執殳為王前驅即言衛侯時為州伯而從王為前驅也
十一 凡諸侯從王^征伐則有功雖大夫可敵諸侯^秋春成公二年公
羊傳曰曹無大夫公子手何以書憂內也何注云春秋託王于魯因
假以見王法明諸侯有能從王者征伐不義克勝有功當褒之故與
大夫大夫敵君不貶者隨從王者大夫得敵諸侯也按春秋之義大
夫不敵君今經曰季孫行父臧孫許叔孫僑如公孫嬰齊帥師會晉
卻克衛孫良夫曹公子手及齊侯戰于鞏是許諸大夫得敵齊侯也
所以然者因託王于魯故也又魯侯於此役並非親行惟使四大夫
將兵而春秋以曹公子手為從王然則所謂從王者非必王親征然

後謂之從王也。凡從王者之師，即得謂之從王矣。何也？王無親征之道也。

十二 凡王者之兵，有征而無戰，言莫敢校也。漢書第六十四。故春秋託王於魯，不以敵辭言之，所以彊王義也。公羊傳注隱公十年，蓋征者上伐下之辭，而戰者敵國相攻之辭，故王師不言戰，言戰即為敗。^秋春成於公元年，書曰：王師敗績于貿戎，雖言敗，猶不言戰，又不言晉敗之，蓋謂王者無敵，莫敢當也。故使若不戰而自敗于貿戎，然不日月者，深正其義，使若不戰也。是故誠為王者，宜無敵於天下，蓋其仁厚，其德美，天下賓服，莫敢受交也。鹽鐵論第四十七。

十三 凡諸侯之兵，不得與王師相抗。莊公五年，春秋曰：公會齊人。

宋人陳人蔡人伐衛。公羊傳曰：此伐衛何？納朔也。曷為不言納衛侯朔？辟王也。蓋其下六年即書王人子突救衛也。穀梁傳曰：是齊侯宋公也。其曰人何也？人諸侯所以人公也。其人公何也？逆天王之命也。公羊傳又釋六年公至自伐衛之經曰：衛侯朔入于衛，何以致伐？不敢勝天子也。蓋春秋之義，不與諸侯之敵天子，故雖勝而不與其勝也。

十四 凡諸侯不得伐天子之邑。宣公元年春秋曰：晉趙穿帥師侵柳。公羊傳曰：柳者何？天子之邑也。曷為不繫乎周？不與伐天子也。又昭公二十三年春秋曰：晉人圍郊。公羊傳曰：郊者何？^天子之邑也。曷為不繫于周？不與伐天子也。蓋孔子不許諸侯伐天子，故使柳與郊若

與周無關繫者而趙穿之侵柳及晉人之圍郊不過諸侯自相攻伐耳此春秋隱其事實以明義者也

十五 凡天子所立者諸侯不得伐之莊公三年春秋曰春秋王正月溺會齊師伐衛公羊傳曰溺者何吾大夫之未命者也何注云月者衛朔背叛出奔天子新立衛公子留齊魯無憚天子之心而伐之故明惡重於伐故月也蓋伐例時而今月者以其伐天子所立罪加一等也

卷第九 和平要旨

一 讓

孔子以和平為主故以讓為首德蓋君興讓則息兵臣興讓則息貪庶民興讓則息訟故天下莫不亂於爭而治於讓也

孔子曰君子辭貴而不辭賤辭富而不辭貧則亂益亡又曰觴酒豆肉讓而受惡民猶犯齒衽席之上讓而坐下民猶犯貴朝廷之位讓而就賤民猶犯君詩云民之良無相怨一方受爵不讓至于已斯亡又曰君子貴人而賤己先人而後己則民作讓故稱人之君曰君自稱其君曰寡君禮記坊記凡此皆言辭讓之道所以免於爭亂之禍也

祭義曰天子有善讓德於天諸侯有善歸諸天子卿大夫有善薦於

諸侯士庶人有善本諸父母存諸長老祿爵慶賞成諸宗廟所以示順也此言凡有善皆讓於尊上以示敬順不敢自專所以為和而不爭之道也

論語秦伯一章篇其首章曰秦伯其可謂至德也已矣三以天下讓民無得而稱焉其篇末十八十九二十二十一四章皆論堯舜禹文王之事此四君者皆讓天下者也其十八章曰巍巍乎舜禹之有天下也而不與焉夫有天下而不與則其讓而不爭可見矣其二十章之末節歎美文王之讓德曰三分天下有其二以服事殷周之德其可謂至德也已矣其末章曰禹吾無間然矣非飲食而致孝乎鬼神惡衣服而致美乎黻冕卑宮室而盡力乎溝洫禹吾無間然矣夫世

之樂乎為君而以爭國爭天下為事者大抵貪慕富貴權利耳若如禹之菲飲食惡衣服卑宮室則誠何樂乎為君至於孝鬼神則盡力於宗教美黻冕則盡力於朝政治溝洫則盡力於民事誠如是則為君者亦甚勞矣薄於自奉而勞於利人誠所謂有天下而不與者也故墨子之教節用而兼愛以禹為家宗誠哉其可宗也孔子以為無間亦推崇之至矣故人誠能以禹為法則必不利天下不期其讓而讓自生必無戰爭戰之事也泰伯一篇以泰伯始以禹終所以明孔子之貴讓也蓋禹雖由啟繼世而禹之薦益實與堯薦舜舜薦禹無異故禹亦讓天下者也

尚書以堯舜始春秋以文王始以堯舜終又託始於隱公此皆孔子

之貴讓也。

春秋之讓國者七人。魯隱公與宋繆公雖有讓德而攝國太久致其後有篡弑之禍。此美中不足者也。然春秋究以隱公為賢故不書即位以成其讓意。且除元年外皆不書正月以明其始終皆讓國之心。隱公元年及十一年繆公死而廢子以反國於兄子。春秋亦美其得正故於其子宋莊公之弑君則諱之又計繆公之讓除莊公之篡而書莊公之葬所以彰繆公之讓也。桓公二年莊公三年其他之讓國者五人則純乎讓者矣。一曰蔡季。桓公十七年春秋曰六月丁丑蔡侯封人卒。秋八月蔡季自陳歸於蔡。何注曰稱字者蔡侯封人無子季次當立封人欲立獻舞而疾害季季辟之陳封人死。

歸反奔喪。思慕三年。卒無怨心。故賢而字之。

二曰衛叔武。僖公二十八年。晉文公逐衛侯鄭而立其弟叔武。叔武辭立而他人立。則恐衛侯之不反也。故先立而後為踐土之盟。治反衛侯。衛侯得反。曰叔武篡我。竟殺之。春秋知叔武本無即位之意。故於踐土之盟。不曰衛侯而曰衛子。且順其欲兄饗國之心。而諱衛侯殺弟之罪。不使彼因殺弟而得罪也。

三曰曹喜時。成公十三年。曹伯廬卒于師。其弟喜時當立。而其庶兄負芻篡之。喜時逡巡而退。成公十五年。晉侯執曹伯歸于京師。為篡其喜時也。明年。春秋書曰。曹伯歸自京師。公羊傳曰。執而歸者名。曹伯何以不名。而不言復歸于曹。何易也。其易奈何。公子喜時在內也。公

子喜時在內則何以易公子喜時者仁人也內平其國而待之外治諸京師而免之其言自京師何言甚易也舍是無難矣何注曰執歸書者賢喜時為凡所篡終無怨心而復深推精誠憂免其難非至仁莫能行之故書起其功也昭公二十年春秋曰夏曹公孫會自鄆出奔宋公羊傳曰奔未有言自者此其言自何畔也畔則曷為不言其畔為公子喜時之後諱也蓋喜時本正當立有明王興當還其國其功不止足以除會之畔而已

四曰吳季札襄公二十九年春秋曰吳子使札來聘公羊傳曰吳無君無大夫此何以有君有大夫賢季子也何賢乎季子讓國也其讓國奈何謁也餘祭也夷昧也與季子同母者四季子弱而才凡弟皆

愛之同欲立之以為君。謁曰：「今若是迫而與季子國，季子猶不受也。請毋與子而與弟。」無弟兄迭為君而致國乎季子，皆曰：「諾。」故諸為君者皆輕死為勇，飲食必祝曰：「天苟有吳國，尚速有悔於予身。」故謁也死，餘祭也立，餘祭也死，夷昧也立，夷昧也死，則國宜之季子者也。季子使而亡焉，僚者長庶也，即之季子使而反，至而君之。爾闔廬曰：「先君之所以不與子國而與弟者，凡為季子故也。將從先君之命與？則國宜之季子者也。如不從先君之命與？則我宜立者也。」僚惡得為君乎？於是使專諸刺僚而致國于季子。季子不受，曰：「爾弑吾君，吾受爾國，是吾與爾為篡也。爾殺吾兄，吾又殺爾，是父子兄弟相殺，終身無已也。去之延陵，終身不入吳國。」故君子以其不受為義，以其不殺為仁。

賢季子則吳何以有君有大夫以季子為臣則宜有君者也。札者何。吳季子之名也。春秋賢者不名。此何以名。許夷狄者不一而足也。季子者所賢也。曷為不足乎季子。許人臣者必使臣。許人子者必使子也。春秋於昭公二十七年書曰。夏四月。吳弑其君僚。何注曰。不書闔廬弑其君者。為季子諱。明季子不忍父子兄弟自相殺。讓國闔廬。欲其享之。故為沒其罪也。

五曰邾叔術。春秋之前。邾顏公有罪。天子誅顏公而立其弟叔術。及誅顏之天子死。叔術致國于顏之子夏父。孔子以亂世爭奪之風最盛。欲以讓救之。故不追治其犯王命之罪。而反貴其讓國之功。通其所封濫邑。比之列國。昭公三十一年。春秋曰。冬。黑弓以濫來奔。黑

弓者叔術之裔也。春秋不繫黑弓于邾。通濫為國。以明賢者子孫宜有地之義。且以沒黑弓奔叛之罪。所謂善善及子孫也。蓋叔術罪不足而功有餘。故孔子賢之也。

司馬遷作史記。世家首吳泰伯。列傳首伯夷。蓋泰伯讓天下。伯夷讓國。此孔子貴讓之義也。

二 文德

孔子以均和安為治天下國家之至德。要道均和安者。即所謂文德也。能均和安。則自無貧富^寡傾危之患。而邦內必無分崩離析之憂。雖遠人不服。亦可以懷來之。而安寧之矣。此文德之義^主。所以無須乎武力也。昔季氏將伐顓臾。冉有季路為其臣而不能制其悖心。乃欲藉

大聖之言以救斯弊特見孔子而告之孔子乃發明大義以酬來感
宏舉治體以救時艱其後伐顓臾之事卒因孔子之言而中止斯亦
孔子弭兵之實蹟也孔子之言曰丘也聞有國有家者不患寡而患
不均不患貧而患不安蓋均無貧和無寡安無傾夫如是故遠人不
服則脩文德以來之既來之則安之今由與求也相夫子遠人不服
而不能來也邦分崩離析而不能守也而謀動干戈於邦內吾恐季
孫之憂不在顓臾而在蕭牆之內也孔子之所謂文德即均安和之
事能脩文德則遠人自來焉用兵哉此即葉公問政而孔子告以近
者悅遠者來之義也論語第十六第十三亦即春秋繁露所謂親近
遠來同民所欲之義也第十三

凡不先脩文德以來之而便用兵征伐無論國內國外春秋皆惡之
僖公六年春秋曰夏公會齊宋公陳侯衛侯曹伯伐鄭圍新城公羊
傳曰邑不言圍此其言圍何彊也何注曰惡桓公行霸彊而無義也
鄭背叛本由桓公過陳不以道理當先脩文德以來之而便伐之彊
非所以附䟽此用兵國外之罪也成公三年春秋書圍棘昭公元年
書取運二十六年書圍成皆惡其不先脩文德以來之也此用兵國
內之罪也

昭公二十五年九月公為季氏所逐孫于齊十二月齊侯取運以居
公明年三月公至自齊居于運夏公圍成春秋書圍成者何注曰惡
公失國幸而得運不脩文德以來之復擾其民圍成二十九年冬十

月運潰。何注曰。孔子曰。不患寡而患不均。不患貧而患不安。其本乃由于圍成。失大得小。而不能節用。蓋孔子之道。不患土地人民之寡。少而患政令之不均平。不患國無儲積。而患君臣上下之不能相安。今昭公政令失所。是以出奔。乃居小地。而復圍成。擾亂其民。令之不安。由茲潰散。無寸土可居。久不得國。而卒於外者。身自取之也。失魯之大。而得運邑。故曰失大得小。不能自節約而用之。乃復擾亂其民。以運成。此潰運之本也。夫昭公失去大國。藉強鄰之力。僅得小邑而居之。窮困極矣。乃孔子猶罪其不能節用。不能脩德。而以其圍成為擾民。夫至於本國之叛邑。猶不當圍。失國而居邑。猶不患貧寡。則孔子崇尚和平而禁攻戰。可謂至矣。昭公不知此義。乃並運而潰之。蓋

不脩德而用兵其禍如此此春秋所以垂戒也

子路持劍孔子曰君子以忠為質以仁為衛不出環堵之內而聞千里之外不善以忠化寇暴以仁圍何必持劍乎子路曰由也請攝齊以事先生矣說苑卷五此任德不任力之義也

孔子五十九歲孔子在衛衛靈公問陳於孔子孔子對曰俎豆之事則嘗聞之矣軍旅之事未之學也明日遂行論語第十五此孔子賤兵而重禮之事實也一言不合即立去國之志孔子之惡兵可謂至矣

孔子六十八歲時又在衛孔文子將攻大叔訪於孔子孔子曰胡簋之事則嘗學之矣甲兵之事未之聞也退命駕而行曰鳥則擇木

木豈能擇鳥。文子遽止之。曰。圉豈敢度其私。訪衛國之難也。將止魯人以幣召之。乃歸。左傳哀公十一年。孔子之答孔文子。與答衛靈公大同。皆重禮而賤兵。欲以禮代兵者也。俎豆。胡簋。皆禮器。欲弭兵者。唯禮可以已之也。

文德主義。固為孔子所發明。然亦不始於孔子。乃中國歷古相傳之治術也。諸子之論。雖多寓言。然終不能絕無根據。韓非子曰。當舜之時。有苗不服。禹將伐之。舜曰。不可。上德不厚而行武。非道也。乃脩教三年。執干戚舞。有苗乃服。淮南子曰。禹執干戚舞於兩階之間。而三苗服。此舜禹脩文德以來遠人之故事也。僖公十九年。左傳曰。宋人圍曹。討不服也。子魚言於宋公曰。文王聞崇德亂而伐之。軍三旬而

不降。退脩教而復伐之。因壘而降。詩曰。刑于寡妻。至于兄弟。以御于家邦。今君德無乃猶有所闕。而以伐人。若之何。蓋姑內省德乎。無闕而後動。此文王先德後兵之故事也。

孔子前四百一十五年。穆王將征犬戎。祭公謀父諫曰。不可。先王耀德不觀兵。夫兵戢而時動。動則威。觀則玩。玩則無震。是故周文公之頌曰。載戢干戈。載櫜弓矢。求我懿德。^求肆于時夏。允王保之。先王之於民也。懋正其德。而厚其性。阜其財求。而利其器用。明利害之鄉。以文修之。使務利而避害。懷德而畏威。故能保世以滋大。昔我先王世后稷。以服事虞夏。及夏之衰也。棄稷不務。我先王不窋用失其官。而自竄於戎狄之間。不敢怠業。時序其德。纂脩其緒。修其訓典。朝夕恪勤。

守以敦篤奉以忠信奕世載德不忝前人至於武王昭前之光明而
加之以慈和事神保民莫弗欣喜商王帝辛大惡於民庶民不忍欣
戴武王以致戎於商牧是先王非務武也勤恤民隱而除其害也夫
先王之制邦內甸服邦外侯服侯衛賓服夷蠻要服戎狄要服荒甸服者祭侯服
者祀賓服者享要服者貢荒服者王日祭月祀時享歲貢終王先王
之訓者也有不祭則脩意有不祀則脩言有不享則脩文有不貢則
脩名有不王則脩德序成而有不至則脩刑於是乎有刑不祭伐不
祀征不享讓不貢告不王於是乎有刑罰之辟有攻伐之兵有征討
之備有威讓之令有文告之辭布令陳辭而又不至則增脩於德而
無勤民於遠是以近無不聽遠無不服今自大畢伯士之終也大戎

氏以其職來王。天子曰：「予必以不享征之，且觀之兵。」其無乃廢先王之訓，而王幾頓乎？吾聞夫大戎樹惇，帥舊德而守終純固，其有以禦我矣。王不聽，遂征之，得四白狼、四白鹿以歸。自是荒服者不至。國語卷一

祭公謀父之言，皆脩文德以來遠人之義也。耀德不觀兵，此我中國所以自豪於世界者乎。

夫祭公謀父猶曰：「王之卿士也。」若倉葛為陽邑之民，而於孔子前八十四年，亦謂晉文公曰：「武不可覲，文不可匿，覲武無烈，匿文不昭。」國語卷二則亦耀德不觀兵之義也。是故重文德而輕武力，實為中國人之天性，無分於貴賤也。

兵之害人皆知之。若言簡而賅，則莫若魯大夫眾仲之言。孔子前一百六十八年，眾仲曰：夫兵猶火也，弗戢將自焚也。左傳：隱公四年，其言最警切矣。

孔子前四十六年，晉楚戰於郟。晉師敗績，楚師次于衡雍。潘黨言於楚子曰：君盍築武軍，而收晉尸，以為京觀。臣聞克敵必示子孫，以無忘武功。楚子曰：非爾所知也。夫文止戈為武。武王克商，作頌曰：載戢干戈，載櫜弓矢。我求懿德，肆于時夏，允王保之。又作武，其卒章曰：耆定爾功。其三曰：鋪時繹思，我徂維求定。其六曰：綏萬邦，屢豐年。夫武禁暴戢兵，保大定功，安民和眾，豐財者也。故使子孫無忘其章。今我使二國暴骨暴矣，觀兵以威諸侯，兵不戢矣。暴而不戢，安能保大，猶

有晉在焉。得定功。所達民欲猶多。民何安焉。無德而強爭諸侯。何以和眾。利人之幾。而安人之亂。以為己榮。何以豐財。武有七德。我無一焉。何以示子孫。其為先君宮告成事而已。武非吾功也。古者明王伐不敬。取其鯨鯢而封之。以為大戮。於是乎有京觀。以懲淫慝。今罪無所。而民皆盡忠。以死君命。又何以為京觀乎。祀于河。作先君宮。告成事而還。左傳宣公十二年。此莊楚莊王引詩以發明武德之言也。蓋雖曰武德。而實以文德為主體矣。

李克者。魏人。受詩於曾申。又為子夏弟子。魏文侯之居中山也。問於克曰。吳之所以亡者何也。對曰。數戰而數勝。文侯曰。數戰而數勝。國之福也。其獨以亡何故也。對曰。數戰則民罷。數勝則主驕。以驕主治。

罷民。然而國不亡者，天下鮮矣。驕則恣，恣則極物；罷則怨，怨則極慮。上下相^俱極，吳之亡猶晚矣。夫差之所以自頸於干遂也，此李克主張和平之學說也。

文德二字，孟子謂之仁政，或謂之王政，誠能行之，則可無敵於天下，而不用戰矣。謹述孟子之言如左。

梁惠王曰：晉國天下莫強焉，叟之所知也。及寡人之身，東敗於齊，長子死焉；西喪地於秦七百里；南辱於楚，寡人恥之，願比死者一洒之，如之何則可？孟子對曰：地方百里而可以王，王如施仁政於民，省刑罰，薄稅斂，深耕易耨，壯者以暇日脩其孝弟忠信，入以事其父兄，出以事其長上，可使制梃以撻秦楚之堅甲利兵矣。彼奪其民時，使不

得耕耨以養其父母。父母凍餓，兄弟離，妻子離，散彼陷溺其民。王往而征之，夫誰與王敵？故曰：仁者無敵。王請勿疑。孟子第二

萬章問曰：宋小國也，今將行王政，齊楚惡而伐之，則如之何？孟子曰：湯居亳，與葛為鄰。葛伯放而不祀，湯使人問之，曰：何為不祀？曰：無以供犧牲也。湯使遺之牛羊，葛伯食之，又不以祀。湯又使人問之，曰：何為不祀？曰：無以供粢盛也。湯使亳眾往為之耕，老弱饋食。葛伯率其民，要其有酒食黍稻者奪之，不授者殺之。有童子以黍肉餉，殺而奪之。書曰：葛伯仇餉，此之謂也。為其殺是童子而征之，四海之內皆曰：非富天下也，為匹夫匹婦復讎也。湯始征，自葛載，十一征而無敵於天下，東面而征，西夷怨；南面而征，北狄怨。曰：奚為後我？民之望之，若

大旱之望雨也。歸市者不止，芸者不變，誅其君，弔其民。如時雨降，民大悅。書曰：「後我后，后來其無罰。」有攸不為，臣東征，綏厥士女。篚厥玄黃，紹我周王。見休，惟臣附於大邑周。其君子實玄黃於篚，以迎其君子。其小人簞食壺漿，以迎其小人。救民於水火之中，取其殘而已矣。太誓曰：「我武維揚，侵于之疆，則取於殘，殺伐用張，於湯有光。」不行王政，云爾。苟行王政，四海之內，皆舉首而望之，欲以為君。齊楚雖大，何

畏焉第六

孟子曰：「有人曰：『我善為陳，善為戰。』大罪也。國君好仁，天下無敵焉。南面而征，北狄怨；東面而征，西夷怨。曰：『奚為後我？』武王之伐殷也，革車三百兩，虎賁三千人。王曰：『無畏，寧爾也。』非敵百姓也。若崩厥角稽首。」

征之為言正也。各欲正己也。焉用戰。第十四

荀子曰。兵革器械者。彼將日日暴露毀折之中原。我今將脩飾之拊循之。掩蓋之於府庫。貨財粟米者。彼將日日棲遲薛越之中野。我今將畜積并聚之於倉廩。材技股肱健勇爪牙之士。彼將日日挫頓竭之於仇敵。我今將來致之并閭之砥礪之於朝廷。如是則彼日積敝。我日積完。彼日積貧。我日積富。彼日積勞。我日積佚。君臣上下之間者。彼將厲厲焉。日日相離疾也。我今將頡頏焉。日日相親愛也。以是待其敝。安以其國為是者。霸。荀子第九

荀子曰。凡攻人者。非以為名。即以為我。利不然。則忿之也。仁人之用國。將脩志意。正身行。伉隆高。致忠信。期文理。布衣紉屨之士。誠是則

雖在窮閭漏屋而王公不能與之爭名以國載之則天下莫之能隱
匿也若是則為名不攻也者將辟田野實倉廩便備用上下一心三軍
同力與之遠舉極戰則不可境內之聚也保固視可午其軍取其將
若撥麴彼得之不足以藥傷補敗彼愛其爪牙畏其仇敵若是則為
利者不攻也將修小大強弱之義以持慎之禮節將甚文珪璧將甚
碩貨賂將甚厚所以說之者必將雅文辯慧之君子也彼苟有人意
焉夫誰能忿之若是則忿之者不攻也為名者否為利者否為忿者
否則國安於磐石壽於旗翼人皆亂我獨治人皆危我獨安人皆失
喪之我按起而治之故仁人之用國非特將持其有而已也又將兼
人詩曰淑人君子其儀不忒其儀不忒正是四國此之謂也

又曰持國之難易事強暴之國難使強暴之國事我易事之以貨寶則貨寶單而交不結約信盟誓則約定而畔無日割國之錙銖以賂之則割定而欲無厭事之彌煩其侵人愈甚必至於資單國舉然後已雖左堯而右舜未有能以此道得免焉者也辟之是猶使處女嬰寶珠佩寶玉負戴黃金而遇中山之盜也雖為之逢蒙視詘要撓膺君盧屋妾由將不足以免也故非有一人之道也直將巧繁拜請而畏事之則不足以為持國安身故明君不道也必將修禮以齊朝正法以齊官平政以齊民然後節奏齊於朝百事齊於官衆庶齊於下如是則近者競親遠方致願上下一心三軍同力名聲足以暴炙之威強足以捶笞之拱揖指揮而強暴之國莫不趨使譬之是猶鳥獲

與焦僥搏也。故曰事強暴之國難。使強暴之國事我易。此之謂也。第

十

臨武君與孫卿子議兵於趙孝王前。王曰。請問兵要。臨武君曰。上得天時。下得地利。觀敵之變動。後之發之。^先至此。用兵之要術也。孫卿子曰。不然。臣所聞古之道。凡用兵攻戰之本。在乎壹民。弓矢不調。則羿不能以中微。六馬不和。則造父不能以致遠。士民不親附。則湯武不能以必勝也。故善附民者。是乃善用兵者也。故兵要在乎善附民而已。臨武君曰。不然。兵之所貴者。執利也。所行者。變詐也。善用兵者。感忽悠闇。莫知其所從出。孫吳用之。無敵於天下。豈必待附民哉。孫卿子曰。不然。臣之所道。仁人之兵。王者之志也。君之所貴。權謀執利也。

所行攻奪變詐也。諸侯之事也。仁人之兵不可詐也。彼可詐者怠慢者也。路亶者也。君臣上下之間滑然有離德者也。故以桀詐桀猶巧拙有幸焉。以桀詐堯譬之若以卵投石。以指撓沸。若赴水火。入焉焦沒耳。故仁人上下百將一心。三軍同力。臣之於君也。下之於上也。若子之事父。弟之事兄。若手臂之扞頭目而覆胸腹也。詐而襲之。與先驚而後擊之一也。且仁人之用十里之國。則將有百里之聽。用百里之國。則將有千里之聽。用千里之國。則將有四海之聽。必將聰明警戒。和傳而一。故仁人之兵。聚則成卒。散則成列。延則莫若邪之長刃。嬰之者斷。兌則若莫邪之利鋒。當之者潰。闔居而方止。則若磐石然。觸之者角摧。案角鹿埴隴種東籠而退耳。且夫暴國之君。將誰與至。

哉彼其所與至者必其民也。而其民之親我歡父若父母其好我芬若椒蘭彼反顧其上則若灼黥若仇讎。人之情雖桀跖豈又肯為其所惡賊其所好哉。^者是猶使人之子孫自賊其父母也。彼必將來告之。又何可詐也。故仁人用國日明。諸侯先順者安。後順者危。慮敵之者削。反之者亡。詩曰。武王載發。有虔秉鉞。如火烈烈。則莫我敢遏。此之謂也。孝成王臨武君曰善。

請問王者之兵。設何道何行而可。孫卿子曰。凡在大王將率末事也。臣請遂道王者諸侯彊弱存亡之效。安危之勢。君賢者其國治。君不能者其國亂。隆禮貴義者其國治。簡禮賤義者其國亂。治者彊。亂者弱。是彊弱之本也。上足叩則下可用也。上不足叩則下不可用也。可

用者強不可用者弱是強弱之常也隆禮效功上也重祿貴節次也
上功賤節也下是強弱之凡也好士者強不好士者弱愛民者強不愛
民者弱政令信者強政令不信者弱民齊者強不齊者弱賞重者強
賞輕者弱刑威者強刑侮者弱械用兵革攻完便利者強械用兵革
窳櫛不便利者弱重用兵者強輕用兵者弱權出一者強權出二者
弱是強弱之常也齊人隆技擊其技也得一首者則賜贖鎰金無本
賞矣是事小敵毳則偷可也事大敵堅則渙焉離耳若飛鳥然傾側
反覆無日是亡國之兵也兵莫弱是矣是其去僨市傭而戰之幾矣
魏是氏之武卒以度取之衣三屬之甲操十二石之弩負服矢五十
个置戈其上冠軸帶劔贏三日之糧日中而趨百里中試則復其戶

利其田宅是數年而衰而末可奪也。改造則不易固也。是故地雖大其稅必寡。是危國之兵也。秦人其生民也陋。阮其使民也酷烈。刮之以執。隱之以阮。忸之以慶賞。繇之以刑罰。使其天下之民所以要^利於上者。非鬪無由也。阮而得^用之。得而後功之功。賞相長也。五甲首而隸五家。是最為衆彊。長久多地。以正故。四世有勝。非幸也。數也。故齊之技擊。不可以遇魏氏之武卒。魏氏之武卒。不可以遇秦之銳士。秦之銳士。不可以當桓文之節制。桓文之節制。不可以當湯武之仁義。有遇之者。若以焦熬投石焉。兼是數國者。皆干賞蹈利之兵也。傭徒鬻賣之道也。未有貴上安制。綦節之理也。諸侯有能微妙之以節。則作而兼殆之耳。故招近募選。隆詐^執尚功利。是漸之也。禮義教化。是齊之

也。故以詐遇詐，猶有巧拙焉。以詐遇齊，辟之猶以錐刀墮太山也。非天下之愚人莫敢試。故王者之兵不試。湯武之誅桀紂也，拱揖指麾而彊暴之國莫不趨使。誅桀紂若誅獨夫。故秦誓曰：獨夫紂，此之謂也。故兵大齊則制天下，小齊則治鄰敵。若夫招近募選，隆執詐，尚功利之兵，則勝不勝無常。代翁代張，代存代亡，相為雌雄耳矣。夫是之謂盜兵。君子不由也。故齊之田單，楚之莊蹻，秦之衛鞅，燕之繆蠆，是皆世俗之所謂善用兵者也。是其巧拙，強弱則未有以相君也。若其道一也，未及和齊也。掎契司詐，權謀傾覆，未免盜兵也。齊桓、晉文、楚莊、吳闔閭、越句踐，是皆和齊之兵也。可謂入其域矣。然而未有本統也。故可以霸而不可以王。是強弱之效也。孝成王臨武君曰：善。荀子

第十五

陳蠹問孫卿子曰先生議兵常以仁義為本仁者愛人義者循理然則又何以兵為凡所為有兵者為爭奪也孫卿子曰非女所知也彼仁者愛人故惡人之害之也義者循理循理故惡人之亂之也彼兵者所以禁暴除害也非爭奪也故仁人之兵所存者神所過者化若時雨之降莫不悅喜是以堯伐驩兜舜伐有苗禹伐共工湯伐有夏文王伐崇武王伐紂此四帝兩王皆以仁義之兵行於天下也故近者親其善遠方慕其德兵不血刃遠邇來服德盛於此施及四極詩曰淑人君子其儀不忒此之謂也

李斯問孫卿子曰秦四世有勝兵強海內威行諸侯非以仁義為之

也。以便從事而已。孫卿子曰：非女所知也。女所謂便者，不便之便也。吾所謂仁義者，大便之便也。^者彼仁義者，所以修政者也。政修則民親其上，樂其君，而輕為之死。故曰：凡在於君，將率末事也。秦四世有勝，認認然常恐天下之一合而軋已也。此所謂末世之兵，未有本統也。故湯之放桀也，非其逐之鳴條之時也；武王之誅紂也，非以甲子之朝而後勝之也。皆前行素修也。此所謂仁義之兵也。今女不求之本而索之於末，此世之所以亂也。

荀子曰：禮者治辨之極也，強國之本也，威行之道也，功名之摠也。王公由之，所以得天下也；不由，所以隕社稷也。故堅甲利兵不足以為勝，高城深池不足以為固，嚴令繁刑不足以為威。由其道則行，不由

其道則廢。楚人鮫革犀兕以為甲，鞬如金石，宛鉅鐵鉞，慘如蠱蠱，輕利慄慄，卒如飄風。然而兵殆於垂沙，庚茂死，莊躋起，楚分而為三四。是豈無堅甲利兵也哉？其所以統之者非其道故也。汝潁以為險，江漢以為池，限之以鄧林，緣之以方城。然而秦師至而鄢郢舉，若振槁然。是豈無固塞隘阻也哉？其所以統之者非其道故也。紂剗比干，囚箕子，為炮烙刑，殺戮無時。臣下懍然，莫必其命。然而周師至而令不行乎下，不能用其民。是豈令不嚴，刑不繁也哉？其所以統之者非其道故也。古之兵，戈矛弓矢而已矣。然而敵國不待試而詘，城郭不辨，溝池不拙，固塞不樹，機變不張。然而國晏然不畏外，而明內者，無他故焉。明道而分鈞之時，使而誠愛之下之和上也。如影響，有不由令。

者然後誅之以刑故刑一人而天下服罪人不郵其上知罪之在己也是故刑罰省而威流無他故焉由其道故也古者帝堯之治天下也蓋殺一人刑一人而天下治傳曰威厲而不試刑錯而不用此之謂也

又曰凡兼人者有三術有以德兼人者有以力兼人者有以富兼人者彼貴我名聲美我德行欲為我民故辟門除涂以迎吾入因其民襲其處而百姓皆安法立法施令莫不順比是故得地而權彌重兼人而兵俞強是以德兼人者也非貴我名聲也非美我德行也彼畏我威劫我勢故民雖有離心不敢有畔慮若是則戎甲俞衆奉養必費是故得地而權彌輕兼人而兵俞弱是以力兼人者也非貴我名

聲也。非美我德行也。用貧求富。用飢求飽。虛腹張口。來歸吾食。若是則必發夫掌筭之粟。以食之。委之財貨。以富之。立良有司。以接之。己暮三年。然後民可信也。是故得地而權彌輕。兼人而國俞貧。是以富兼人者也。故曰。以德兼人者王。以力兼人者弱。以富兼人者貧。古今一也。

又曰。兼并易能也。唯堅凝之難焉。齊能并宋而不能凝也。故魏奪之。燕能并齊而不能凝也。故田單奪之。韓之上地方數百里。完全富足。而趨趙。趙不能凝也。故秦奪之。故能并之而不能凝之。則必奪。不能并之又不能凝。其有則必亡。能凝之則必能并之矣。得之則凝。兼并無強。古者湯以薄。武王以瀋。皆百里之地也。天下為一。諸侯為臣。無

它故焉。能凝之也。故凝士以禮。凝民以政。禮修而士服。政平而民安。士服民安。夫是之謂大凝。以守則固。以征則強。令行禁止。王者之事畢矣。第十五

荀卿子說齊相曰。處勝人之執。行勝人之道。天下莫忿。湯武是也。處勝人之執。不以勝人之道。厚於有天下之執。索為匹夫。不可得也。桀紂是也。然則得執勝人之執者。其不如勝人之道遠矣。夫主相者。勝人以執也。是為是非。為能。不能為不能。併己之私欲。必以道。夫公道通義之可以相兼容者。是勝人之道也。今相國上則得專。主下則得專國。相國之於勝人之執。豈有之矣。然則胡不毆此勝人之執。赴勝人之道。求仁厚明通之君子而託王焉。與之參國政。正是非。如

是則國孰敢不為義矣。君臣上下貴賤長少至於庶人莫不為義。則天下孰不欲合義矣。賢士願相國之朝。能士願相國之官。好利之民莫不願以齊為歸。是一天下也。相國舍是而不為。案直為世俗之所以為。則女主亂之官。詐臣亂之朝。貪吏亂之官。眾庶百姓皆以貪利爭奪為俗。曷若是而可以持國乎。今臣楚縣吾前。大燕鱗吾後。勁魏鉤吾右。西壤不絕之若繩。楚人則乃有襄賁開陽以臨吾左。是一國作謀。則三國必起而乘我。如是則齊必斷而為四。三國若假城然耳。必為天下大笑。曷若兩者孰足為也。夫紂桀紂聖王之後子孫也。有天下者之世也。執籍之所存。天下之宗室也。土地之大。封內千里。人之眾數以億萬。俄而天下倜然舉去。桀紂而犇湯武。反然舉惡桀紂而

貴湯武是何也。夫桀紂何失而湯武何得也。是無他故焉。桀紂者善為人所惡也。而湯武者善為人所好也。人之所惡何也。曰汙漫爭奪貪利是也。人之所好者何也。曰禮義辭讓忠信是也。今君人者。辟稱比方。則欲自並乎湯武。若其所以統之。則無以異於桀紂。而求有湯武之功名可乎。故凡得勝者。必與人也。凡得人者。必與道也。道也者何也。曰禮讓忠信是也。故自四五萬而往者。彊勝。非衆之力也。隆在信矣。自數百里而往者。安固。非大之力也。隆在修政矣。今已有數萬之衆者也。陶誕比周以爭。與已有數百里之國者也。汙漫突盜以爭地。然則是棄己之所安彊。而爭己之所以危弱也。損己之所不足以重己之所有餘。若是其悖謬也。而求有湯武之功名可乎。辟之是猶

伏而啗天救經而引其足也。說必不行矣。愈務而愈遠。為人臣者。不恤已行之不行。苟得利而已矣。是渠衝入穴而求利也。是仁人之所羞而不為也。故人莫貴乎生。莫樂乎安。所以養生安樂者。莫大乎禮義。人知貴生樂安而棄禮義。辟之是猶欲壽而殉頸也。愚莫大焉。故君人者愛民而安。好士而榮。兩者無一焉而亡。詩曰。佺人維藩。大師維垣。此之謂也。

荀子曰。力術止。義術行。曷謂也。曰。秦之謂也。威彊乎湯武。廣大乎舜禹。然而憂患不可勝校也。認認然常恐天下之一合而軋已也。此所謂力術止也。曷謂乎。威彊乎湯武。湯武也者。乃能使說已者使耳。今楚父死焉。國舉焉。負三王之廟而辟於陳蔡之間。視可司間。案欲剋

其脛而以蹈秦之腹。然而秦使左案左，使右案右，是乃使讎人役也。此所謂威彊乎湯武也。曷謂乎廣大乎舜禹也？曰：古者百王之一天下臣諸侯也，未有過封內千里者也。今秦南乃有沙羨與俱，是乃江南也；北與胡貉為鄰，西有巴戎，東在楚者，乃界於齊；在韓者，踰常山，乃有臨慮；在魏者，乃據津圍，即去大梁百有二十里耳。其在趙者，剡然有苓，而據松柏之塞，負西海而固常山，是地徧天下也。威動海內，彊殆中國，然而憂患不可勝校也。認認然常恐天下之一合而軋已也。此所謂廣大乎舜禹也。然則柰何？曰：節威反文，案用夫端誠信全之君子治天下焉。因與之參國政，正是非，治曲直，聽咸陽，順者錯之，不順者而後誅之。若是則兵不復出於塞外，而令行於天下矣。若是

則雖為之築明堂於塞外而朝諸侯殆可矣。假今之世，益地不如益信之務也。第十六

綜觀以上所述，則荀子之意重在仁義忠信，而以功利威力為不足恃矣。

江都易王問董仲舒曰：粵王句踐與大夫泄庸種蠡謀伐吳，遂滅之。孔子稱殷有三仁，寡人亦以為粵有三仁。桓公決疑於管仲，寡人決疑於君。仲舒對曰：臣愚不足以奉大對。聞昔者魯君問柳下惠，吾欲伐齊，何如？柳下惠曰：不可歸而有憂色。曰：吾聞伐國不問仁人，此言何為至於我哉？徒見問耳。且猶羞之。況設詐以伐吳，辱繇此言之，粵本無一仁。夫仁者人者，正其誼，不謀其利；明其道，不計其功。是以仲

尼之門五尺之童羞稱五伯。為其先詐力而後仁誼也。苟為詐而已。故不足稱於大君子之門也。五伯比於他諸侯為賢。其比三王猶武夫之與姜玉也。王曰善。漢書第五十六。夫徒以侵伐見問。且猶羞之。此真是代表中國人尚德而惡兵之意矣。凡兵之起。皆起於謀利計功者也。正誼不謀利。明道不計功。此孔子弭兵之法也。

司馬遷曰。地形險阻。所以為固也。兵革刑法。所以為治也。猶未足恃也。夫先王以仁義為本。而以固塞文法為枝葉。豈不然哉。遷之貴德而賤兵。其論如此。故於秦始皇本紀及陳涉世家。皆取賈誼過秦論。以為贊文。蓋誼之論以仁義不施而徒尚兵革為秦之過。故遷深表同情。而兩度取之也。誼之言曰。

秦孝公據殽函之固，擁雍州之地。君臣固守以窺周室，有席卷天下，包舉宇內，囊括四海之意，并吞八荒之心。當是時，商君佐之內立法度，務耕織，修守戰之備，外連衡而鬪諸侯。於是秦人拱手而取西河之外。孝公既沒，惠王武王蒙故業，因遺策，南取漢中，西舉巴蜀，東割膏腴之地，收要害之郡。諸侯恐懼，會盟而謀弱秦，不愛珍器重寶肥美之地，以致天下之士，合縱締交，相與為一。當是時，齊有孟嘗，趙有平原，楚有春申，魏有信陵。此四君者，皆明知而忠信，寬厚而愛人，尊賢重士，約從離衡，並韓魏，燕楚齊趙宋衛中山之衆。於是六國之士，有寧越、徐尚、蘇秦、杜赫之屬，為之謀。齊明周最、陳軫、昭滑、樓緩、翟景、蘇厲、樂毅之徒，通其意。吳起、孫臏、帶佗、兒良、王廖、田忌、廉頗、趙奢之

朋制其兵。嘗以十倍之地。百萬之衆。叩關而攻秦。秦人開關延敵。九國之師。逡遁逃而不敢進。秦無亡矢遺鏃之費。而天下諸侯已困矣。於是從散約解。爭割地而奉秦。秦有餘力而制其敵。追亡逐北。伏尸百萬。流血漂鹵。因利乘便。宰割天下。分裂河山。彊國請服。弱國入朝。延及孝文王。莊襄王。享國日淺。國家無事。及至秦皇。續六世之餘烈。振長策而御宇內。吞二周而亡諸侯。履至尊而制六合。執棰拊以鞭笞天下。威振四海。南取百越之地。以為桂林象郡。百越之君。俛首係頸。委命下吏。乃使蒙恬北築長城而守藩籬。却匈奴七百余里。胡人不敢南下而牧馬。士不敢彎弓而報怨。於是廢先王之道。燔百家之言。以愚黔首。墮名城。殺豪俊。收天下之兵。聚之咸陽。銷鋒鑄鐻。以

為金人十二以弱天下之民然後踐華為城因河為津據億丈之城
臨百尺之谿以為固良將勁弩守要害之處信臣精卒陳利兵而誰
何天下以定秦皇之心自以為關中之固金城千里子孫帝王萬世
之業也秦皇既沒餘威振於殊俗陳涉蠭臈繩樞之子甞隸之人而
遷徙之徒才能不及中人非有仲尼墨翟之賢陶朱猗頓之富躡足
行伍之間而崛起什伯之中率罷散之卒將數百之眾而轉攻秦斬
木為兵揭竿為旗天下雲集響應贏糧而景從山東豪俊遂並起而
亡秦族矣且夫天下非小弱也雍州之地崤函之固自若也陳涉之
位非尊於齊楚燕趙韓魏宋衛中山之君鉏耰棘矜非銳於句戟長
鎗也適戍之眾非抗於九國之師深謀遠慮行軍用兵之道非及鄉

時之士也。然而成敗異變，功業相反，何也？試使山東之國與陳涉度長挈大，比權量力，則不可同年而語矣。然秦以區區之地，千乘之權，招八朝州而朝同列，百有餘年矣。然後以六合為家，崤函為宮，一夫作難而七廟墮，身死人手，為天下笑者，何也？仁義不施而攻守之勢異也。

是故觀於秦始皇之不施仁義，二世而亡，則武力主義之不足以自存，其效可觀矣。非文德主義，安足以長治久安也哉？

劉向曰：聖人之治天下也，先文德而後武功。凡武之興，為不服也。文化不改，然後加誅。夫下愚不移，純德之所不能化，而後武功加焉。說

班固曰孔子曰工欲善其事必先利其器（論語第十五）文德者帝王之利器威武者文德之輔助也夫文之所加者深則武之所服者大德之所施者博則威之所制者廣三代之盛至於刑錯兵寢者其本未有序帝王之極功也（漢書第二十三）

三 愛人

春秋繁露曰子夏言春秋重人諸譏皆本此（第十七）是故奢侈之害暴虐之害春秋皆以其有害於人而惡之害人之大者莫如戰爭故春秋猶惡之孟子所以言春秋無義戰也（第十四）孝經載孔子之言曰天地之性人為貴然則貴重人命為孔教之第一義矣論語於末篇亦特著重民之義蓋以民為國之本也明乎此則孔子之惡戰爭

而愛和平不煩言而解矣。蓋孔子愛人而戰者殺人殺其所愛自非必孔子之所許矣。

春秋繁露曰春秋之法凶年不修舊意在無苦民爾苦民尚惡之况傷民乎傷民尚痛之况殺民乎故曰凶年修舊則譏造邑則諱是害民之小者惡之小也害民之大者惡之大也今戰伐之於民其為害幾何考意而觀指則春秋之所惡者不任德而任力驅民而殘賊之其所好者設而勿用仁義以服之也詩云弛其文德洽此四國此春秋之所善也夫德不足以親近而文不足以來遠而斷斷以戰伐為之者此固春秋之所甚疾已皆非義也第三

凡春秋之書兵事不論國內國外大事小事皆舉之者因重兵害眾

兵動則怨結構禍更相報償伏尸流血無已時也（公羊傳注隱公二年）孟子云興甲兵危士臣構怨於諸侯第二蓋興兵則構怨必至伏尸流血無已時也

孟子曰求也為季氏宰無能改於其德而賦粟倍他日孔子曰非我徒也小子鳴鼓而攻之可也由此觀之君不行仁政而富之皆棄於孔子於子者也况於為之強戰爭地以戰殺人盈野爭城以戰殺人盈城此所謂率土地而食人肉罪不容於死故善戰者服上刑連諸侯者次之辟草萊任土地者次之第七孟子又曰今之事君者皆曰我能辟土地充府庫今之所謂良臣古之所謂民賊也君不鄉道不志於仁而求富之是富桀也我能為君

約與國戰必克。今之所謂良臣。古之所謂民賊也。君不鄉道。不志於仁。而求為之強戰。是輔桀也。由是_今之道。無變。今之俗。雖與之天下。不能一朝居也。_{第十二}

孟子又曰。不仁哉梁惠王也。仁者以其所愛。及其所不愛。不仁者以其所不愛。及其所愛。公孫丑曰。何謂也。梁惠王以土地之故。糜爛其民而戰之。大敗。將復之。恐不能勝。故驅其所愛子弟以殉之。是之謂以其所不愛。及其所愛也。_{第十四}

四 安民

凡安民為安國之根本。而使民不安者。莫大乎戰爭。故其終有傾國之禍。此孔子止季氏之伐顓臾。所以謂有國有家者。不患貧而

患不安。安則無傾也。是故由安民之義。則必息戰爭而尚平。和尚書
曰。安民則惠。黎民懷之。夫至於黎民懷安。則自無內亂外患之憂矣。
賈誼過秦論。責二世不能安民。以正傾。遂致亡國。語甚透闢。其言曰。
秦并海內。兼諸侯。南面稱帝。以養四海。天下之士。斐然鄉風。若是者
何也。曰。近古之無王者久矣。周室卑微。五霸既沒。令不行於天下。是
以諸侯力征^政強。侵弱。衆暴寡。兵革不休。士民罷敝。今秦南面而王天
下。是上有天子也。既元元之民。冀得安其性命。莫不虛心而仰上。當
此之時。守威定功。安危之本。在於此矣。秦王懷貪鄙之心。行自奮之
智。不信功臣。不親士民。廢王道。立私權。禁文書。而酷刑法。先詐力而
後仁義。以暴虐為天下始。夫并兼者高詐力。安定者貴順權。此言取

與守不同術也。秦離戰國而王天下，其道不易，其政不改，是其所以取之守之者異也。孤獨而有之，故其亡可立而待。借使秦皇王計上世之事，並殷周之迹，以制御其政，後雖有淫驕之主，而未有傾危之患也。故三王之建天下，名號顯美，功業長久。今秦二世立，天下莫不引領而觀其政。夫寒者利裋褐，而飢者甘糟糠，天下之嗷嗷，新主之資也。此言勞民之易為仁也。鄉使二世有庸主之行，而任忠賢，臣主一心，而憂海內之患，縞素而正先帝之過，裂地分民，以封功臣之後，建國立君，以禮天下，虛囹圄而免刑戮，除去收孥污穢之罪，使各反其鄉里，發倉廩，散財幣，以振孤獨窮困之士，輕賦少事，以佐百姓之急，約法省刑，以持其後，使天下之人皆得自新，更節修行，各慎其身。

塞萬民之望而以威德與天下天下集矣即四海之內皆謹然各自
安樂其處唯恐有變雖有狡猾之民無離上之心則不軌之臣無以
飾其智而暴亂之奸止矣二世不行此術而重之以無道壞宗廟與
民更始作阿房宮繁刑嚴誅吏治刻深賞罰不當賦斂無度天下多
事吏弗能紀百姓困窮而主弗收恤然後奸偽並起而上下相遁蒙
罪者眾刑戮相望於道而天下苦之自君卿以下至于眾庶人懷自
危之心親處窮苦之實咸不安其位故易動也是以陳涉不用湯武
之賢不藉公侯之尊奮臂於大澤而天下響應者其民危也故先王
見始終之變知存亡之機是以牧民之道務在安之而已天下雖有
逆行之臣必無響應之助矣故曰安民可與行義而危民易與為非

此之謂也。貴為天子，富有天下，身不免於戮殺者，正傾非也。是二世之過也。史記第六

孔子四百二十四年。徐樂上書於漢武帝。其前半曰。臣聞天下之患。在於土崩。不在瓦解。古今一也。何謂土崩。秦之末世是也。陳涉無千乘之尊。尺土之地。身非王公大人。名族之後。鄉曲之譽。非有孔曾墨子之賢。陶朱猗頓之富也。然起窮巷。奮棘矜。偏袒大呼。天下從風。此其故何也。由民困而主不恤。下怨而上不知。俗已亂而政不修。此三者。陳涉之所以為資也。此之謂土崩。故曰。天下之患。在乎土崩。何謂瓦解。吳楚齊趙之兵是也。七國謀為大逆。號皆稱萬乘之君。帶甲數十萬。威足以嚴其境內。財足以勸其士民。然不能西攘尺寸之地。而

身為禽於中原者此其故何也。非權輕於匹夫而兵弱於陳涉也。當是之時先帝之德未衰而安土樂俗之民眾故諸侯無境外之助此之謂瓦解故曰天下之患不在瓦解由此觀之天下誠有土崩之勢雖布衣窮處之士或首難而危海內陳涉是也。况三晉之君或存乎天下雖未治也誠能無土崩之勢雖有彊國勁兵不得還踵而身為禽吳楚是也。况羣臣百姓能為亂乎。此二體者安危之明要賢主之所留意而深察也。間者關東五穀數不登年歲未復民多窮困重之以邊境之事推數循理而觀之民宜有不安其處者矣。不安故易動易動者土崩之勢也。故賢主獨觀萬化之原明於安危之機修之廟堂之上而銷未形之患也。其要期使天下無土崩之勢而已矣。漢書

第六十四

夫傾危之患。土崩之勢。秦之所以亡也。而戰爭之禍。則所以造成傾危之患。土崩之勢者也。好戰者其念之哉。

五 天命

一 凡命有三科。本稟自然曰受命。行善遇凶曰遭命。應行而報曰隨命。孝經緯論衡孔子曰。死生有命。富貴在天。又曰。不知命無以為君子也。論語第十二第二十此安命之義也。孔子又曰。故大德者必受命。禮記中庸此造命之義也。蓋凡事皆由天命所定。為君子者祇當盡其在我。以立造命之本。以待天命之至。不當任用私智。妄逞武力。以貪圖意外之功名富貴也。夫人至於樂天知命。則達而在上。必

無爭國之心窮而在下。不慕封侯之賞。惟日孜孜。自修德業。縱有功名富貴之希望。亦惟盡力於封豐功盛德。積日累月。安坐而致之。而一切智取術馭力征經營之事。皆可不作矣。此尚德而賤力之義也。南宮适問於孔子曰。羿善射。奡盪舟。俱不得其死。然禹稷躬稼而有天下。夫子不答。南宮适出。子曰。君子哉若人。尚德哉若人。論語第十四。蓋适惡當世之有權力者。好力戰而不修文事。故以羿奡比之。而以禹稷比孔子。孔子默認其意。而不欲明言。故不答。然适論甚正。能知天命所在。故孔子於其出而歎美之。此聖賢尚德而賤力。舉天命為證之事也。

考諸歷史。舜之臣五人。禹稷契皋陶。伯益。惟皋陶之後。不有天下。餘

四臣者皆有天下者也。禹平治水土，令民安得安居，功最大而德最遠。故及身而有天下。后稷教民稼穡，樹藝五穀，實為養民之祖，故歷十五世至周武王而有天下。伯益輔禹平水土，秦庶鮮食，使上下草木鳥獸咸而獸與人爭之禍始平，故歷十一世至秦始皇而有天下。契作司徒，敷五教，使父子有親，君臣有義，夫婦有別，長幼有敘，朋友有信，而五倫大明，是為教民之祖，故歷十三世至殷湯而有天下。又歷五十八世至孔子而為素王，迄及孔子之宗孫七十六代矣。然猶世為上公，奉祀不絕，故孔子雖不居帝位，而其實可謂之有天下。且比之為帝者之有天下，更為長久而廣大也。上天之待孔子，誠可謂厚矣。而契之世澤，亦可謂最長者矣。若夫皋陶以聖人之資，當士師

之任。蠻夷猾夏。寇賊姦宄之害。悉賴之而除。雖掌明刑。亦以弼教。其功德之在人。視四臣又奚分軒輊者。然而五臣之中。惟皋陶之子孫。不有天下。甚至其後嗣之封於六與蓼者。於孔子前七十一年。亦為楚穆王所滅。而皋陶庭堅不祀。忽諸矣。哀哉原皋陶之後之所以不昌者。豈以其為士之故。故不幸而至此耶。任德不任刑。天其或者藉皋陶以示其意也。故五臣之後。皆至帝王。惟皋陶乃不然耳。夫以皋陶大聖。而天猶以不尚刑之故。待之薄於待其同僚。况以羿。莽之無道。專尚武力。篡取國家。而天之惡兵。又甚於惡刑。其不得其死。豈非當然之事耶。嗚呼。此天命之所以可畏也。德教之所以當重也。刑尚當錯。而兵益不得不弭也。

二 凡小國為大國迫壓。武力不足自保。則祇當自強。以行善法。以待天命之歸。不當訴諸武力。輕舉妄動。為孤注之一擲也。蓋既不能戰。又不能和。惟有自守之道而已矣。昔滕文公問於孟子曰。齊人將築薛。吾甚恐。如之何。則可。孟子對曰。苟為善。後世子孫必有王者矣。君子創業垂統。為可繼也。若夫成功。則天也。君如彼何哉。強為善而已矣。孟子之言。非無聊之言也。求之在我。以圖自強之道也。昔滕文公為世子。孟子告以今滕絕長補短。將五十里也。猶可以為善國。蓋滕國小而偏。無從發展。充其極量。不過可為善國。以為新王取法之資耳。若夫為善而得福。至後世子孫。竟王天下。是則有天命在焉。非人之所能為也。夫滕文公之時。國事最難為矣。然孟子猶以為善聽。

天之說進。蓋人惟為善。然後其國力乃能自強。人惟聽天。然後其心力乃能堅毅。諸葛亮於孔子七百七十九年。言臣鞠躬盡力。死而後已。至於成敗利鈍。非臣之明所能逆觀也。猶孟子為善聽天之旨也。其後滕文公又問於孟子曰。滕小國也。竭力以事大國。則不得免焉。如之何。則可。孟子對曰。世守者也。非身之所能為也。效死勿去。者。盡力其在我之謂也。即所謂強為善也。必先盡其在我。然後可以言任天。已不盡道而徒委心任運。非孔教樂天知命之義也。夫人誠能樂天知命。則天下豈尚有戰禍乎。

三 凡戰禍之大者。莫甚於帝位之爭。孔子欲消弭其禍。故於易姓受代之事。悉以為天命主之。無論揖讓征誅。皆有天命以行乎其際。

不得倖獲而强求。所以杜爭戰也。論語云。堯曰。咨爾舜。天之曆數在爾躬。舜亦以命禹。此堯舜禹揖讓而禪天下之有天命也。易曰。湯武革命。順乎天而應乎人。此湯武征誅而得天下之有天命也。

孟子曰。莫之為而為者。天也。莫之致而致者。命也。匹夫而有天下者。德必若舜禹。而又有天子薦之者。故仲尼不有天下。繼世而有天下。天之所廢。若桀紂者也。故益伊尹周公不有天下。第九

帝王自有天命之說。其發揮盡致者。莫如班彪之王命論。孔子五百八十年。漢光武僅稱帝五年耳。隗囂據隴。擁眾有割據以爭天下之心。故彪作此論以感之。其畧曰。

帝王之祚。必有明聖顯懿之德。豐功厚利積累之業。然後精誠通于

神明流澤加於生民故能為鬼神所福饗天下所歸往未見運世無
本功德不紀而得崛起在此位者也世俗見高祖興於布衣不達其
故以為適遭暴亂得奮其劍遊說之士至比天下於逐鹿幸捷而得
之不知神器有命不可以智力求悲夫此世之所以多亂臣賊子者
也若然者豈徒闇於天道哉又不觀之於人事矣夫餓饉流隸飢寒
道路思有短褐之襲檐石之蓄所願不過一金終於轉死溝壑何則
貧窮亦有命也况乎天子之貴四海之富神明之祚可得而妄處哉
故雖遭罹厄會竊其權柄勇如信布強如梁籍成如王莽然卒潤鑊
伏鎖烹醢分裂又况於庸不及數子而欲闇干天位者也文選卷五

隗囂不悟於今年遣子入侍而明年遽反事卒無成反後三年恚憤而死

中國今日最近之事則袁世凱挾其二十年來政治之積威盤踞四年總統之大位撫有全國統一之政局而偽造民意上書勸進至於全國吏民其見於袁^表面者眾口一辭同聲稱^{推戴}袁為帝自稱為臣乃至改元洪憲定期登極斯亦可謂帝制告成矣孰知滇黔倡義廣西繼之而帝制取消其後各省獨立全國鼎沸羣以迫袁退位為事而袁世凱雖求為總統而不可得立見羞憤而死矣綜覽中國全史未有之大藉勢之大圖帝已成而不得一日登於其位如袁世凱者也雖曰人事豈非天命哉故孔教天命之說至是而更多一證據矣竊位

之姦雄其將有鑒於是而絕迹於中國乎

王命之論與歐洲十七八世紀君主有神聖權之說相似而不相同。君主有神聖權之說謂君主有權以為所欲為雖無道他人不得侵犯之此利於君主之專橫者也。王命之論則明天位不可妄干以息他人之爭競而已。非謂本人之可有恃無恐也。詩曰天命靡常殷士膚敏裸將于京。康誥曰惟命不于常。然則天命固視帝王為移轉而帝王不得恃天命為護符。此孔教天命之說所以既不使亂臣妄生覬覦亦不許暴君得所依託。其所謂天命若有定而又無定若無定而又有定者也。何謂無定則天命不為一姓之私眷人人皆有克享天心之資格特視其造命之功德如何以為斷是也。孔子曰大哉天

哉天命善不可不待傳於子孫是以富貴無常不如是則王公其何以戒慎民萌何以勸勉漢書第三十六此之謂也何謂有定則天命必以民意為主而民意必以愛民為歸尚德者為愛民尚力者為不愛民故惟不嗜殺人者能一天下是也是故雖以秦隋之強二世即亡蓋人心既去天命隨之此又好戰者必墜厥命之證也若謂君主有神聖權則秦隋之天下又孰得而奪之哉嗚呼天命之義孔子所以兼統君主臣民使各循其軌範而戰爭不興之道也

六 災異

一 凡春秋記災異者所以明天人相與之道合政教而一之以天統君以君隨天使人君省天譴而畏天威內動於心志外見於性情

修身行己明善心以反道也。天之告人君先之以災異而後亂亡從之。此以見天意之仁而不欲害人也。異者非常可怪先事而至者災者有害於人物隨事而至者災散於己。異至戒於未來未來者可追已至者無及。故春秋以異大乎災貴教化而賤刑罰之義也。以人受陰陽之氣以生猶水之漸魚也。魚怫鬱於淵而水為之淖人以邪亂穀氣化而天聞其腥此災異所緣而起也。見天意者之於災異也畏之而不惡也。以為天欲振吾過救吾失故以此報我也。春秋之法上變古易常應是而有天災者謂之幸國。苟受災異而能變寤改政則精誠感天其功美過於無災。若不知變則傷敗必至。故楚莊王以天不見災地不見孽則禱之於山川曰天其將亡予耶不說吾過極吾

罪也。孔子曰：天之所幸，有為不善而屢極，故災異不可不樂受也。聖主賢君，尚樂受忠臣之諫，而況天譴乎？是故遇災而不變者，危亡之君也；遇災而變者，中主之治也。所謂畏天者，保其國也；不遇災而自懼且求過於天者，則並致災之由而弭之霸王之器也。所謂樂天者，保天下也。人君能樂天，則小心翼翼，昭事上帝，敬天愛民，禎祥畢至，而王道終矣。公羊傳：隱公三年五年，僖公三年宣公十五年，定公元年，春秋繁露第十五第三十。

二 凡春秋所記災異，共一百四十五條，由何注言之，則某災某事所致，某異某事所應，似屬太拘。然孔子之詳記災異，實欲借天戒以明人事，其端見於畏天，其意主於重民，其效至於符瑞，本合天人以

為一故春秋之所譏災害之所加也春秋之所惡怪異之所施也書
邦家之過兼災異之變以此見人之所為其美惡之極乃與天地流
通而往來相應故孔子之言天實即孔子之言人也凡孔子所惡之
人事天皆出災異以警告之孔子乃從而書之以垂教萬世蓋孔子
者以聖人而代天立言者也天地神明之心與人事成敗之真莫之
能見惟聖人能見人之所不見而明白言之故聖人之言與天命同
一可畏也論語第十六漢_書第五十六春秋繁露第六十五

三凡孔子所惡之人事莫甚於兵禍天與孔子同意故於兵禍之
後則降災於兵禍之前則示異春秋之所記者詳矣今謹舉戰時之
異一條以明之昭公五年春公如晉夏莒牟夷以牟婁及防茲來奔

秋七月公自至晉戊辰叔弓帥師敗莒師于瀆泉公羊傳曰瀆泉者何直泉也直泉者何涌泉也何注曰蓋戰而涌為異也此象公在晉臣下專受莒叛臣地以興兵戰鬪百姓悲怨歎息氣逆之所致故因以著戰處欲明天之與人相報應之義此孔子記災異以戒戰爭之意也

四 凡物為不祥之物非獨見諸人事且可徵諸天道非獨兵敗而召天變即兵勝亦有天災此孔子弭兵之義也漢魏相明易經好言陰陽之道孔子四百九十年匈奴遣兵擊漢屯田車師者不能下宣帝與諸將軍議欲因匈奴衰弱出兵擊其右地使不敢復擾西域時相為丞相即本此義以諫止之其諫書曰

臣聞之救亂誅暴謂之義兵。兵義者王。敵加於己不得已而起者謂之應兵。兵勝者勝應爭恨小故不忍憤怒者謂之忿兵。兵忿者敗。利人土地貨寶者謂之貪兵。兵貪者破。時國家之大矜民人之衆欲見威於敵者謂之驕兵。兵驕者滅。此五者非但人事迺天道也。閒者匈奴嘗有善意所得漢民輒奉歸之未有犯於邊境雖爭屯田車師不足致意中。今聞諸將軍欲興兵入其地。臣愚不知此兵何名者也。今邊郡困乏父子共犬羊之裘食草萊之實常恐不能自常存難以動兵。軍旅之後必有凶年言民以其愁苦之氣傷陰陽之和也。出兵雖勝猶有後憂恐災害之變因此以生。今郡國守相多不實選風俗尤薄水旱不時。臣愚以為此非小變也。今左右不憂此迺欲發兵報纖介之

怨於遠夷。殆孔子所謂吾恐季氏之憂不在顓臾而在蕭牆之內也。

漢書第七十四

觀魏相所言以選舉之不得人風俗之薄水旱之不時視為大變而不欲發報忿之兵以生災害重內治而畧外競尚德化而畏天變斯真是為儒相之代表矣宣帝中興之治相最有力孰謂儒術之寡效哉

五 凡好戰之君雖得勝利終受奇禍此天道之報應也今且以秦皇漢武言之

孔子三百三十一年始皇盡并天下始稱皇帝王氏蒙氏功為多蒙騫及子蒙恬武孫蒙恬世為秦將迭三大功三百三十七年始皇使

蒙恬將三十萬眾北伐匈奴明年始築長城明年始皇焚書又明年
坑儒生四百六十餘人長子扶蘇諫曰天下初定遠方黔首未集諸
生皆誦法孔子今上皆重法繩之臣恐天下不安唯上察之始皇怒
使扶蘇北監蒙恬軍於上郡時蒙恬威振匈奴始皇甚尊寵而信任
之恬弟蒙毅亦位至上卿出則參乘入則御前恬任外事而毅常為
內謀名為忠臣雖諸將相莫敢與之爭焉及三百四十二年始皇出
游道病使蒙毅還禱山川未反始皇崩官者趙高與丞相李斯矯詔
立其少子胡亥為皇帝賜扶蘇及蒙恬死恬不肯死而被囚遂先殺
蒙毅後復賜恬死恬曰自吾先人及至子孫積功信於秦三世矣今
臣將兵三十餘萬身雖囚繫其勢足以倍畔然自知必死而守義者

不敢辱先人之教。以不忘先主也。臨死喟然太息曰。我何罪於天。無過而死乎。良久徐曰。恬罪固當死矣。起臨洮屬之遼東。城塹萬餘里。此其中不能無絕地脈哉。此乃恬之罪也。乃吞藥自殺。蓋恬亦非以絕地脈為己罪。不過寬憤之辭耳。

司馬遷曰。吾適北邊。自直道歸。行觀蒙所為秦築長城。亭鄣塹山堙谷通其道。直固輕百姓力矣。夫秦之初滅諸侯。天下之心未定。痍傷者未瘳。而恬為名將。不以此時彊諫。振百姓之急。養老存孤。務修衆庶之和。而阿意興功。此其兄弟遇誅。不亦宜乎。何乃罪地脈哉。遷意蓋謂蒙恬勞民。宜受天罰也。此司馬遷之和平論也。史記第八十八

秦始皇奮不世之兵威。獨雄千古。然身死之後。長子被殺。諸公子亦

多被二世刑戮。即二世亦立三載而被弑。自始皇稱帝至秦亡。纔十五載耳。而子嬰及諸公子宗族皆被屠滅。能不哀哉。當始皇未使蒙恬伐匈奴之先。發先見圖書曰亡秦者胡。蓋其子胡亥也。乃始皇不識以匈奴當之。故於是年使蒙恬擊胡。而孰知其亡秦之禍。即基於此。蓋若使蒙恬非遠在北邊。則胡扶蘇無由至彼監軍。始皇雖死。而有扶蘇以為嗣君。有蒙恬蒙毅以為將相。秦必不可得而亡也。惟其自壞其萬里長城。而遠築萬里長城。此其所以亡也。故謂之天道也。漢武帝征伐四夷。雖無亡國之禍。然家庭之變。亦甚慘酷。孔子四百六十一年。武帝疾。辟暑甘泉宮。獨皇后及太子在京師。江充向與之有隙。恐帝崩後。為太子所誅。因偽奏帝疾祟在巫蠱。帝以充為使者。

治之坐平蠱死者前後數萬人最後充掘蠱於太子宮得桐木人太子懼不能自明收充斬之發兵與丞相大戰京師死者數萬人太子兵敗出亡至湖皇后自殺後太子亦自殺於湖皇孫二人皆遇害帝後知太子惶恐無他意而車千秋復上書訟其冤帝乃立拜千秋為大鴻臚數月擢為丞相而族滅江充家且憐太子無辜作思子宮為歸來望思之臺於湖天下聞而悲之

班固曰平蠱之禍豈不哀哉此不唯一江充之辜亦有天時非人力所致焉（元子四百十七年）建元六年蚩尤之旗見其長竟天後遂命將出征略取河南建置朔方其春戾太子生自是之後師行三十年兵所誅屠夷滅死者不可勝數及平蠱事起京師流血僵尸數萬太子子父皆敗故

太子生長於兵與之終始何獨一嬖臣哉秦始皇即位三十九年內
平六國外攘四夷死人始亂麻暴骨長城之下頭盧相屬於道不一
日而無兵由是山東之難興四方潰而逆秦秦將吏外畔賊臣內發
亂作蕭牆禍成二世故曰兵猶火也弗戢必自焚信矣是以倉頡作
書止戈為武聖人以武禁暴止整亂止息干戈非為殘而興縱之也
易曰天之所助者順也人之所助者信也君子履信思順自天祐之
吉無不利也故車千秋指明蠱情章太子之冤千秋材知未能過人
也以其銷惡運遏亂原因哀激極道迎善氣傳得天人之佑助云漢

書第六十三

六 凡好戰之將雖立戰功亦遭天譴蒙氏之禍前已明之矣今謹

再以白起王翦言之

白起料敵合變出奇無窮聲震天下然卒為秦相應侯所譖為秦昭王賜死孔子二百九十五年當起引劍將自剄時曰我何罪於天而至此哉良久曰我固當死長平之戰趙卒降者數十萬人我詐而盡阬之是足以死遂自殺蓋孔子二百九十二年起嘗阬趙降卒四十萬又王翦為秦將夷滅六國其子王賁亦同時為將而有戰功及陳勝起革命軍革攻秦秦使王翦之孫王離擊趙圍趙王及張耳鉅鹿城或曰王離秦之名將也今將彊秦之兵攻新造之趙舉之必矣客曰不然夫為將三世者必敗必敗者何也以其所殺伐多矣其後受其不祥今王離已三世將矣居無何孔子三百四十五年項羽救趙擊

秦軍果虜王離其軍遂降司馬遷曰當是時翦為宿將始皇師之然不能輔秦建德固其根本偷合取容以至刼身及孫王離為項羽所虜不亦宜乎史記第七十三此天道惡殺降罰於名將之證也夫翦不過為將耳遷乃責以建德此又可見遷之尚德而惡兵矣

班固曰凡兵所以存亡繼絕救亂除害也故伊呂之將子孫有國與商周並至於末世苟任詐力以快貪殘爭城殺人城爭地殺人滿野孫吳商白之徒皆身誅戮於前而功滅亡於後報應之勢各以類至其道然矣漢書第二十三

七 偃武

凡兵者必不得已而後用雖暫用之必復偃之此偃武修文之義也孔

子曰武王克殷及商濟河而西馬散之華山之陽而弗復乘牛散之
桃林之野而弗復服車甲釁而藏之府庫而弗復用倒載干戈包之
以虎皮將帥之士使為諸侯名之曰鍵橐然後天下知武王之不復
用兵也散軍而射^郊左射貍首右射騶虞而貫革之射息也裨冕搢笏
而虎賁之士說劍也祀乎明堂而民知孝朝覲然後諸侯知所以臣
耕藉然後諸侯知所以敬五者天下之大教也食三老五更於大學
天子袒而割牲執醬而饋執爵而醕冕而總干所以教諸侯之弟也
此武王偃武脩文之事也禮記樂記

孔子三百五十六年為漢高帝十一年陸賈以出使南越令其稱臣
奉漢約之功拜為大中大夫賈時時前說稱詩書高帝罵之曰迺公

居馬上得之安事詩書賈曰馬上得之寧可以馬上治乎且湯武逆
取而以順守之文武並用長久之術也昔者吳王夫差智伯極武而
亡秦任刑法不變卒滅趙氏鄉使秦以并天下行仁義法先聖陛下
安得而有之高祖帝不憚有慙色謂賈曰試為我著秦所以失天下吾
所以得之者及古成敗之國賈凡著十二篇每奏一篇高帝未嘗不
稱善稱其書曰新語漢書第四十三

八 銷兵

孔子銷兵之理想於農山言志見之說苑曰孔子北游東上農山子
路子貢顏淵從焉孔子喟然歎曰登高望下使人心悲二三子者各
言爾志上將聽之子路曰願得白羽若月赤羽若日鐘鼓之音上聞

乎天。旌旗翩翩，下蟠于地。由且舉兵而擊之，必也攘地千里，獨由能耳。使夫二子為我從焉。孔子曰：「勇哉士乎！憤憤者乎！子貢曰：『賜也，願齊楚合戰於莽洋之野，兩壘相當，旌旗相望，塵埃相接，接戰構兵，賜願著縞衣白冠，陳說白刃之間，解兩國之患，獨賜能耳。』使夫二子者為我從焉。」孔子曰：「辯哉士乎！僂僂者乎！顏淵獨不言。」孔子曰：「回來，若何獨不願乎？」顏淵曰：「文武之事，二子已言之，回何敢與焉。」孔子曰：「若鄙心不與焉。」第言之。顏淵曰：「回聞鮑魚、蘭芷不同筐，而藏堯舜桀紂不同國而治。二子之言與回言異，回願得明王聖主而相之，使城郭不脩，溝池不越，鍛劍戟以為農器，使天下千歲無戰鬪之患。如此則由何憤憤而擊，賜又何僂僂而成乎？」孔子曰：「美哉德乎！姚姚者乎！子

路舉手問曰願聞夫子之意孔子曰吾所願者顏氏之計吾願負衣冠而從顏氏子也

卷十五

由此觀之則孔子及顏淵之志願固在使天下永無戰鬥兵器並不存在而凡兵家及外交家皆無所用矣吾故謂孔子為最愛平和之人也

卷第十 君民

一 主權

一 凡天下國家之主權在民不在君。君也者不過民之代表而任其治理之責者耳。此其義孟子發之最明。萬章曰：堯以天下與舜，有諸？孟子曰：否。然則舜有天下也，孰與之？曰：天與之。天與之者，諄諄然命之乎？曰：否。天不言，以行與事示之而已矣。曰：以行與事示之者，如之何？曰：天子能薦人於天，不能使天與之天下；諸侯能薦人於天子，不能使天子與之諸侯；大夫能薦人於諸侯，不能使諸侯與之大夫。昔者堯薦舜於天，而天受之；暴之於民，而民受之。故曰：天不言，以行與事示之而已矣。曰：敢問薦之於天，而天受之；暴之於民，而民受之，如

何曰使之主祭而百神享之是天受之使之主事而事治百姓安之
是民受之也天與之人與之故曰天子不能以天下與人舜相堯二
十有八載非人之所能為也天也堯舜崩三年之喪畢舜避堯之子
於南河之南天下諸侯朝覲者不之堯之子而之信舜訟獄者不之堯
之子而之舜謳歌者不謳歌堯之子而謳歌舜故曰天也夫然後之
中國踐天子位焉而居堯之宮逼堯之子是篡也非天與也泰誓曰
天視自我民視天聽自我民聽此之謂也第九

天子不能以天下與人則主權不在君明矣然則主權何在曰其名
在天而其實在民蓋既天既不言而百神之享又不可得而見所可
見者惟在主事而事治百姓安之耳是故朝覲訟獄謳歌即為行使

民權之形式。而天視天聽。且隨民之視聽。為轉移。謂曰主權在民。復何疑者。然則孟子猶以其名歸之於天何也。曰此孔教天命之說。不能易者也。孟子曰。丹朱之不肖。舜之子亦不肖。舜之相堯。禹之相舜也。歷年多。施澤於民久。啟賢能。敬承繼禹之道。益之相禹也。歷年少。施澤於民未久。舜禹益相去久遠。其子之賢不肖。皆天也。非人之所能為也。莫之為而為者天也。莫之致而致者命也。此天命之義也。夫賢聖之君。能得天下。固非得其民不可矣。然其所以能得其民者。種種原因。異常複雜。固有非人力之所能自致者。故以無形之主權。歸之於天。以有形之主權。歸之於民。以理論言之。則主權惟出於天。故王者受命改制。明受之於天。不受之於人。公羊傳注隱公元年以事

實^言之則主權惟在於民。故天視自我民視。天聽自我民聽。此孔教之主權論。所以為圓滿而精審也。孔子曰。湯武革命。順乎天而應乎人。易革卦。蓋天人一理相合而握政治之主權。必兼言之其義乃備。無論揖讓征誅。皆須天與人歸。然後能得天下也。孔教之所以為政教合一者。於此可見矣。

二 凡立君者。所以為眾。故得眾而為君者。春秋之所與也。若眾皆欲立之。而於法又不宜立。則春秋實與而文不與之。蓋君位有定。以法傳授而無所爭者。據亂世之法也。君位無定。以眾所欲立而立之者。太平世之法也。非太平世而徒壞據亂世之法。故春秋以為非也。然雖非之。而其實有合於太平世之法。故春秋於此有美辭焉。且於

其終正之也。衛宣公之事是矣。隱公四年。春秋曰。冬十有二月。衛人立晉。公羊傳曰。晉者何。公子晉也。立者何。立者不宜立也。其稱人何。眾立之之辭也。然則孰立之。石碻立之。石碻立之。則其稱人何。眾之所欲立也。眾雖欲立之。其立之非也。春秋繁露曰。衛人立晉。美得眾也。第六。蓋春秋稱人者。所以示得眾則為君之本義。美之也。稱立者。所以著違法則為篡之成例。刺之也。春秋書法。常於其嫌得者見其不得。眾皆欲立之。嫌得立無惡。故特立_書以著其篡。言雖以晉之得眾。猶不免為篡。則其他之犯眾而爭國者。益不得免於罪矣。此其所以實與而民_文不與也。然春秋猶恐美其得眾而許其宜立之意尚未顯也。故於桓公十二年十一月書曰。丙戌。衛侯晉卒。明年又書曰。三

月葬衛宣公。卒日葬。月從春秋大國之違例而無譏。文明其以得眾而立也。春秋繁露曰：非其位而即之，雖受之先君，春秋危之。宋繆公是也。非其位不受之先君而自即之，春秋危之。吳王僚是也。雖然，苟能行善得眾，春秋弗危。衛侯晉以正書葬是也。俱不宜立而宋繆公受之先君而危，衛宣弗受先君而不危。此以見得眾心之為大安也。第四是故觀於衛宣公之事，則春秋之美得眾而貴選賢可以見矣。大同世選賢與能之義，其即於衛人立晉示其端哉。

二 民權

一 孔子主張民權最力。其政治之形式雖為君主，而其政治之精神實為民主。故中國民權之發達最早而最溥。此孔教之力也。茲謹

條舉孔子之言於下。

孔子曰。小人溺於水。君子溺於口。大人溺於民。皆在其所褻也。夫民
聞於人而有鄙心。可敬不可慢。易以溺人。故君子不可以不慎也。孔
子又曰。民以君為心。君以民為體。心莊則體舒。心肅則容敬。心好之
身必安之。君好之民必欲之心。以體存。亦以體傷。君以民存。亦以民
亡。禮記緇衣

孔子告子張曰。上者辟如緣木者。務高而畏下者。滋甚。故上者尊嚴
而絕。百姓者卑賤而神。民而受之愛則存。惡之則亡也。天戴禮第六十
五

子貢問治民於孔子。孔子曰。懔懔焉如以腐索御六馬。奔子貢曰。何其

畏也。孔子曰：夫通達之國皆人也，以道導之，則吾畜也；不以道導之，則吾讎也。若何而毋畏？說苑卷七。

孔子對魯哀公曰：君者舟也，庶人者水也。水則載舟，水則覆舟。君以此^思異危，則危將至焉而不至矣。荀子第三十二。

孔子謂子夏曰：汝知君子之為君乎？子夏曰：魚失水則死，水失魚猶為水也。孔子曰：商，汝知之。尸子君治篇。

凡此皆孔子主張民權之言也。

二 春秋之義，以民為重，君而無道，民得去之，他適，所以孤惡君也。又民之叛君，皆責君而不責民，以是為君失民之所致也。凡失民之君，春秋皆絕之。僖公四年，春秋曰：春，王正月，公會齊侯、宋公、陳侯、衛

侯鄭伯許男曹伯侵蔡蔡潰潰者下叛上也國曰潰邑曰叛夫侵淺
事也侵而即潰則君民不相得可知矣舉潰所以惡蔡也故僖公十
四年蔡侯旽卒春秋不書其葬失眾而潰當絕也僖公十九年春秋
曰梁亡公羊傳曰此未有伐者其言梁亡何自亡也其自亡奈何魚
爛而亡也何注曰梁君隆刑峻法一家犯罪四家坐之一國之中無
不被刑者百姓一旦相率俱去狀若魚爛魚爛從內發故云耳爾著
其自亡者明百姓得去之君當絕者昭公二十九年春秋曰冬十月
運潰何注曰明罪在公也穀梁傳曰潰之為言上下不相得也上下
不相得則惡矣亦譏公也昭公出奔民如釋重負
桓公元年穀梁傳曰桓弟弑兄臣弑君天子不能定諸侯不能救百

姓不能去。又三年，公羊傳注曰：若桓公之行，諸侯所當誅，百姓所當叛。此皆言無道之君，百姓義當去之，叛之也。此所謂民權也。

三 孔教重民，故人君當常與民接近。莊公二十九年，穀梁傳曰：古之君人者，必時視民之所勤，蓋天道時有所生，歲有所成，三歲一閏，天道小備，五歲再閏，天道大備，故天子五年一巡守，三年二伯出巡，職黜陟，一年物有終始，歲有所成，故方伯行國，時有所生，故諸侯行邑。（白虎通）蓋皆恐民之不得其所，故親自行之，重民之至也。

四 凡愛民為保國免患之要道。檀弓曰：陽門之介夫死，司城子罕入而哭之哀。晉人之貶宋者，反報於晉侯曰：陽門之介夫死，而子罕哭之哀，而民說，殆不可伐也。孔子聞之曰：善哉！覘國乎？詩云：凡民有

喪扶服救之。雖微晉而已。天下其孰能當之。蓋介夫匹庶之賤人。而子罕當國之卿相。以貴哭賤。感動民心。故民說而鄰國畏之也。易曰。以貴下賤。大得民也。為國者苟能愛民。下民大得其民。則上下一心戮力共死。豈尚有敵國外患乎。故必先能保持國內之平和。乃可保持國際之平和也。

五 大學曰。民之所好好之。民之所惡惡之。此之謂民之父母。又曰。有國者不可以不慎。辟則為天下僂矣。又曰。得眾則得國。失眾則失國。凡此皆言國以民為本。國之得失。惟視乎得民與否。為斷。而所以能得民者。則必當同其好惡。與民一體。苟或不慎。則君而不君。即民非其民。豈特不保其國。將並其身而不保矣。辟則為僂。君之命實懸

於民之手。為民所好者。則君之。為民所惡者。則僂之。此國之主權。所以任民而施政。必當以民之好惡為準也。

六 孟子曰。暴其民甚。則身弑國亡。不甚則身危國削。又曰。桀紂之失天下也。失其民也。失其民者。失其心也。得天下有道。得其民。斯得天下矣。得其民有道。得其心。斯得其民矣。得其心有道。所欲與之聚之。所惡勿施爾也。此亦大學民之所好好之。民之所惡惡之之義也。然孟子尤有簡單直捷之言。為人所最易明者。其言曰。民為社稷次之。君為輕。此揭示民國君三者之輕重。比較而等差之。而民權之特重。盡皆見矣。第七第十四

七 民權之義。其發之詳明者。莫如賈子新書大政上篇。謹節錄之。如

下。

賈子曰。聞之於政也。民無不為本也。國以為本。君以為本。吏以為本。故國以民為安危。君以民為威侮。吏以民為貴賤。此之謂民無不為本也。聞之於政也。民無不為命也。國以為命。君以為命。吏以為命。故國以民為存亡。君以民為盲明。吏以民為賢不肖。此之謂民無不為命也。聞之於政也。民無不為功也。故國以為功。君以為功。吏以為功。國以民為興壞。君以民為彊弱。吏以民為能不能。此之謂民無不為功也。聞之於政也。民無不為力也。故國以為力。君以為力。吏以為力。故夫戰之勝也。民欲勝也。攻之得也。民欲得也。守之存也。民欲存也。故率民而守。而民不欲存。則莫能以存矣。故率民而攻。民不欲得。則

莫能以得矣。故率民而戰。民不欲勝。則莫能以勝矣。故其民之為其
也。接敵而喜。進而不能止。敵人必駭。戰由此勝也。夫民之於其上。也
接而懼。必走去。戰由此敗也。故夫菑與福也。非粹在天也。必在士民
也。嗚呼。戒之戒之。夫士民之志。不可不要也。嗚呼。戒之戒之。行之善
也。粹以為福已也。行之惡也。粹以為菑已矣。故受天之福者。天不為
功焉。被天之菑。則亦無怨天矣。行自為取之也。知善而弗行。謂之不
明。知惡而弗改。必受天殃。天有常福。必與有德。天有常菑。必與奪民
時。故夫民者。至賤而不可簡也。至愚而不可欺也。故自古至於今。與
民為讎者。有遲有速。而民必勝之。知善而弗行。謂之狂。知惡而不改
謂之惑。故夫狂與惑者。聖王之戒也。而君子之愧也。嗚呼。戒之戒之。

豈其以狂與惑自為之明君而君子乎。聞善而行之如爭。聞惡而改之如讎。然後福可離。然後保福也。

又曰。故紂自謂天王也。桀自謂天子也。已滅之後。民以相罵也。以此觀之。則位不足以為尊。而號不足以為榮矣。故君子之貴也。士民貴之。故謂之貴也。故君子之富也。士民樂之。故謂之富也。故君子之貴也。與民以福。故士民貴之。故君子之富也。與民以財。故士民樂之。故君子富貴也。至於子孫而衰。則士民皆曰。何君子之道衰也。數也。不肖暴者。禍及其身。則士民皆曰。何天誅之遲也。夫民者。萬世之本也。不可欺。凡居於上位者。簡士苦民者。是謂愚。敬士愛民者。是謂智。夫愚者。智士民命之也。故夫民者。大族也。民不可不畏也。故夫民者。多

力而不可適也。嗚呼！戒之哉！戒之哉！與民為敵者，民必勝之。

又曰：故堯舜禹湯之治天下也，所謂明君也。士民樂之，皆即位百年，然後崩。士民猶以為大數也。桀紂所謂暴亂之君也，士民苦之，皆即位數十年而滅。士民猶以為大久也。故諸侯者，士民皆愛之，則其國必興矣；士民皆苦之，則國必亡矣。故夫士民者，國家之所樹，而諸侯之本也。不可輕也。嗚呼！興^輕本不祥，實為身殃。戒之哉！戒之哉！

觀賈子所言，民權之重大如此。此所以中國雖為君主之國，而民權之發達實甲於大地也。

三 國會

凡孔子之論君民，有相對之義務，而採民言以施政教，尤為弭亂之

道子云。上酌民言。則下天上施。上不酌民言。則犯也。下不天上施。則亂也。故君子信讓以蒞百姓。則民之報禮重。詩云。先民有言。詢于芻蕘。鄭玄曰。取眾民之言。以為政教。則得民心。得民心。則恩澤所加。民受之如天矣。言其尊。報禮重者。猶言能死其難。先民謂上古之君也。芻蕘。下民之事也。言古之人君。將有政教。必謀之於庶民。乃施之。此民權國會之義也。能如是。則民尊恩而死難矣。不如是。則民犯上而作亂矣。和平與不和平。在酌民言與不酌民言之別而已。禮記坊記。孔子又引君陳曰。出入自爾師虞。庶言同。言出納政教。當由汝眾之所謀度。眾言同。乃行之。政教當由一也。禮記緇衣。蓋施教政者。以得全體之同意為上。即不然。亦當得大多數之同意也。此多數表決之

法也。

國會之制。惟中國最古。神農曰明堂。淮南子主術訓黃帝曰合宮堯曰文祖。舜曰總期。亦曰總章。禹始為九室之明堂。殷曰總章。周曰明堂。皆國會也。尚書呂刑曰。皇帝清請問下民。謂堯也。洪範曰。謀及庶民。謂禹也。盤庚曰。王命眾。悉至于廷。又曰。盤庚乃登進厥民。此殷時國會之鐵證也。凡此皆唐虞三代國會之制。之明著於孔經者也。

古代國會選舉法及其組織法。不可得而詳矣。稽諸周官。鄉大夫之職。各掌其鄉之政教禁令。三年則大比。攷其德行道藝。而興賢者能者。鄉老及鄉大夫帥其吏與其眾寡。以禮禮賓之。厥明。鄉老及鄉大夫羣吏獻賢能之書于王。王再拜受之。登于天府。內史貳之。退而以

鄉射之禮五物詢衆庶。一曰和。二曰容。三曰主皮。四曰和容。五曰興舞。和載六德。則知仁聖義忠皆兼之矣。容者孝也。容包六行。則友睦。婣任恤皆兼之矣。主皮者射和容者禮興舞者樂。則御書數亦兼之矣。此被選之資格也。夫六德六行六藝。其事共有十有八。今惟詢以五物者。殆以賢能既貢之後。則攷詢其次者。自當略而不詳歟。此謂使民興賢。出使長之。使民興能。入使治之也。蓋使民選出代表以行代議政治者。若夫大詢于衆庶。則各帥其鄉之衆寡而致於朝。此臨時召集之國民會議。由國民直接議之者也。凡此皆國會選舉法也。至國會組織法。則小司寇之職。掌外朝之政。以致萬民而詢焉。一曰詢國危。二曰詢國遷。三曰詢立君。其位王南鄉。三公及州長百姓北

面羣臣西面羣吏東面羣臣卿大夫士也羣吏府史也孤從羣臣卿大夫在公後也小司寇擯以敘進而問焉以眾輔志而弊謀此周官之法也以眾輔志而斷其謀即老子所謂聖人無常心以百姓心為心也

考諸王制則養老之制亦議會之法也凡三王養老皆引年引戶校年此所謂選舉法也分國老與庶老為二即兩院之制上庠東序右學東膠乃虞夏殷周之大學所謂上院也下庠西序左學虞庠是其小學所謂下院也納議於學堂故天子出征受成於學蓋番番良士膂力既愆而元老壯猷足參謀議其資格既以老成為宜其地址亦以學堂為便於以舉養老乞言之典隆政教合一之規彼國老庶老

對於學堂則為師長。對於政府則為議員。此人才所以獨精而謀事所以多成也。此王制之法也。

明堂之制。春秋時已不行矣。惟齊桓公效黃帝堯舜禹湯武王而為嘖之議。室管子第五十六尚有明堂會議之遺法。此外則無之矣。然春秋時雖無明堂之制。猶有國民會議之法。今試舉左傳以明之。

凡征賦繕兵守國立君諸大事。必當召集國民會議。以和眾志而固國本。僖公十五年。秦晉交戰。晉惠公為秦所獲。及秦許晉平。晉侯使卻乞告呂甥。且召之。呂甥教乞曰。朝國人而以君命賞。且告之曰。孤雖歸。辱社稷矣。其卜貳圉也。圉者。惠公太子之名也。眾皆哭。晉於是乎作爰田。爰。易也。分公田之稅。應入公者。爰之於所賞之眾也。呂甥

曰君亡之不恤而羣臣是憂惠之至也將若君何眾曰何為而可對曰征繕以輔孺子諸侯聞之喪君有君羣臣輯睦甲兵益多好我者勸惡我者懼庶有益乎眾說晉於是乎作州兵二千五百家為州使州長各繕甲兵也孺子即圉也此晉之國民會議也時晉雖無君而呂甥使卻乞假君命以召集之作爰田以示恩於民而實則作州兵以輔太子征繕之事皆待眾說然後能行之此可見民權之大有造於國家也

凡重要之外交為和戰所關存亡所繫者宜召集國民會議以決之定公四年吳入楚使召陳懷公陳者楚之與國也懷公朝國人而問焉曰欲與楚者右與欲與吳者左陳人不知所與有田者從田無田

者從黨。蓋從其田。或其居之在東西者而分左右也。逢滑不左不右。
當公而進。曰吾聞國之用興也。以福。其亡也。以禍。今吳未有福。楚未
有禍。楚未可棄。吳未可從。而晉盟主也。若以晉辭吳。若何。公曰。國勝
君亡。非禍而何。對曰。國之有是多矣。何必不復。小國猶復。況大國乎。
臣聞國之興也。視民如傷。是其福也。其亡也。以民為土芥。是其禍也。
楚雖無德。亦不艾殺其民。吳日敝於兵。暴骨如莽。而未見德焉。天其
或者正訓楚也。禍之適吳。其何日之有。陳侯從之。左傳哀公元年夫
以陳人之愚。至於從田從黨。以分左右。誠不知外交為何物。此亦最
大多數國民之通病。不足怪也。然國有大疑。終不得不召集此種愚
民以決之。蓋利害關乎全國。為君者不應獨斷獨行。而置國民於不

知不聞之列也。苟其間有一智者出焉，則其言必有以合乎全國愚民心理之同，而足為之代表。如逢滑是矣。國民既共知其事，必共任其責。夫然，故君民一體休戚相關，而國乃有以自立。此議會之效也。觀逢滑之論，不以勝敗分禍福，而以重民不重民分禍福。苟能重民，雖國破君逃，而猶可復興。苟不能重民，雖百戰百勝，而禍不旋踵。此即平和與不平和之禍福也。逢滑既明於外交大計，又能發揮平和至理，故吾有取焉。非特取以證春秋時中國有議會而已。

定公八年，晉師盟衛侯于鄆澤。成何曰：衛吾溫原也。焉得視諸侯？衛侯欲叛晉，告諸大夫曰：寡人辱社稷，其改卜嗣。寡人從焉。大夫曰：是衛之禍，豈君之過也？此明分國與君為二物，可見當時政治學理之

昌明矣。夫衛侯欲叛晉而患諸大夫。至以退位要之。亦可見當時之君權不甚尊矣。然此猶曰政在大夫也。乃以工商之賤。亦可參預國家和戰之權。至於公朝國人使當國之王孫賈問之。然後可以決定。此即國君親臨議會。使宰相徵求同意。得眾庶之贊助。然後能定外交之政策也。左傳

中國議會之制。源遠流長如此。及秦并天下。君主專制一切。而明堂會議之制。國民會議之法。皆廢止矣。秦後之政治。不若古代。斯其一大原因乎。

管子曰。夫民別而聽之則愚。合而聽之則聖。雖有湯武之德。復合於市人之言。是以明君順人安心。安情性而發於眾心之所聚。是以令

出而不稽刑設而不用先王善與民為一體與民為一體則是以國守國以民守民也第三士此國會之精義也國會者合眾民而聽之者也

四 君德

孔教重君權以統一天下其君權之內容實是民權不過藉君權以為民權之代表耳然如何而後能代表民權則君德尚矣禮記孔子閒居一篇詳說君德始則善推其所以與民共之凡志詩禮樂哀五者皆至於民蓋君民一體之義也所謂五至也又行無聲之樂以安民無體之禮以教民無服之喪以救民蓋之在心非以聲色化民也所謂三無也三無既行則民有五種興起之事以應之由淺入深所

謂五起也。然君德之所以能參於天地者，尤在如天地日月之無私。覆私載私，照所謂三無私也。天地無私，而聖人則之以為教。故令聞先昭而上天佑之，命式于九圍。又為生賢聖以輔之。此三代之所以王天下也。未復以弛其文德，協此四國，為大王之德，以總結全篇，所以見王天下者在文德，不在武功也。孔子之論君德如此，蓋必如此，然後不愧為統一天下之君也乎？四方有敗，必先知之，兵禍必無從發生也。此太平大同之君也。全篇文義精美，謹錄之於左。

孔子閒居。子夏侍。子夏曰：「敢問詩云：『凱弟君子，民之父母。』何如斯可謂民之父母矣？」孔子曰：「夫民之父母乎？必達於禮樂之原，以致五至而行三無，以橫於天下，四方有敗，必先知之。此之謂民之父母矣。」

子夏曰民之父母既得而聞之矣敢問何謂五至孔子曰志之所至詩亦至焉詩之所至禮亦至焉禮之所至樂亦至焉樂之所至哀亦至焉哀樂相生是故正明目而視之不可得而見也傾耳而聽之不可得而聞也志氣塞乎天地之此謂五至

子夏曰五至既得而聞之矣敢問何謂三無孔子曰無聲之樂無體之禮無服之喪此之謂三無子夏曰三無既得畧而聞之矣敢問何詩近之孔子曰夙夜其命宥密無聲之樂也威威逮逮不可選也無體之禮也凡民有喪匍匐救之無服之喪也

子夏曰言則大矣美矣盛矣言盡於此而已乎孔子曰何為其然也君子之服之也猶有五起焉子夏曰何如孔子曰無聲之樂氣志不

違無體之禮威儀遲遲無服之喪內恕孔悲無聲之樂氣志既得無
體之禮威儀翼翼無服之喪施及四國無聲之樂氣志既從無體之
禮上下和同無服之喪以畜萬無聲之樂日聞四方無體之禮日就
月將無服之喪純德孔明無聲之樂氣志既起無體之禮施及四海
無服之喪施于孫子

子夏曰三王之德參於天地敢問何如斯可謂參天地矣孔子曰奉
三無私以勞天下子夏曰敢問何謂三無私孔子曰天無私覆地無
私載日月無私照奉斯三者以勞天下此之謂三無私其在詩曰
帝命不違至于湯齊湯降不遲聖敬日齊昭假遲遲上帝是祗帝命
式于九圍是湯之德也

天有四時。春、秋、冬、夏。風、雨、霜、露。無非教也。地載神氣。神氣風霆。風霆流形。庶物露生。無非教也。清明在躬。氣志如神。嗜欲將至。有開必先。天降時雨。山川出雲。其在詩曰。嵩高惟嶽。峻極于天。惟嶽降神。生甫及申。惟申及甫。惟周之翰。四國于蕃。四國于宣。此文武之德也。三代之王也。必先令聞。詩云。明明天子。令聞不已。三代之德也。弛其文德。協此四國。大王之德也。

子夏蹶然而起。負牆而立。曰。弟子敢不承乎。

五 即位

一 凡即位者。一國之始。春秋正即位者。大一統而慎始也。春秋之義。有正春者。無亂秋。有正君者。無危國。易曰。建其本而萬物理失之。

毫釐差以千里。是以君子貴建本而重立始也。漢書第五十一說苑

卷三

魏武侯問元年於吳子。吳子對曰。言國君必慎始也。慎始奈何。曰正之。正之奈何。曰明智。智不明何以見正。多聞而擇焉。所以明智也。說苑卷三。是故孔教者從智入者也。中庸曰。自明誠。謂之教。此孔教所以異於迷信之宗教也。

董仲舒曰。臣謹案春秋謂一元之意。一者萬物之所從始也。元者辭之所謂本也。謂一為元者。視大始而欲正本也。春秋深探其本而反自貴者始。故為人君者。正心以正朝廷。正朝廷以正百官。正百官以正萬民。正萬民以正四方。四方正。遠近莫敢不壹於正。而無有邪氣。

奸其間者。是以陰陽調而風雨時。羣生和而萬物殖。五穀熟而草木
茂。天地之間。被潤澤而大豐美。四海之內。聞盛德而皆徠臣。諸福之
祥物。可致之祥。莫不畢至。而王道終矣。漢書第五十六。此春秋始元
終麟之義也。自正於始。則瑞應於終矣。

劉向曰。是故古者君始聽治。大夫而一言。士而一見。庶人有謁必達。
公族請問必語。四方至者勿拒。可謂不壅蔽矣。分程必及。用刑必中。
君心必仁。思君之利。除君之害。可謂不失民衆矣。君身必正。近臣必
選。大夫必兼官。執民柄者不在族。可謂不權勢矣。此皆春秋之義。而
元年之本也。說苑卷三要而言之。君之始政。以民為主。不得自尊貴
而蔽民意。不得失政刑而失民衆。又不得私親族而專民柄也。

二 凡即位之禮先謁宗廟明繼祖也還之朝正君臣之位也事畢而反凶服焉公羊傳注桓公元年天子新崩則太子稱子某既殯而即繼體之位則暫時即吉告廟稱王緣臣民之心不可一日無君也故先君不可得見則後君繼體矣吉冕服受銅稱王以接諸侯明已繼體為君也釋冕藏銅反喪服明未稱王以統事也故既葬則稱子緣終始之義一年不二君也然亦不可曠年無君故踰年乃即位改元元以名年年以紀事君統事見矣而未發號令也百官總已以聽於冢宰三年緣孝子之心則三年不忍當也故三年除喪乃即位統事踐阼為主南面朝臣下稱王以發號令也百虎通諸侯之禮與天子通父在稱世子繫於君也父歿稱子某屈於尸柩

也。既葬既稱子，即尊之漸也。踰年稱公，不可曠年無君也。故春秋魯僖公三十三年十二月乙巳，公薨於小寢。文公元年春，王正月，公即位。夏四月丁巳，葬我君僖公。此雖先君未葬，而新君起踰年即得即位之義也。三年然後受爵於天子，緣孝子之心，未忍安吉也。是故天子及諸侯即位，凡有三時：一則既殯而即繼體之位，春秋定公元年夏六月癸亥，公之喪自至，乾侯戊辰，公即位，正棺於兩楹之間，然後即位也。蓋丁卯五日大斂，次日吉服即位也。二則踰年之即位，三則除喪之即位。天子三年然後稱王，諸侯雖踰年由臣子稱公，而於其封內自稱亦三年稱子也。公羊傳莊公三十二年文公九年定公元年白虎通曲禮疏。

三 凡即位授受之道也。先君無正終，則後君無正始也。先君有正終，則後君有正始也。昭公出奔，客死於外，其國當絕，故昭公之終，非正終也。定之始，非正始也。昭無正終，故定無正始也。是故春秋十二公之元年，惟定無正月，隱雖十年無正月，元年猶有之。穀梁傳

四 凡繼弑君子不言即位，無論以弟繼兄，以兄繼弟，或以臣繼君，皆以臣子一例言之。雖繼未踰年，君亦皆同義。公羊傳僖公元年，穀梁傳曰：繼故不言即位也。繼故不言即位之為正，何也？曰：先君不以其道終，則子弟不忍即位也。繼故而言即位，則是與聞乎弑也。繼故而言即位，是為與聞乎弑，何也？曰：先君不以其道終，已正即位之道，而即位，是無恩於先君也。桓公元年又莊公三十二年，子般以未踰

年君被弑。閔公以兄繼之。而春秋於閔公元年不書即位。穀梁傳曰。親之非父也。尊之非君也。繼之如君父也者。受國焉爾。蓋國家以繼體為重。傳重者即為之子。故親之如父。又未踰年君雖壓於一年。不二君之義。降於成君。然既繼其位。則尊之如君。隱之如一。此繼體之義也。凡不言即位者。非不行即位之禮也。雖實即位。而春秋不言之。以明義耳。凡外弑與內弑皆同。

隱公有讓國之意。事雖不成。而春秋不書即位。以成其讓。桓公弑君兄而立。雖繼弑君不言即位。而春秋特如其意書即位。以著其惡。此以見春秋之好微而貴志也。

五 凡未踰年君卒。皆不成於君。示一年不二君位也。故稱子而不

稱公言卒而不言薨其卒又不地降成君從子從大夫之禮也不成君則不廟以廟者當序於昭穆也不廟則無謚故不書葬且臣下亦無服蓋其卒尚在臣下為前君服斬之時不得廢重服輕而為之服期若為斬衰三年又違一年不二君之義故無服也公羊傳莊公三十一年襄公三十一年

六 凡禪而非繼者其即位之禮當無異於繼世尚書堯典曰放勳乃徂落百姓如喪考妣三年四海遏密八音月正元日舜假于文祖蓋三年喪畢舜乃改堯之建丑為建子而即位於明堂也文祖者明堂也百姓者羣臣也春秋之義臣子一例以臣繼君猶以子繼父故雖異姓亦猶是也

六 傳統

一 凡國家之爭亂多起於君位之繼承。孔子欲防其爭，勢必先定其法。隱公十年公羊傳曰：立適以長不以賢，立子以貴不以長。何注曰：適謂適夫人之子，尊無與敵，故以齒。子謂左右媵及姪娣之子，位有貴賤，又防其同時而生，故以貴也。禮適夫人無子，立右媵，右媵無子，立左媵，左媵無子，立適姪娣，適姪娣無子，立右媵姪娣，右媵姪娣無子，立左媵姪娣，質家親親先立娣，文家尊尊先立姪，適子有孫而死，質家親親先立弟，文家尊尊先立孫，其雙生也。質家據見立先生，文家據本意立後生，皆所以防愛爭。按文質二家隨時所宜，孔子原不偏重，惟既擇用何家，必當專主其一，庶有法守。若以春秋論之，則

改文從質尤尚質家也。

二 凡君薨適夫人無子而有遺腹必待其產而立之所以尊適重正也。百虎通左傳哀公三年季桓子有遺命若其之遺腹子男也則立之女也則立其庶子是其例矣。據禮記曾子問君薨而有遺腹子當由上卿代攝國政孔子謂之攝主蓋孔子純用責任內閣之制君主無責任也。不然因尊適之故乃至虛懸君位以待遺腹之產而後立之孰若擇立庶子之貴者猶令國有長君哉。由是言之孔子蓋以君主可無責任而君位必當前定若適夫人稍有一綫之希望亦不令庶孽得乘間而覬覦也。

三 凡始封之君無子不得傳諸兄弟繼體之君無子則得及親屬。

蓋繼世以立諸侯象賢也。兄弟非賢者子孫也。至繼體之君與親屬皆賢者子孫重其先祖之功故得及之也。微子雖為宋始封之君然宋本以奉商祀微子不得為太祖故微仲以弟而繼微子與繼體之君無子得及親屬同也。凡繼體之君無子當立母弟無母弟則立庶兄弟以及諸父從昆弟等此由親及疏之序也。凡始封之君不臣諸父昆弟封君之子不臣諸父而臣昆弟既不得而臣故始封之君不得以諸父及昆弟為子封君之子不得以諸父為子若封君之孫以下則盡臣諸父父昆弟既得而臣之即得而子之蓋臣子一例以臣繼君猶以子繼父故僖公雖為閔公庶兄而既繼閔公則春秋稱為子也。然國家以繼統為重以義斷恩故不論諸父昆弟皆以臣子視

之若合祭於廟則以恩掩義故雖據為君之先後序主位之上下而兄弟仍同昭穆蓋自先君視之兄弟自各當為兄弟也至於卿大夫既無國可世自不得以兄弟為後而亂昭穆必昭穆相當者乃得為後也百虎通儀禮喪服傳公羊傳注僖公元年文公二年成公十五年

四 凡國君有子宜傳諸子不得傳弟若不傳子而傳弟雖有讓德不足為法且開爭原春秋前七年宋宣公不傳國于其子與夷而傳于其弟繆公隱公三年宋繆公卒又不傳于其子馮而反國乎與夷是為殤公其後桓公二年馮弑殤公而立是為莊公公羊傳曰君子大居正宋之禍宣公為之也夫讓國者春秋之所善今宣公不與其

子而與弟繆公亦不與子而反之。兄子雖不中法，皆有讓高。故春秋于馮之弑殤公，不曰弑馮而歸罪於宋督，所以為宣繆諱也。此春秋之善善無遺也。然宣公雖讓而不成於賢，故春秋雖存其善志而責其不能居正，反為禍首。此以見孔子之尊重法律為何如也。繆公雖亦不傳子，且臨死乃讓，更嫌太遲，但反國兄子終屬得正，故春秋不責之也。公羊傳及春秋繁露第四。

五 凡異姓不得為後。若立異姓為後，等於國滅，其為後者亦當坐滅國。襄公六年春秋曰：莒人滅鄆。莒人者，莒之公子而鄆之外孫也。鄆立異姓為後，犯孔子之族制，故以滅言之。穀梁傳曰：家有既亡國，有既滅滅而不自知，由別之而不別也。莒人滅鄆，非滅也，非立異姓。

以蒞祭祀滅亡之道也

七 世子

一 凡世子為國本所繫宜早立之使威明顯見雖母弟之親猶有臣志則防篡壓亂莫敢覬覦矣（大戴禮第六十七）若立儲不明致成亂階則其身當絕此春秋所以不書齊侯潘之葬也（公羊傳注文公十四年）

二 凡世子生三月父名之于祖廟明當為宗廟主也又告于四竟所以遏絕亂萌禁備未然也若匿嫡之名不以名令于四竟擇勇猛者而立之不分嫡庶不尚文德則狄道也（公羊傳桓公六年昭公五年穀梁傳隱公七年）

賈誼新書立後義曰古之聖帝將立世子則帝自朝服舁自阼階上西鄉於妃妃抱世子自房出東鄉太史奉書西上堂當兩階之間北面立曰世子名曰某者參帝執禮稱辭命世子曰度太祖太宗與社稷於子者參其命曰也妃曰不敢者再於三命曰謹受命拜而退太史以告太祝太祝以告太祖太祖宗與社稷太史出以告太宰太宰以告州伯州伯命藏之州府凡諸貴已下至于百姓男女無敢與世子同名者夫執明則民定而出於一道故人皆爭為宰相而不姦為世子非宰相尊而世子卑也不可以智求不可以力爭也如此則親戚相愛而兄弟不爭此天下之至義也民之不爭亦惟學王宮邦君室也

三 凡國君年六十尚無適子則立庶之貴者將薨亦如之公羊傳注隱公元年

四 凡立太子當設如宗社不得易之大戴禮第六十七

五 凡有惡疾者不得入乎宗廟雖適長子亦當廢此衛侯之兄輒所以不得立也公羊傳穀梁傳昭公二十年惟廢立宜早衛襄公不早廢輒臨死乃命臣下廢之自下廢上鮮不為亂故春秋於昭公七年書衛襄公之葬當時而曰危之也

六 凡太子無道有危社稷宗廟之禍端則當廢之故薛比失眾見弑春秋歸惡於其父薛伯定公羊傳注定公十二年

七 凡太子無罪雖其父不得殺之蓋人人皆天所生父不得專之

也。白虎通康誥曰：于父不能字厥子，乃疾厥子。文王作罰，刑茲無赦。故父無殺子之權也。若殺太子，則父罪尤重。僖公五年，春秋曰：春，晉侯殺其世子申生，甚惡之也。

八 凡父逐太子而無殺子之意，則子不當去。父出奔，父亦本不當逐子。即有大惡，監禁之深宮而已。定公十四年，春秋曰：衛蒯聵出奔宋，兩譏之也。而惡世子之去父尤甚。

九 凡太子犯父命，父得去之。廢太子既喪失其資格，即不得有父之國。若父立太子之子以為君，太子亦不得以其為己之子也。而奪之其子，雖以讓國為高義，然因順王父之命而立，亦為得正。蓋不以父命辭王父命，以王父命辭父命，是父之行乎子也。此尊本重統之義。

也是故以義論之。孔子固不許衛世子蒯聵之爭國。不過以恩論之。孔子亦不許衛輒之因爭國而拒父耳。蓋輒者可立而未盡善者也。能讓國而去。則盡善矣。若蒯聵則無一而可者也。公羊傳哀公二年三年論語第七。

十 凡大夫不得立不宜立者。惟君稍得立之。君之立不宜立者。非也。既立之。大夫奉之。是也。是故晉獻公殺太子申生而立奚齊。可謂不正矣。然而荀息之奉奚齊。春秋是之。蓋尊本重統。欲國權之定於一。故許君國君有立嗣之權。甚至違反憲法。所立不正。春秋固以為不合。然亦不得已而認之為君。蓋事勢已成。壞法之舉。既無從補救。則惟有兩害取輕。承認已立之君。而正其名分。以杜絕反覆篡弒爭。

奪無窮之禍耳。此孔^子維持現狀不得已之苦心也。春秋繁露第四公

羊傳僖公九年十年

十一 凡弑太子者與弑君同罪。所以正名而定分也。僖公九年春。秋曰。冬。晉里克弑其君之子奚齊。明與弑君同也。百虎通言君之子者。見其父之私。不正其殺太子申生而立之也。穀梁傳弑未踰年君例。當月不月者。不正遇禍。終始惡明。故略之也。公羊傳注

十二 凡君既見弑。又無適子。則貴妾之子當立。所以尊君防篡弑也。若當立之子不得立。為人所篡。逃於外國。而篡國者又迫外國人殺之。則迫殺者及代殺者之兩國人。皆當坐弑君。蓋既為當立之子。雖未經立為太子。而名義所在。已分定而不可爭。不以其不得成君。

而許人之篡之也。此孔子杜絕爭端之意也。莊公九年春秋曰九月齊人取子糾殺之。即此義矣。稱子糾明其貴而宜為君也。從君薨稱子某之例也。公羊傳注白虎通。

八 攝政

一 凡攝政與攝位異。攝位者成之為君。此外雖有候補之君。並無現成之君也。如魯隱公為桓公幼而以兄攝位。宋繆公為與夷幼而以叔攝位。雖云權立已為即真。君臣之名分定矣。攝政者代君聽政。不成為君。而別有現成之君在也。如堯老而舜攝。成王幼而周公攝。舜周非君。而堯成乃君也。又君薨而世子生。則上卿為攝主。禮記曾子問。君薨而世子不言。則冢宰聽百官皆攝政之謂也。是故攝政者

必以最尊之卿相為之分定而無所爭也。

二 凡父老不得以子攝政。以春秋譏父老子代從政。父子交譏之也。公羊傳桓公九年襄公十九年所以立人子之坊也。子幼不得由母聽政。以孔子明定上卿攝主之制。而六經無母后從聽政之文。反有夫死從子之義。穀梁傳且明著毋使婦人與國事之禁也。僖公九年觀此則知夫有故亦不得由妻主政矣。所以絕女禍之媒也。

九 篡弒

一 凡立嗣當由法定。本有常位。故春秋不言立。言立者皆不宜立者也。所以惡受擁立者也。彼不得民望。妄干大位者。無論矣。即使賢而得眾。為眾所擁戴。亦非正也。蓋春秋之義。與正而不與賢也。夫多賢

不可以多君。無賢不可以無君。立君非以尚賢。所以明有統也。建儲非以私親。所以定名分也。名分定則賢無亂長之階。而自賢之禍塞矣。君無嬖幸之由。而私愛之道滅矣。隱公四年。春秋曰。冬十有二月。衛人立晉。稱人者。美其得眾也。稱滅立者。著其篡也。善惡不相掩也。夫以眾人之所擁戴。而猶不得為正。不免為篡。則孔子之所謂立嗣。純乎以法律為主矣。春秋之書此者。主於惡晉之受位也。夫苟無受擁戴者。則自無擁戴者。即有之。禍亦少殺。故孔子疾其末。則正其本。擒賊擒王。歸罪於首惡。所以杜亂源也。公羊傳穀梁傳。

二 凡春秋書篡之例。弑君而立者。不以當國之辭言之。如文公十四年。秋。齊公子商人弑其君舍。不去公子。是也。蓋弑君取國。不嫌非

篡也。非弑君而立者。以當國之辭言之。如衛晉言立。蒯聵言納。小白言入。是也。蓋恐其篡不明也。國人立之曰立。隱公四年衛人立晉是也。他國立之曰納。哀公二年夏晉趙鞅帥師納衛世子蒯聵于戚是也。從外曰入。莊公九年夏齊小白入于齊是也。有屬託力則加自文。昭公元年秋莒去疾自齊入于莒是也。凡立納入三者皆篡辭也。若本為篡位。而春秋有他故。無立納入之文。以書之。則其篡不明。例不書葬以明之。凡篡之罪。當絕其身而不絕其國。公羊傳注莊公六年

二十五年

三 凡國君之尊。雖其祖母及母。亦不得弑之。弑則坐弑君之罪。文公十六年。春秋曰。冬十有一月。宋人弑其君處。白。宋人者。君祖母王

姬也。謂之人者賤之也。魯莊公之夫人哀姜與弑子般及閔公。春秋貶之。於僖公元年書曰。十有二月丁巳。夫人氏之喪。自至齊。不稱姜氏。明王法所加。臣子不得以夫人禮治其喪也。弑子差輕於弑夫。故哀姜去姜留氏。文姜與弑其夫桓公。則並姜氏二字盡去之。莊公元年。春秋曰。三月夫人孫于齊。時莊公實因文姜在齊。迎之歸魯。以伸其念母之意。春秋不許其念母。故不書迎。而反書孫。言王法所當誅也。夫為母犯罪。至於不許其子罪念之。又祖母弑孫。母弑子。皆與尋常人同罪。此重本尊統之義。不使為母后者得假其地位而亂國也。

四 凡攝位之君。雖非當立者。然君位既正。舉國之人。無論尊卑戚屬。莫非臣子。弑之者必罪無可逃。如隱公雖不宜立。而既受之先君。

告之天子。桓公亦嘗北面事之。則君臣之分已定。不得以其攝位而不認之為君也。既成為君。則篡弑之者當誅矣。此春秋所以成隱公為君。不書其葬。以明其被弑也。

五 凡現成之君。雖候補之君。亦不得弑之。不問其當立不當立。惟以在位不在位為斷。所以絕禍亂也。魯桓公為貴妾子。本宜立者。以年幼由隱公攝位。桓既北面君事之矣。乃竟弑之。故春秋於桓公一篇。除元年二年十年十八年之外。皆不書王。罪桓公無王而行也。其元年十八年有王者。以王法治其終始也。二年有王者。正宋公與夷之卒也。十年有王者。正曹伯終生之卒也。皆無與於桓者也。春秋於桓公元年書曰。春王正月。穀梁傳曰。桓無王。其曰王何也。謹始也。其

曰無王何也桓弟弑兄臣弑君天子不能定諸侯不能救百姓不能去以為無王之能道遂可以至焉爾元年有王所以治桓也

六 凡人君之立無論其本來正與不正但既立之後已成為君則不得弑之所以杜爭亂也襄公十四年衛甯殖與孫林父逐衛侯衎而立公孫剽剽之立本不正也二十年殖將死遺命其子喜去剽納衎二十六年春秋曰春王二月辛卯衛甯喜弑其君剽穀梁傳曰此不正其日何也殖也立之喜也君之正也蓋父所立而奉之者雖不正亦正不得盲從父命而再犯篡弑之罪故特書日以別於凡弑不正者也文公十四年夏五月齊侯潘卒本當立適子商人乃潘於未卒之前頗有立庶子舍之意商人恐舍緣意_潘為害故先立舍而復弑

之此其反覆變詐已立之已弑之比他臣之弑君實罪加一等故春秋於是年九月書曰齊公子商人弑其君舍以未踰年君應稱子者而稱君所以成死者而賤生者也不日者不正遇禍終始惡明故畧之也

七 凡弑君自立者本負必討之罪不當縱之使生更不當戴之為君若全國臣民既不討賊而醜然事之則彼雖起自亂賊而已成其為君名分大定有殺之者自不得為討賊而當坐弑君矣文公十八年春秋曰夏五月戊戌齊人弑其君商人夫春秋於弑君之賊例絕之使不復見商人於前四年弑其君舍今復見者所以責齊人之不討賊尤所以責齊人之既君之而又弑之也事之四年而弑之一旦

斯固名分所不許者矣。是故凡已為君者，苟非若桀紂之無道，自有不受殺戮之權利也。此所以保障君權，亦即所以保障平和者也。

八 凡被脅篡立者，宜效死不立。若為人利用以成篡弑，則雖無弑君之意，當坐弑君之罪。昭公十三年，春秋曰：夏四月，楚公子比自晉歸于楚，弑其君虔于乾谿。其言歸者，無惡于弑立也。然而加弑焉者，楚公子棄疾脅比而立之，比之義宜乎效死不立。今既不能而受脅首亂，故當坐弑也。此孔子惡乎被脅為惡者，使不得誣罪於人以自解也。苟人人能效死而不受脅，則作惡者不得假他人以成事而爭亂必少，平和可保矣。

九 凡已奉人為君，則名分已定。人雖不成君，若已殺之，仍當坐君

弑君。楚公子棄疾本有弑君自立之意。乃先脅公子比而立之。以藉比立而弑其君。虔于乾谿。後又弑比自立。其弑比之心。早在弑虔之前。當比立之時。棄疾為比之自司馬。無論其誠心臣事與否。而君臣之名已定矣。故春秋書曰。楚公子棄疾弑公子比。不曰其君比而曰公子比者。不成為君也。然而曰弑者。著棄疾之罪也。公羊傳昭公十三年。

十 被篡弑者之罪

春秋之義。不但責臣之篡弑。亦責君之被篡弑。凡國君為臣所逐而出奔。臣之罪多矣。然苟非其君失眾。致強臣跋扈。則臣亦焉能逐君。此春秋於襄公十三年。所以不書衛孫林父甯

殖出其君而書衛侯衍出奔齊獨舉君絕為重也。凡出奔者當絕。今復名之其絕更顯見其不合為諸侯也。據左傳襄公二十年甯殖謂其子曰吾得罪於君悔而無及也。名藏在諸侯之策曰出孫林父甯殖出其君則不修之春秋必書孫甯逐君而不以衛侯自出奔為文。特孔子以為以臣逐君不可以訓故改為出奔之辭。因以責其失眾見逐之罪。孔子並非輕孫甯之惡。特臣之所以能作惡者君實有以致之。故書出奔以絕其君明以國為重也。

孫甯逐君之後列國之君多以是為孫甯罪而晉師曠獨以是罪衛君。其論精粹能探君道之要明民權之重足以與春秋之義相發明。謹從左傳錄之如左。

師曠侍於晉侯。晉侯曰：「衛人出其君，不亦甚乎？」對曰：「或者其君實甚。良君將賞善而刑淫，養民如子，蓋之如天，容之如地，民奉其君，愛之如父母，仰之如日月，敬之如神明，畏之如雷霆，其可出乎？夫君神之主也，民之望也。若困民之主，匱神乏祀，百姓絕望，社稷無主，將安用之？弗去何為？」天生民而立之君，使司牧之，勿使失性。有君而為之貳，使師保之，勿使過度。是故天子有公，諸侯有卿，卿置側室，大夫有貳宗，士有朋友，庶人工商，皃隸牧圉，皆有親暱，以相輔佐也。善則賞之，過則匡之，患則救之，失則革之。自王以下，各有父兄子弟，以補察其政。史為書，瞽為詩，工誦箴諫，大夫規誨，士傳言，庶人謗，商旅於市，百工獻藝。故夏書曰：『道人以木鐸徇於路。』官師相規，工執藝事以諫，正

月孟春於是乎有之諫失常也天之愛民甚矣豈其使一人肆於民上以從其淫而棄天地之性必不然矣左傳襄公十四年

昭公二十一年冬蔡侯朱出奔楚為東國所篡也然春秋不書東國之篡者惡朱以失眾見篡也凡被篡者皆失眾所致故春秋以之罪君也公羊傳注昭公二十三年

凡失眾被弑之君雖被弑仍當坐絕文公十八年春秋曰莒弑其君庶其公羊傳曰稱國以弑者眾弑君之辭何注曰一人弑君國大中人盡喜故舉國以明失眾當坐絕也例皆時者略之也

成公十八年正月春秋曰庚申晉弑其君州蒲何注曰日月者二月庚申日上繫於正月者起正月見幽二月庚申日死也厲公猥殺四大夫

臣下人人恐見及。以致此禍。故日起其事。深為有國者戒也。魯語曰。晉人殺厲公。邊人以告。成公在朝。公曰。臣殺其君。誰之過也。大夫莫對。里革曰。君之過也。夫君人者。其威大矣。失威而至於殺。其過多矣。且夫君也者。將牧民而正其邪者也。若君縱私回而棄民事。民旁有慝。無由省之。益邪多矣。若以邪臨民。臨而不振。用善不肯專。則不能使至於殄滅。而莫之恤也。將安用之。桀奔南巢。紂踣于京。厲流于彘。幽滅于戲。皆是術也。夫君也者。民之川澤也。行而從之。美惡皆君之由。民何能為焉。國語卷四。凡此皆君弑而坐罪於君之義也。凡無道被弑之君。春秋不日以惡之。蓋春秋之義。不問加弑與否。例皆書日。惟昭公十三年。春秋曰。夏四月。楚公子比自晉歸于楚。弑其

若虔于乾谿不書弑日惡楚靈王之無道也夫晉靈公亦無道然猶書其日則以晉靈止宮中暴虐害不及民又有趙盾諸人執政非若楚靈之黷武樂禍外肆殄滅內極力役殃民淫刑多行不義其無道為尤甚也

總而言之春秋雖尊君權然亦甚重君責以臣子篡弑之大罪而春秋猶歸其罪於君則君者固非立於神聖不可侵犯之地位雖被篡弑亦咎由自取矣此以見韓愈所謂神臣罪當誅天王聖明者非孔子之道也

十一 似篡弑而非篡弑

孟子曰民為貴社稷次之君為輕第十四此定義也是故君也者非

一即君位便可肆行無忌而自免於罪也。凡危國賊民之君輕則失位重則受戮。且並君臣之名義亦不能存在。故雖遇篡弑之事亦不可謂之篡弑也。此所以誅惡君也。

凡下謂無廢上之義所以保君權。然苟犯大罪則春秋絕之。僖公二十四年春秋曰冬天王出居于鄭蓋五刑之屬三千而罪莫大於不孝。周襄王不能乎母故春秋言出以絕之。明母得廢之臣下得從母命也。此似篡而非篡者也。

孟子論貴戚之卿曰君有大過則諫反覆之而不聽則去易位此亦似篡而非篡者也。然非惟貴戚之卿為然也。雖異姓之卿亦得為之。公孫丑問於孟子曰伊尹曰予不狎于不順放太甲于桐民大悅太

甲賢又反之民大悅賢者之為人臣也其君不賢則固可放與孟子曰有伊尹之志則可無伊尹之志則篡也是異姓之卿亦得廢立也孟子又曰諸侯危社稷則變置蓋國重君輕既欲安國而存之則不能不廢君而去之也故不得謂之篡也第十第十三第十四

凡無道之君理當誅絕者雖以臣弑君亦不得謂之弑以其無君臣之義也孔子曰湯武革命順乎天而應乎人革之時大矣哉易齊宣王問於孟子曰湯放桀武王伐紂有諸孟子對曰於傳有之曰臣弑其君可乎曰賊仁者謂之賊賊義者謂之殘殘賊之人謂之一夫聞誅一夫紂矣未聞弑君也第三荀子曰能用天下之謂王湯武非取天下也脩其道行其義興天下之同利除天下之同害而天下歸之

也。桀紂非去天下也。反禹湯之德。亂禮義之分。禽獸之行。積其凶。全其惡。而天下去之也。天下歸之之謂王。天下去去之之謂亡。故桀紂無天下。而湯武不弑君。由此效之也。湯武者民之父母也。桀紂者民之怨賊也。今世俗之為說者。以桀紂為君。而以湯武為弑。然則是誅民之父母。而師民之怨賊也。不祥莫大焉。第十八春秋繁露曰。君也者。掌令者也。令行而禁止也。今桀紂令天下而不行。禁天下而不止。安在其能臣天下也。果不能臣天下。何謂湯武弑。第二十五是故君而無道。即失其為君之資格。若聖人有作。順天應人。則雖行篡弑之事。而不得名之曰篡弑。此所以奪暴君之所恃也。然苟以暴易暴。則縱能革命。亦非孔子所許。蓋革命者不得已之事。出於時勢之不得

不然而非可輕舉妄動者也。



卷第十一 職官

一 官制

一 凡冢宰為王之貳。所謂總理大臣也。孔子曰。君薨。百官總己以聽於冢宰。三年。論語第十四。所以聽於冢宰者。以冢宰職在制國之用。是以由之也。王制曰。冢宰制國用。然則財政重要。固以總理兼掌之矣。所以名為冢宰者。冢者大也。宰者制也。大者制事也。蓋總御眾官。不主一官之事也。百虎通。僖公九年。春秋稱宰周公。蓋三公中之為冢宰者也。是故冢宰之職。號尊名。實以三公中之一人兼任之。職大尊重。為天子參聽萬機者也。

二 凡國有當國之大臣。則君主無責任。昔舜封象於有庠。而象不

得有為於其國。天子使吏治其國，而納其貢稅焉。孟子第九此國務大臣負責，而君主無責任之制之最古者也。國君幼稚，則孔子不備責童子，而惟責當國大臣。春秋於昭公二十三年，書尹氏立王子朝，不貶王子朝而貶尹氏是也。凡國君老耄幼小，皆但令大夫受其罪。百虎通此責任大臣之義也。

三 凡三公之職。公羊傳曰：天子三公者何？天子之相也。天子之相則何以三？自陝而東者，周公主之；自陝而西者，召公寧之一相處乎。內隱公五年，百虎通曰：司馬主兵，司徒主人，司空主土。王者受命為天地人之職，故分職以置三公，各主其一以効其功。天者施生，所以主兵何？兵者為謀除害也。所以全其生，衛其養也。故兵稱天寇賊猛。

獸皆為除害者所主也。不言兵言馬者。馬陽物。乾之所為。行兵用也。不以傷害為文。故言馬也。司徒主人。不言人言徒者。徒眾也。重民眾。司空主土。不言土言空者。空尚主之。何況於實。以微見著。合此二說。觀之。則三公分職。有以政事分者。有以地方分者。必合之始備。蓋分陝出巡。意主黜陟。非常常為之。故一面可常任所主之政。一面可暫任所分之地也。司馬司徒司空亦稱天公。人公地公。故有謂司馬主天者。有謂司馬順天者。然其所以使天公主兵。則以天好生而惡殺。主兵者本所以生人。非所以殺人。職在除害。而不在爭利。故主兵之事。不屬諸他官。而屬諸天公也。馬者甲兵之本。而兵者不祥之器。避凶器之名。而第言馬。此又見備兵而不欲用兵之意。即在於主兵者。

之官名內也。

四 凡天子之官制三公九卿二十七大夫八十一元士凡百二十
官下應十二子公羊傳注桓公八年十二子者十二辰也一公置三
卿故九卿也天道莫不成於三天有三光日月星地有三形高下平
人有三等君父師故一公三卿佐之一卿三大夫佐之一大夫三元
士佐之百虎通元者善也善士者命士也上中下士皆稱元士也王
制注疏惟春秋繁露以元士即上士而別有二百四十三下士蓋分
士為二等無中士也殆春秋質家之制多立小官以重民歟
五 凡王官之等三公一位上大夫卿一位下大夫一位上士一位
中士一位下士一位凡六等其命則三公八命數若有加則賜也不過

九命。卿六命。大夫四命。上中下士三命。再命一命。

大夫視子男。方五十里。

六 凡王官受采之制。三公視公侯。田方百里。卿視伯。方七十里。上中下士視附庸。方三十里。二十里。十五里。凡天子縣內諸侯。世祿不世爵。子孫無罪。則其祖父之采邑。有罪則奪之。王制所謂采者。不得有其土地人民。采取其祖稅爾。公羊傳襄公十五年。

七 凡諸侯入為天子大夫。不得氏國稱本爵。以所受采邑氏稱子。如劉子是也。稱子者。參見義。則見諸侯不生名。二則見其原有本爵。三則見其為天子大夫。凡諸侯入為天子大夫。各依其本國之命數。不加不降。直以入仕為榮。不必加也。既食其本國之采。更受采地於京師。共食兩采。天子使大夫為治其國。有功而卒者。當益封其子。春

秋於定公四年書葬劉卷卒又書葬劉文公時劉卷以功益封故不以
故國而以采地書葬其事因思以廣義也稱公者明本諸侯也又以
見王室之卿大夫其尊與諸侯並也凡受采京師之制有二有受而
傳之別子與本國宗子並傳諸後者如劉卷及周公召公是也有沒
後仍歸采地於王朝其子但襲本爵於故國者如衛武公齊丁公並
入為卿士不聞有子孫世守采地於京師也公羊傳注襄公十五年
定公四年禮記王制

八 凡諸侯之官制上大夫亦曰卿或曰上卿下大夫亦曰下卿上
士中士下士凡五等大國三卿皆命於天子下大夫五人上士九人
中士九人下士九人共二十七人次國三卿二卿命於天子一卿命

命於其君。下大夫五。士二十七。人。小國亦三卿。一卿命於天子。二卿命於其君。下大夫五。士亦二十七。人。大國之卿。不過三命。下卿再命。次國上卿再命。下卿一命。小國上下卿並皆一命。大國次國小國大夫皆同一命。士則不命。禮記王制。此王制之法也。據公羊傳。襄公十一年。則上卿下卿。上士下士。凡四等。無中士也。其人數則春秋繁露詳之。蓋無論大國次國小國。皆三卿九大夫二十七上士八十一下士。惟爵遞降而祿遞減耳。此殆春秋制歟。

二 官祿

凡全社會之人。不得無事而食。故所受之祿。名曰代耕。此平等而食功之意也。

凡制祿以農夫之收入為本位。一夫百畝。百畝之糞。上農夫食九人。上次食八人。中食七人。中次食六人。下食五人。庶人在官者。其祿以是為差也。

諸侯之下士。視上農夫祿。足以代其耕也。中士倍下士。上士倍中士。下大夫倍上士。大國之卿。四大夫祿。君十卿祿。次國之卿。三大夫祿。君十卿祿。小國之卿。倍大夫祿。君十卿祿。

諸侯之下士。祿食九人。中士食十八人。上士食三十六人。下大夫食七十二人。大國之卿。食二百八十八人。君食二千八百八十人。次國之二卿。命於天子者。食二百一十六人。其一卿命於其君者。如小國之卿。食百四十四人。君食二千一百六十人。小國三卿。不論命於天

子及命於其君者皆食百四十人。君食千四百四十人。（王制）
天子之祿食若干人。經無明文。以君十卿祿之義例之。則當十倍大
國之君也。即食二萬八千八百人也。

三 用賢

大學治國平天下一章。祇言用人理財兩事。蓋用人為治平之本也。
故引楚書曰。楚國無以為寶。惟善以為寶。又曰。見賢而不能舉。舉而
不能先。命也。見不善而不能退。退而不能遠。過也。然則天下國家之
治亂。即於其所用之賢不賢決之耳。

春秋繁露曰。氣之清者為精。人之清者為賢。治身者以積精為寶。治
國者以積賢為道。身以心為本。國以君為主。精積於其本。則血氣相

承受賢積於其主則上下相制使血氣相承受則形體無所苦上下相制使則百官各得其所形體無所苦然後身可得而安也百官各得其所然後國可得而守也夫欲致精者必虛靜其形欲致賢必卑謙其身形靜志虛者精氣之所趣也謙尊自卑者仁賢之所事也故治身者務執虛靜以致精治國者務盡卑謙以致賢能致精則合明而壽能致賢則德澤洽而國太平第二十二以身比國故此篇名曰通國身也能致賢則國太平然則欲使天下國家長治久安而享平和之福者非致賢不可矣

春秋繁露曰是故為春秋者得一端而多連之見一空而傳貫之則天下盡矣魯僖公以亂即位而知親任季子季子無恙之時內無臣

下之亂外無諸侯之患行之二十年國家安寧季子卒之後魯不支鄰國之患直乞師楚耳僖公之情非輒不肖而國益衰危者何也以無季子也以魯人之若是也亦知他國皆若是也之以他國之皆若是亦知天下之皆若是也此之謂連而貫之故天下雖大古今雖久以是定矣以所任賢謂之主尊國安所任非其人謂之主卑國危萬世必然無所疑也其在易曰鼎折足覆公餗夫鼎折足任非其人者也覆公餗者國家傾也是故任非其人而國家不傾者自古至今未嘗聞也故吾按春秋而觀成敗乃切悃悃於前世之興亡也任賢臣者國家之興也夫智不足以知賢無可奈何矣知之不能任大者以死亡小者以亂危其若是何耶以莊公不知季子賢耶安知病將死召而授

以國政以殤公為不知孔父賢耶安知孔父死已必死趨而救之二
主知皆足以知賢而不決不能任故魯莊以危宋殤以弑使莊公早
用季子而宋殤素任孔父尚將興鄰國豈直免弑哉此吾所悵悵而
悲者也第五

一 凡春秋於失賢之君特貶其爵桓公十七年書曰葬蔡桓侯是
也何注曰稱侯者亦奪臣子辭也有賢弟而不能任用反疾害之而
立獻舞國幾并於蠻荆故賢季抑桓稱侯所以起其事蓋春秋之例
諸侯之葬皆稱公今桓侯疾害賢弟蔡季當立而不立幾召亡國之
禍故春秋降其爵不稱公而稱侯也

二 凡春秋之所賢而字之者皆起其宜為天子大夫也魯季子叔

肝蔡季紀季是也。公羊傳注桓公十七年

三 凡為治以求賢為主。不得令親貴在位。以致失賢。親而賢者。固可用之。但不得專以其親而用之也。孔教雖重親親。然不許任子弟以事權。故春秋於公子慶父不言弟。於叔服不稱王子。於王季子不稱弟。因當時天子諸侯。不務求賢而專貴親親。故尤其在位子弟。刺其早任以權也。公羊傳注莊公二年。文公元年。宣公十年。

四 凡親而尊者。當尊之以禮。不當尊之以權。任以權則有貴戚之禍。宣公十五年。春秋曰。王札子殺召伯毛伯。王札子者。長庶之號也。札者。冠且字也。禮君於諸父兄。不名。所以尊之也。子者。王子也。春秋之法。天子不言子弟。故變文上札。不稱王子札。而稱王札子。繫先王

以明之不稱伯仲者。辟同母兄弟起其為庶兄也。主書者惡天子不以禮尊之而任以權。至令殺尊卿二人也。

五 凡公卿大夫士皆當選賢而用之。不當世為其秉政久。恩德廣。大小人居之。必奪君之威權。故尹氏世立王子朝。齊崔氏世弑其君光。孔子疾其末則正其本。故尹氏立王子朝。在昭公二十三年。而春秋先於隱公三年書尹氏卒。齊崔弑其君光。在襄公二十五年。而春秋先於宣公十年書齊崔氏出奔衛。稱尹氏崔氏者。皆貶之以見譏。世卿之義也。尊莫大於周室。彊莫大於齊國。世卿猶能危之。故特託周齊以垂戒。此孔子所以為社會革命之人也。凡天子大夫世祿。不世爵。諸侯之大夫不世爵祿。此王制之義也。由譏世卿之義推之。則

天子諸侯不當世。可不言而見矣。

六 凡大夫七十致仕。父老不得以子代從政。白虎通曰。臣年七十懸車致仕者。臣以執事趨走為職。七十耳目不聰明。是以退老去避賢者路。所以長廉遠耻也。懸車示不用也。致仕者致其事於君。君不使退而自去者。尊賢者也。桓公五年。春秋曰。天王使仍叔之子來聘。公羊傳曰。仍叔之子者何。天子之大夫也。其稱仍叔之子何。譏父老子代從政也。穀梁傳曰。微其君臣而著其父子。不正父在子代仕之辭也。蓋天子大夫例當名氏。今不著其名氏。而但曰誰之子。所謂微其君臣而著其父子也微者著之反。即微其文而不著其君臣之分也。君臣之義當以任賢為主。今仍叔之子乃以父子之親亂君臣之義。

故春秋不正其辭以譏之亦譏世卿之義也

七 凡賞罰當案功罪案見勞授賞則眾譽不能進無功案見惡行誅則眾讒不能退無罪故春秋雖尹氏譏為世卿亦非無故驅逐因其卒乃絕之公羊傳注隱公三年新序引太公曰其君以譽為功以毀為罪有功者不賞有罪者不罰多黨者進少黨者退是以羣臣比周而蔽賢百吏羣黨而多姦忠臣以誹死於無罪邪臣以譽賞於無功其國見於危亡然則由春秋之道賞罰悉以功罪為斷不動於毀譽之浮言則國家可以安存矣今世以政黨執政不問功罪惟以黨勢強弱為進退者異乎春秋之義矣固非大公無私之道也乎

四 選舉

中國古代以世卿為常法。雖有非常之君。偶舉非常之人。然不為定制也。其行政官吏。悉出於選舉者。實源於孔子之經義耳。孔子作春秋。既譏世卿以正其本。失復於內外之君。且出奔皆書之。以著其乖離之禍。何休曰。當春秋時。廢選舉之務。置不肖於位。輒退絕之以生過失。至於君臣忿爭出奔。國家之所以昏亂。社稷之所以危亡。故皆錄之。公羊傳注。隱公元年。此則不行選舉之禍也。

一 凡選舉之制。諸侯三年一貢士於天子。天子命與諸侯輔助為政。所以通賢共治。示不獨尊重民之至。必三年者。治道三年有成也。其人數則大國舉三人。次國舉二人。小國舉一人。公羊傳注。莊公元

年

二 凡選舉得人與不得人皆有賞罰則操選政者皆盡心於求賢而賢者可進善者可勸矣尚書大傳

三 凡舉賢之外復有禮聘以為諸侯貢士庸材者貢其身盛德者貢其名及其幽隱諸侯所遺失天子之所昭故聘之也此聘名士禮賢者之義也白虎通

孔子最重選舉哀公問曰何為則民服孔子對曰舉直錯諸枉則民服舉枉錯諸直則民不服是服民之道惟在選舉得人也又孔子告樊遲曰舉直錯諸枉能使枉者直是化民之道亦惟在選舉得人也子夏釋其義曰舜有天下選於眾舉皋陶不仁者遠矣湯有天下選於

眾舉伊尹不仁者遠矣此能使枉直之證也(論語第二第十二)

然孔子之所謂選舉不盡君選不盡官選亦不盡民選蓋合而參用之以君主其權而以民定其本如斯而已何謂以民定其本也莊公十七年春秋曰秋鄭瞻自齊逃來何注曰繫鄭者明行當本於鄉里也子貢問曰鄉人皆好之何如子曰未可鄉人皆惡之何如子曰未可不若鄉人之善者善之鄉人之惡者惡之(論語第十三)蓋鄉人所好者或行與眾同或為朋黨其所惡者或行與眾異或為孤特不若鄉人之善行者善之其惡行者惡之既與善人同復與惡人異則其人至為可信也觀此則近世憑政黨為選舉者其法不若孔子之大公無私而得真賢也孔子之法不倚於一派之好惡必取兩派而互

勘之其法已公矣。復徵於好惡者之實行。則其法更精確矣。蓋必本人之自身。實有善行惡行。然後其好惡乃有參考之價值也。夫世俗之所不譽者。未必為非。其所譽者。未必為是。醜者非醜。而惡好者好。亦由私之所致也。故必本之於鄉里。而復定之於朝廷。則選舉得人。而民可以服矣。夫選舉之始。既本之於民。選舉之後。又暴之於民。而凡辦理選舉者。又有嚴明之賞罰以繩之。則較之純粹民選之法。實遠過之矣。況乎選舉之本意。原所以重民。選舉之成效。亦所以服民。固無一不以民為主者哉。

孟子曰。國君進賢。如不得已。將使卑踰尊。疏踰戚。可不慎歟。左右皆曰賢。未可也。諸大夫皆曰賢。未可也。國人皆曰賢。然後察之。見賢焉。

然後用之。左右皆曰不可。勿聽。諸大夫皆曰不可。然後察之。見不可焉。然後去之。左右皆曰可殺。勿聽。諸大夫皆曰可殺。勿聽。國人皆曰可殺。然後察之。見可殺焉。然後殺之。故曰國人殺之也。如此。然後可以為民父母。第二觀孟子所言。則知孔教之所謂選舉。其權之名在君。而權之實在民。不特殺人為國人殺之。即去人亦國人去之。用人亦國人用之。王制曰。爵人於朝。與眾共之。刑人於市。與眾棄之。此之謂也。但孔教之道。從未流於極端。並不驟以民之所是非。即奉以為定論。蓋民之為言也。瞑也。氓之為言也。盲也。未可遽信以為是也。故必先之以左右。諸大夫之公意。以為兼聽並觀之資。尤必終之以實。事求是。求鞫之自察。以見確鑿可據之實。夫然後真。

正之民意可得而觀矣。若夫近世之政黨選舉則固未足以語此。賈誼新書大政下篇發揮孔教選舉之精神甚為顯著。蓋孔教者曰合君權民權為一而以君為民之總代表者也。其言曰夫民者賢不肖之材也。賢不肖皆具焉。故賢人得焉。不肖者伏焉。技能輸焉。忠信飾焉。故民者積愚也。故夫民者雖愚也。明上選吏焉。必使民與焉。故士民譽之則明上察之。見歸而舉之。故士民苦之則明上察之。見非而去之。故王者取吏不妄。必使民唱然後和之。故夫民者吏之程也。察吏於民。然後隨之。夫民至卑也。使之取吏焉。必取其愛焉。故十人愛之有歸。則十人之吏也。百人愛之有歸。則百人之吏也。千人愛之有歸。則千人之吏也。萬人愛之有歸。則萬人之吏也。故萬人之吏選

卿相焉。如此則真可謂民意之選舉矣。蓋民之上惟有一君以操選柄。而事實則惟以民之愛惡為主。一切官吏政客皆不得以私意參雜於其間。此孔子之所謂選舉也。

五 舉逸

孔子曰。舉逸民。天下之民歸心焉。又曰。逸民。伯夷。叔齊。虞仲。夷逸。朱張。柳下惠。少連。孔子曰。不降其志。不辱其身。伯夷。叔齊與。謂柳下惠。少連。降志辱身矣。言中倫。行中慮。其斯而已矣。謂虞仲。夷逸。隱居放言。身中清。廢中權。我則異於是。無可無不可。論語第二十第十八宣公十七年。春秋曰。冬十有一月壬午。公弟叔肝卒。穀梁傳曰。其曰公弟叔肝。賢之也。其賢之何也。宣弑而非之也。非之則胡為不去也。曰

兄弟也。何去而之。與之財。則曰我足矣。織屨而食。終身不食。宣公之食。君子以是為通恩也。以取貴乎。春秋孔子曰。篤信好學。守死善道。危邦不入。亂邦不居。天下有道。則見。無道則隱。逸民之謂也。禮盛德之士。不名。天子上大夫。不名。春秋公子不為大夫者。不卒。今卒叔肝而食之者。起其宜為天子大夫也。公羊傳注。凡德行精純。道術通明。王者不得臣。而隱居不在位者。亦謂之名士。是皆孔子之所貴者也。孔子無可無不可。本與逸民異趣。然甚有取於逸民。至謂舉逸民。則天下之民歸心。斯亦推許之至者矣。是何也。功名富貴之念。與有生以俱來。雖孔子亦不易使人絕其慾望。而世界一切爭亂。即悉由於功名富貴之念所構而成。惟能治此惡念。引而進之於高尚之競爭。

則人心日正風化日美將置身於權利外而紛亂不起矣孔子之推許逸民即所以治此惡念者也表章賢士以立人格使人人於現世之中皆可得一天堂以為安身立命之所而俯視塵俗之功名富貴若將浼焉其流風所被將見人皆以廉讓為高以爭奪為耻雖安生而得功名富貴猶不欲有之然則用兵以求之者豈尚有人為之乎此孔子提倡平和之要旨也

孔子之後道德節之士氣以後漢為最盛茲謹畧舉一二以明其維世之功用焉

後漢樊英明五經隱於壺山之陽州郡前後禮請不應公卿舉賢良方正有道皆不行安帝兩徵亦不至孔子六百七十八年順帝策書

備禮玄纁徵之復固辭疾篤乃詔切責郡縣駕載上道英不得已到京稱病不肯起乃強輿入殿猶不以禮屈帝怒謂英曰朕能生君能殺君能貴君能賤君能富君能貧君君何以慢朕命英曰臣受命於天生盡其命天也死不得其命亦天也陛下焉能生臣焉能殺臣臣見暴君如見仇讎立其朝猶不肯可得而貴乎雖在布衣之列環堵之中晏然自得不易萬乘之尊又可得而賤乎陛下焉能貴臣焉能賤臣臣非禮之祿雖萬鍾不受若申其志雖簞食不厭也陛下焉能富臣焉能貧臣帝不能屈而敬其名使出就大醫養疾月致羊酒至六百八十年三月天子乃為英設壇席令公車令導尚書奉引賜几杖待以師傅之禮延問得失英不敢辭拜五官中郎將數月英稱疾

篤詔以為光祿大夫。賜告歸。令在所送穀千斛。常以八月致牛一頭。酒三斛。如有不幸。祠以中牢。英辭位不受。有詔譬旨勿聽。英初被詔命。僉以為必不降志。及後應對。又無奇謨深策。談者以為失望。

范曄論曰。漢世之所謂名士者。其風流可知矣。雖弛張趣舍。時有未純於刻情脩容。依倚道藝。以就其聲價。非所能通物方弘時務也。及徵樊英楊厚。朝廷若待神明。至竟無他異。英明最高。毀最甚。李固朱穆等以為處士。純盜虛名。無益於用。故其所以然也。然而後進希之以成名。世主禮之以得眾。原其無用。亦所以為用。則其有用。或歸於無用矣。何以言之。夫煥乎文章。時或乖用。本乎禮樂。適末或疎。及其陶播紳藻心性。使由之而不知者。豈非道邈用表。乖之數跡乎。而或

者忽不踐之地。賒無用之功。至乃誚譟遠術。賤斥國華。以為力詐可
以救淪敝。文律足以致寧平。智盡於猜察。道足於法令。雖濟萬世。其
與夷狄同也。孟軻有言曰。以夏變夷。不聞變夷於夏。况有未濟者乎。
後漢書第八十二。曄之論精美極矣。以無用為用。此逸民所以能救
淪敝而致寧平也。今之慕歐化者。以為力詐文律足以濟世。豈知我
中國孔教之道。固遠出於力詐文律之外乎。

范曄後漢書逸民列傳序曰。易稱遯之時義大矣哉。又曰。不事王侯。
高尚其事。是以堯稱則天。不屈。賴陽之高。武盡美矣。終存孤竹之絜。
自茲以降。風流彌繁。長往之軌未殊。而感致之數匪一。或隱居以求
其志。或回避以全其道。或靜己以鎮其躁。或去危以圖其安。或垢俗

以動其槩。或疵物以激其清。然觀其甘心畎畝之中。憔悴江海之上。豈必親魚鳥。樂花草哉。亦云性分所至而已。故蒙耻之賓。屢黜不去。其國蹈海之節。千乘莫移其情。適使矯易去就。則不能相為矣。彼雖硜硜有類。沽名者。然而蟬退蛻。蠶吐絲。埃之中。自致寰區之外。異夫飾智巧以逐浮利者哉。乎荀卿有言曰。志意修則驕。富貴道義重則輕。王公也。漢室中微。王莽篡位。士之蘊藉義憤甚矣。是時裂冠毀冕。相攜持而去之者。蓋不可勝數。楊雄曰。鴻飛冥冥。弋者何篡焉。言其違患之遠也。光武側席幽人。求之若不及。旌帛蒲車之所徵。貢相望於巖中矣。若薛方逢萌。聘而不肯至。嚴光固黨王霸。至而不能屈。羣方咸遂。志士懷仁。斯固所謂舉逸民。天下歸心者乎。肅宗亦禮鄭均而徵。

高鳳以成其節。自後帝德稍衰。邪孽當朝。處子耿介。羞與卿相等列。至乃抗憤而不顧。多失其中行焉。蓋錄其絕塵不反。同夫作者。列之此篇。

高鳳者。漢章帝時之隱者也。鄰里有爭財者。持兵而鬪。鳳往解之。不己。乃脫巾叩頭固請曰。仁義遜讓。奈何棄之。於是爭者懷感。投兵謝罪。范泰讀高鳳傳。嘗論之曰。古者隱逸。其風尚矣。潁陽洗耳。耻聞禪讓。孤竹長飢。羞食周粟。或高棲以違行。或疾物以矯情。雖軌迹異區。其去就一也。若伊人者。志陵青雲之上。身晦泥汗之下。心名且猶不顯。况怨累之為哉。與夫委體淵沙。鳴弦揆日者。不其遠乎。後漢書第八十三。夫高鳳解鬪。至於叩頭固請。以勸人不棄仁義。遜讓。此可謂

能傳孔教者矣。是故孔教之所謂逸民，非遺世不顧者也。心名且猶不顯，况怨累之為哉？此逸之^隱高風，所以能息爭止競也。

夫所謂逸民者，非必終身不仕之謂也。春秋之貴叔肝，起其宜為天子大夫。論語重在舉逸。月令季春之月，聘名士禮賢者，此皆欲逸民之仕者也。特逸民以道自重，不求仕耳。然彼以不慕權利之故，而無所貪戀，亦即以不慕權利之故，而無所恐懼。後漢黨錮中人，如李膺、陳蕃之徒，雖亦置身仕宦，然不降其志，不辱其身，其志節實與逸民無異。徒以坐黨禁錮之故，不克竟其救世之志耳。然而漢之所以能延百餘年之祚者，猶藉黨錮諸賢之力。賢者之有益人國，於此可見矣。茲錄范曄之論二則於左。

范曄李膺范滂等傳論曰李膺振拔汙險之中蘊義生風以鼓動流俗激素行以耻威權立廉尚以振貴執使天下之士奮迅感槩波蕩而從之幽深牢破室族而不顧至于子伏其死而母歡其義壯矣哉子曰道之將廢也與命也後漢書第六十七

范曄陳蕃傳論曰桓靈之世若陳蕃之徒咸能樹立風聲抗論昏俗而驅馳險阨之中與刑人腐夫同朝爭衡終取滅亡之禍者彼非不能絜情志違埃霧也愍夫世士以離俗為高而人倫莫相恤也以遯世為非義故屢退而不去以仁心為己任雖道遠而彌厲及遭際會協策竇武自謂萬世一遇也懍懍乎伊望之業矣功雖不終然其信義足以攜持民心漢世亂而不亡百餘年間數公之力也後漢書第

六十六

黨錮諸賢，非不能為逸民，然屢退不去者，仁以為己任也。殺身成仁，豈非與隱居求志者出處各行其是也哉？

六 不畜刑人

凡君子不近刑人，近刑人則輕死之道也。襄公二十九年春秋曰：「閹弑吳子餘祭。」穀梁傳曰：「閹，門者也。寺人也不稱名姓，閹不得齊於人，不稱其君，閹不得君其君也。禮君不使無耻，不近刑人，不狎敵，不遁怨賤人，非所貴也。貴人非所刑也，刑人非所近也。舉至賤而加之吳子，吳子近刑人也。閹弑吳子餘祭，仇之也。王制曰：『是故公家不畜刑人，大夫弗養，士遇之塗，弗與言也。』」屏之四方，唯其所之，不及以政，亦

弗故生也。蓋刑人者，僅免於死，國家不特不使之，亦弗故意使生，困乏又無賙餼，直放之化外，任其自生自死而已。後世宦官之禍，累代為中國患，其亦違犯聖言之罰也已夫。

七 君與臣

一 凡君臣有相對之義務。昔魯定公問君使臣，臣事君如之何。孔子對曰：君使臣以禮，臣事君以忠。論語第三。禮也者，非儀文之謂也。一切皆合乎禮法之謂也。孔子曰：君命順則臣有順命，君命逆則臣有逆命。禮記表記言臣之順逆，唯君所召也。魯穆公問於子思曰：為舊君反服，古與？子思曰：古之君子，進人以禮，退人以禮，故有舊君反服之禮也。今之君子，進人若將加諸膝，退人若將隊諸淵，毋為戎首。

不亦善乎。又何反服之禮之有。禮記檀弓孟子告齊宣王曰。君之視臣如手足。則臣視君如腹心。君之視臣如犬馬。則臣視君如國人。君之視臣如土芥。則臣視君如寇讎。第八何休曰。君敬臣則臣自重。君愛臣則臣自盡。公羊傳注隱公元年。凡此皆言君臣有相對之義務也。孔子之教。固非縱君專制。而偏責臣以服從也。

二 凡君敬臣之禮。天子為三公下階。卿前席。大夫興席。士式几。公羊傳注宣公六年。蓋君臣不過以職分而分。並非不平等。故君之於臣。不能不有相當之敬禮也。

三 凡王者所不臣者三。二王之後也。妻之父母也。夷狄也。暫不臣者五。祭尸也。授受之師也。將帥用兵也。三老也。五更也。不純臣者一。

諸侯也。王者於臣有不名者五。一諸父。詩云王曰叔父是也。二曰諸兄。春秋曰王札子是也。宣公十五年三上大夫祭伯是也。四老臣。宰渠伯糾是也。五盛德之士。叔肝是也。白虎通公羊傳注桓公四年。白虎通云韓詩內傳曰師臣者帝友。臣者王臣。臣者霸虜。臣者亡。

四凡諸侯以國為體。大夫為肱股。士民為肌膚。皆國體也。故君殺大夫則春秋稱國以殺。僖公六年鄭殺其大夫申侯是也。莊公二十四年及昭公十五年梁穀梁傳皆曰大夫國體也。然則諸侯與大夫皆國體矣。而士民之為國體從可知矣。文公九年公羊傳注曰大夫繫國。蓋國內臣民皆繫國者也。

五凡諸侯不得專殺大夫。當請命於天子。無論有罪無罪皆不得

專殺惟士以下之有罪者得專討之耳。若殺大夫之無罪者，則春秋不書其君之葬，明當絀爵，不得以諸侯之禮終也。公羊傳注哀公四年僖公三十二年，所以裁抑君權，不使暴君得專殺其臣也。

甲 燕禮

燕禮者，所以明君臣之義，使君臣上下和親而不相怨者也。此安國寧君之道也。即孔子製造平和之法也。請畧述燕義以明之。燕義曰：諸侯燕禮之義，君立阼階之東南，南鄉，爾卿大夫皆少進，定位也。君席祚階之上，居主位也。君獨升立席上，西面特立，莫敢適之義也。設賓主，飲酒之禮也。使宰夫為獻主，臣莫敢與君亢禮也。不以公卿為賓，而以大夫為賓，為疑也。明嫌之義也。賓入中庭，君降一等。

而揖之禮之也。

君舉旅於賓及君所賜爵皆降再拜稽首升成拜明臣禮也。君答拜之禮無不答明君上之禮也。臣下竭力盡能以立功於國君必報之以爵祿故臣下皆務竭力盡能以立功是以國安而君寧禮無不答。言其上之不虛於下也。上必明正道以道民民道之而有功然後取其什一故上用足而下不匱也是以上下和親而不相怨也和寧禮之用也。此君臣上下之大義也。故曰燕禮者所以明君臣之義也。席小卿次上卿大夫次小卿士庶子以次就位於下獻君君舉旅行酬而后獻卿卿舉旅行酬而后獻大夫大夫舉旅行酬而后獻士士舉旅行酬而后獻庶子俎豆牲體薦羞皆有等差所以明貴賤也。禮

記燕義

八 臣道

一 凡臣之事君有義則合無義則離孔子曰所謂大臣者以道事
不可則止君論語第十一故春秋之義臣三諫君而不從則去之蓋仕
為行道道不行義不可以素餐所以申賢者之志孤惡君也公羊傳僖
公二十四年是故為臣者本有進退自由之道並非君之私人也若
為君之私人則不獨自失人格且已失臣之資格矣唯公子無去國
之道無臣異國之義公羊傳注莊公九年

二 凡三諫而去之後則臣無死君之義其在職而任事者苟不死
義則當誅之僖公二十四年戎將侵曹曹羈諫曰戎眾以無義君請

勿自敵也。曹伯曰不可。三諫不從，遂去之。故春秋以曹羈為賢。其後曹伯果為戎所殺，而諸大夫之從君戰者，不伏節死義，獨退求生。嗣子立而誅之。春秋又以為誅當其罪。書曰：「曹殺其大夫，以眾略之。」而不名也。此為臣與不為臣之別也。

三 凡不為臣者可以避寇，而為臣者不可逃難。昔曾子居武城，有越寇，而曾子先去，以為民望。寇退則反，又沈猶氏有負芻之禍，而曾子及門徒七十人，雖舍於沈猶氏，亦去之而不與其難。蓋曾子師也。父兄也。去留無所拘也。子思居於衛，有齊寇，或曰：「寇至，盍去。」諸子思曰：「如伋去，君誰與守？」蓋子思臣也。微也。當死君難也。孟子曰：「曾子子思同道。」易地則皆然。此又為臣與不為臣之別也。（孟子第八）

四 凡大臣能滅親定亂善鄰安國春秋賢之季友於其兄叔牙將弑而酖之以過惡於其兄慶父既弑而殺之以討罪此定亂之功也至其奉閔公以託於齊桓為洛姑之盟其後齊桓繼魯之絕世立僖公而城魯本感洛姑之託其託君安國尤為大功故春秋於其由洛姑還國特書曰季子來歸稱子者賢之也顯其當存國之任達其存國之功也變至言歸者喜其舒難而安國也言來者喜其外交得意而自齊來也春秋於季友之卒復字之者賢之而錄其終也公羊傳

莊公三十二年閔公元年二年僖公元年十六年

五 凡人臣憂國能假外力以定內亂者春秋大之成公十五年春秋曰宋華元出奔晉宋華元自晉歸于宋宋殺其大夫山宋魚石出

奔楚何注曰。不省文復出宋華元者。宋公卒子幼。華元以憂國為大。夫山所譖出奔晉。晉人理其罪。宋人反華元誅山。故繁文大之也。言歸者。明出入無惡。此亦大臣之權義也。

六 凡君若被執。劫質求國。當別立新君。以絕敵望。不得以君故而亡國也。僖公二十一年。楚成王執宋襄公。以伐宋。宋公謂公子目夷曰。子歸守國矣。國子之國也。對曰。君雖不言。國固臣之國也。於是歸設守械而守國。楚人謂宋人曰。子不與我國。吾將殺子君矣。宋人應之曰。吾賴社稷之神靈。吾國已有君矣。楚人知雖殺宋公。猶不得宋國。於是釋宋公。宋公釋乎執。走之衛。公子目夷復曰。國為君守之。君曷為不入。然後逆襄公歸。目夷遭難。設權救君。有解圍存國免主之

功故春秋為之諱圍以起其事所以彰目夷之賢也

七 凡君國相權則國重君雖逐君以存國亦得為知權桓公十一

年宋人執鄭相祭仲脅使出忽而立突祭仲不從其言必為宋殺鄭
無拒難者而宋納突出忽即可因之滅鄭蓋忽之為君甚微祭仲存
則存祭仲亡則亡矣祭仲知國重君輕故勉從其言寧使身負逐君
之罪而不使君因己死而死國因己死而亡且其後可乘間出突反
忽亦足自贖在祭仲之意以為必如是然後能保有鄭國故孔子以
其存國之功除逐君之罪罪不足而功有餘故賢之而不名以為知
權也

公羊傳曰權者何權者反於經然後有善者也權之所設舍死亡無

所設行權有道。自貶損以行權。不害人以行權。殺人以自生。亡人以自存。君子不為也。蓋身蒙逐君之惡。以存鄭。自貶損以行權也。納突不害忽。不害人以行權也。祭仲生者。乃所以生忽。存鄭非苟殺忽以自生。亡鄭以自存也。春秋繁露曰。夫權雖反經。亦必在可以然之域。不在可以然之域。故雖死亡。終不為也。弗第四此行權之道也。

八 凡國有必亡之禍。君有必死之志。則公子密奉君命。專地獨立。以為人之附庸。而存宗廟。亦大不得已之權法也。昔紀與齊為讎。齊大紀小。有必亡之勢。紀侯自知力不加而志距之。謂其弟紀季曰。我宗廟之主。不可以不死也。汝以鄆往。服罪於齊。請以立五廟。使我先君歲時有所依歸。故莊公三年。春秋曰。秋紀季以鄆入於齊。紀季何

以不名賢其知權寧蒙出奔之罪以立存先祖之功也言入者難之辭賢季有難去凡入齊之心也夫春秋之法大夫不得用地又曰公子無去國之義又曰君子不辭辟外難紀季犯此三者何以為賢豈賢臣固盜地以下敵棄君以避患乎曰賢者不為是是故託賢於紀季以見季之弗為而紀侯使之也紀侯使之而春秋不言詭其辭以移之紀季者以紀侯死義且得眾心故春秋賢之而為之諱也公羊傳春秋繁露第四

九 凡社稷之臣義形於色桓公二年春秋曰春王正月戊申宋督弑其君與夷及其大夫孔父孔父稱字者春秋於賢者不名也言及者使上及其君若附大國以名通明當封為附庸不絕其祀所以重

社稷之臣也。公羊傳曰：督將弑殤公，孔父生而存，則殤公不可得而弑也。故於是先攻孔父之家，殤公知孔父死已必死，趨而救之，皆死焉。孔父正色而立於朝，則人莫敢過而致難於其君者，孔父可謂義形於色矣。

十 凡社稷之臣，不畏彊禦。莊公十二年，春秋曰：秋八月甲午，宋萬弑其君接及其大夫仇牧。蓋宋萬與閔公博，以語言相侮戲，萬怒，搏閔公絕脰。仇牧聞君弑，趨而至，遇之於門，手劍而叱之。萬臂掇仇牧，碎其首，齒著手門闔。仇牧可謂不畏彊禦矣。猶乳犬攫虎，伏雞搏狸，精誠之至也。

十一 凡社稷之臣，不食其言。僖公十年，春秋曰：晉里克弑其君

卓子及其大夫荀息。公羊傳曰：「及者何？累也。弑君多矣，舍此無累者乎？」曰：「有。孔父仇牧皆累也。舍孔父仇牧，無累者乎？」曰：「有。有則此何以書？賢也。何賢乎荀息？荀息可謂不食其言矣。其不食其言奈何？奚齊卓子者，驪姬之子也。荀息，傅焉。驪姬者，國色也。獻公愛之甚，欲立其子。於是殺世子申生。申生者，里克傳之。獻公病將死，謂荀息曰：「士何如？則可謂之信矣。」荀息對曰：「使死者反生，生者不愧乎其言，則可謂信矣。」獻公死，奚齊立。里克謂荀息曰：「君殺正而立不正，廢長而立幼，如之何？」願與子慮之。荀息君嘗訊臣矣，臣對曰：「使死者反生，生者不愧乎其言，則可謂信矣。」里克知其不可與謀，退弑奚齊。荀息立卓子，里克弑卓子。荀息死之。荀息可謂不食其言矣。何注曰：「起時莫不背。」

死鄉生去敗與成苟息一受君命終身死之故言及與孔父同義蓋明孔父仇牧苟息三人皆當封為附庸不絕其祀也

十二 凡臣之事君以死難為正然苟能以身任天下國家之安危者則以功業為重而死節有所不必計子路曰桓公殺公子糾召忽死之管仲不死曰未仁乎子曰桓公九合諸侯不以兵車管仲之力也如其仁如其仁子貢曰管仲非仁者與桓公殺公子糾不能死又相之子曰管仲相桓公霸諸侯一匡天下民到于今受其賜微管仲吾其被髮左衽矣豈若匹夫匹婦之為諒也自經于溝瀆而莫之知也

論語第十四

按召忽忠君而管仲愛國有忠君與愛國為一事者有忠君與愛國

分兩事者。此類是也。公子糾固當為齊君者。桓公固不當為齊君者。然桓公既得國而殺子糾矣。若管仲死之。亦不過與召忽等耳。於齊無益也。蓋桓公固子糾之弟。並非外人。雖為子糾之讎。而自先君視之。本皆屬子孫。自國人視之。亦皆為君胄。死者既不可復生。而君位又已大定。其才又足以有為。則為管仲者。固不得不有以自處矣。仲之言曰。夷吾之為君臣也。將承君命。奉社稷。以持宗廟。豈死一糾哉。夷吾之所死者。社稷破。宗廟絕滅。祭祀絕。則死之。非此三者。則夷吾生。夷吾生則齊國利。夷吾死則齊國不利。管子第十八觀此。則管仲固以愛國為主。若國亡而不能救。管仲固必死也。特不以救國之身。隨一君以俱盡耳。

十三 凡君死於私事則臣無死君之義襄公二十五年崔杼以齊莊公通其妻弑之莊公之臣晏子不死其難晏子之言曰君民者豈以陵民社稷是主臣君者豈為其口實社稷是養故君為社稷死則死之為社稷亡則亡之若為己死而已亡為非其私暱誰敢任之左傳此誠明於君臣之道及君國之別者也齊莊死於私事固與子糾死於國事不同然晏子存身以利國固不得謂之不忠君也蓋國重於君也若君為社稷死則晏子亦不得不死之矣

十四 凡卿不得憂諸侯所以抑臣道也襄公三十年春秋曰晉人齊人宋人衛人鄭人曹人莒人邾婁人滕人薛人杞人小邾婁人會于澶淵宋災故蓋諸侯之大夫為宋災之故而會以復其財也其貶

稱人者何注曰時雖各諸侯使之恩賞實從卿發故貶起其事明大夫之義得憂內不得憂外所以抑臣道也宋憂內并貶者非救危亡禁作福也

十五 凡大夫之義不得專廢置君故文公十四年晉卻缺帥師納接菑于邾婁弗克納引師而去春秋大之而仍貶稱晉人明臣下作福之誅也

十六 凡大夫之義不得專執昭公三十二年晉韓不信及諸侯之大夫城成周明年為定公元年春秋曰三月晉人執宋仲幾于京師公羊傳曰仲幾之罪何不薨城也其言于京師何伯討也伯討則其稱人何貶曷為貶不與大夫專執也曷為不與實與而文不與文曷

為不與大夫之義不得專執也何注曰大夫不得專相執辟諸侯也
不言歸者諸侯當決於天子犯之惡甚故錄所歸大夫當決主獄爾
犯之罪從外小惡不復別也無例不在常書又月者善為天子執之
十七 凡諸侯委政大夫而大夫不臣君若贅旒則春秋刺之襄公
十四年春秋曰春王正月季^孫宿^叔老會晉士匄齊人宋人衛人鄭公
孫嚙曹人莒人邾婁人滕人薛人杞人小邾婁人會吳于向何注曰
月者危刺諸侯委任大夫交會彊夷臣日以彊^強三年之後君若贅旒
然襄公十六年春秋曰三月公會晉侯宋公衛侯鄭伯曹伯莒子邾
婁子薛伯杞伯小邾婁子于澠梁戊寅大夫盟公羊傳曰諸侯皆在
是其言大夫盟何信在大夫也何言乎信在大夫^編刺天下之大夫

也。曷為編刺天下之大夫。

君若贅旒然。穀梁傳曰。溴梁之會。諸侯失

正矣。諸侯會而曰大夫盟。正在大夫也。諸侯在而不曰諸侯之大夫。

大夫不臣也。何休曰。蕭魚之會。服鄭最難。諸侯勞倦。莫肯復出。而大夫

常行。正委於臣。而君遂失權。大夫故得信任。故孔子曰。唯器與名不

可以假人。按蕭魚之會。襄公十一年事也。

十八。凡臣不得壅塞君命。故僖公二十八年。公使公子買戍衛。而

不可使往。乃刺殺之。春秋書曰。公子買戍衛。不卒戍。刺之。公羊傳曰。

不卒戍者。內辭也。不可使往也。不可使往。則其言戍衛何。遂公意也。

文公八年。公使公孫敖如京師。亦不可使往。乃出奔莒。春秋書曰。公

孫敖如京師。不至復。丙戌奔莒。公羊傳曰。不至復者。內辭也。不可使

往也。不可使往則其言如京師何。遂公意也。襄公二十三年春秋曰。秋齊侯伐衛。遂伐晉。八月叔孫豹帥師救晉。次于雍榆。公羊傳曰。曷為先言救而後言次。先通君命也。蓋惡其不遂君命而專止次也。是皆正君臣之義。不使君命壅塞也。

十九 凡大夫無遂事。僖公三十年公子遂見使如京師而橫生事。矯君命聘晉。故春秋疾其驕蹇自專。明其當絕。書曰。公子遂如京師。遂如晉。公羊傳曰。大夫無遂事。此其言遂何。公不得為政爾。襄公十二年春秋又曰。李孫叔^宿帥師救台。遂入運。入運者討叛也。封內兵不書。而此書者。為遂事舉也。討叛而惡遂者。得而不取。與不同。故言入起其事。然不取者非全不取也。李孫取之以自益其邑。而不以入國。

家故惡其遂也。公子遂遂卒弑子赤。季孫宿遂卒逐昭公。孔子見著微知著。故特書遂以惡之。所以垂戒也。

二十 凡亂世臣挾當國之權。而身在國外。則將交連鄰國。復為內難。故春秋謹錄其所在之地。以明當急誅之。所以弭亂也。公羊傳隱公元年。

二十一 凡大夫得罪出奔。其位已絕。若反國以篡大位。則非君所置。自不得為大夫。殺之者當從討賊辭。襄公二十一年。秋。晉欒盈出奔楚。二十三年。夏。晉欒盈復入于晉。入于曲沃。是年冬。春秋曰。晉人殺欒盈。公羊傳曰。曷為不言殺其大夫。非其大夫也。何注曰。明非君所置。不得為大夫。無大夫文。而殺之稱人者。從討賊辭。大其除亂也。

蓋凡大夫出奔，非有君命不得反。非君命而自外入國以作亂者，是賊也。故奪其大夫之文，而以討賊言之。此孔子消弭內亂之義也。

二十二 凡大夫相殺，則被殺者亦有罪。宣公十五年，春秋曰：「王札子殺召伯、毛伯。」何注曰：「不言其大夫者，挈也。惡二大夫居尊卿之位，為下所提挈而殺之。」

二十三 凡大夫驕蹇作威，相放則當誅。哀公三年，春秋曰：「蔡人放其大夫公孫獵于吳，是也。」大夫合稱名氏，今稱人者，貶之也。

二十四 凡佞人當誅，為其亂善行，傾覆國政。故孔子為魯司寇，先誅少正卯，謂佞道已行，亂國政也。佞道未行，則遠之而已。論語孔子曰：「遠佞人。」百虎通：「此懲辦政治犯之法也。」

二十五 凡懲辦政治犯當先誅渠帥後治其黨昭公二十二年王室亂明年春秋曰尹氏立王子朝二十六年天王入于成周之後又曰尹氏召伯毛伯以王子朝奔楚王子朝獨舉尹氏出奔並舉召伯毛伯者明本在尹氏當先誅渠帥後治其黨也

二十六 凡弑君之賊國中人人得討之所以廣忠孝之路凡討賊不當緩慢若臣子不以時討則春秋書月以責其久若當國而不討賊則春秋且加之弑隱公四年二月戊申衛州吁弑其君完其後春秋書曰九月衛人殺州吁于濮其稱人者人人得討賊之辭也討賊例時此月者久之也春秋之義君弑臣不討賊非臣也子不復讎非子也是故君弑賊不討不當葬以為無臣子也公羊傳隱公十一年

莊公十二年春秋曰秋八月甲午宋萬弑其君接又曰冬十月宋萬出奔陳萬弑君而復見者重錄彊禦之賊明當急誅之也公羊傳宣公二年晉趙穿弑晉靈公而春秋書曰秋九月乙丑晉趙盾弑其君夷獯穿親弑而加弑於盾者以盾不討賊也夫靈公無道而盾賢今春秋乃重責盾者明君雖不君臣可以不臣也故不討賊則為知情知情則不免於罪矣公羊傳宣公六年

二十七凡君親無將將則誅故謀反大逆雖事未行而罪已定所以遏亂也公羊傳莊公三十二年

二十八凡亂臣身負重罪致敵國託乎討賊以滅其國則春秋豫貶之如昭公八年陳侯之弟招殺陳世子偃師自是而弑其君而春

秋先於昭公元年。即書陳公子招。不稱弟以貶之。著其罪之特重。言楚之討乎。討招以滅陳也。

二十九 凡人臣知賊而不言。則當誅。文公十八年二月公薨。秋公子遂叔孫得臣如齊。蓋子赤齊甥也。遂欲殺子赤而立其庶兄宣公。乃見宣公于齊侯而請立之。齊侯新立。欲得魯為援。以為子赤於法當立。不受齊恩。若宣以非分得國。荷恩必厚。許之。亦外交之狡獪也。而遂乃於十月弑子赤矣。當叔孫得臣偕遂如齊之時。知遂之謀。竟不發揚其罪。故春秋於宣公五年叔孫得臣之卒。貶不書曰。明當誅也。公羊傳左傳

三十 凡人臣雖不篡弑。但亂國則當死。昭公四年楚子執齊封殺

之公羊傳曰慶封之罪何脅齊君而亂齊國也春秋繁露曰人臣之行貶主之位亂國之臣雖不篡弑其罪皆宜死第一是故凡人臣之亂國政者皆宜死以此為天下大禁此孔子弭亂之道也

